

LE GULUNĒ' BÖNNI' GUBÁZ NASÓL-LĒ'Ē CRISTO

Los Hechos

Le guxzí' lu nē'ē Dios, isól-lē'ē Dios Bö' Lá'ayi

1 ¹ Cate' buzúaja' lu guichi zí'alö, quiu' li', Teófilo, neda', Lucas, buzúaja' yúgu'tē le gusí lahuē' runē' Jesús, en rusédinē' ² ga bidxintē dza buēpē' yehua' yubá. Cate' si' huēpē' Jesús yehua' yubá, dzáguie' Dios Bö' Lá'ayi Lē', gunná bē'ē ca ral-la' ilunē' gubáz queē', yugu' bönni' na' guró cazē'. ³ Gudödi gudí'i guxzáque'ē Jesús, gútiē'. Ní'irö bubanē', en buluí'i lahuē' lógaquiē' gubáz queē' na'. Buluí'inē' légaquiē' zían le gulaca bē' zoē' nabanē', le cabí gaca nu tá'baga'. Zían luzuí buluí'i lahuē' lógaquiē' idú ca choá' dza, en bē'lenē' légaquiē' didza' ca rinná bē'ē Dios.

⁴ Cate' ni' nacu'ē tsözxón, gunná bē'enē' légaquiē' cabí ulu'zē'ē Jerusalén. Jesús gudxē' légaquiē', rnnē':

—Guli'cóz ni' le guxzí' lu nē'ē Xuza' isól-lē'ē queéli' ca na' chibusiýón quézida' libí'ili'.

⁵ Gunnē' ca':

—Le nácatē Juan buquilē' bönachi nisa lu nisa. Na'a biti' tse xidzé gaca queéli' le ruluí'i yöl-la' ridila nisa ni, idisóalenē' Dios Bö' Lá'ayi libí'ili'.

Ruhuēpē' Jesús yehua' yubá

⁶ Ní'irö yugu' bönni' ta'yéajlē'ē Jesús, nudúbigaquiē' ni', gula'nábinē' Lē', ta'nnē':

—Xan, ¿naru' gunu' ga ila'nná bē' bönachi Israel leyúbölö dza ni zóaru' na'a?

⁷ Jesús gudxē' légaquiē':

—Biti' nequi queéli' inózili' bizxi dza o bizxi dzö' gunē' Dios Xuz le nuzóē' lu na' cazē'. ⁸ Sí'ili' yöl-la' huáca cate' guídē' Dios Bö' Lá'ayi idisóalenē' libí'ili'. Ní'irö gunli' ba nalí quia' neda' lu yödzö Jerusalén, en idú luyú Judea, en luyú Samaria, en ga idxíntēli' idútē yödzölió.

⁹ Cate' budxi bē'lenē' légaquiē' didza' ni, tsanni ni' tu'yusē' ca' Lē', la' buépitē' xitsá' ga rō'ö tu böaj le bucache' Lē', ate' bíti'rö bila'lē'enē' Lē'.

¹⁰ Tsanni ni' tu'yüē' lúxibälö cate' ni' buēpē' Jesús, bulu'luí'i lógaquiē' chopē' gubáz lá'ayi ga na' nacu'ē, nácuagaquiē' lari' chiguíchido'os.

¹¹ Chopē' ni' gulé' légaquiē', ta'nnē':

—Bönni' Galilea, ¿bizx que ruyuli' lúxibälö? Lē' cazē' Jesús ni si' guzé'ē ga zóali', buēpē' yehua' yubá, lēasca' caní huödē' leyúbölö ca na' chibilé'eli'-nē' söhuójē' yehua' yubá.

Ta'bóë' Matías para tsázië' xilatjè' Judas

¹² Ní'irö gula'zé'ë ga na' röö guí'ado' na' nazí'i le Guí'a Yaga Olivo, ate' yöjhuó'gaquië' Jerusalén. Guí'ado' ni dë gála'sö ga dë Jerusalén, tsca nazí'gaquië' lataj ta'zé'ë dza lá'ayi quégaquië'. ¹³ Cate' bulu'dxinë' yödzö ni', gula'benë' ga naca buropi cuía lu yu'u, ga ni' ta'cu'ë Pedro, en Jacobo, en Juan, en Andrés, en Felipe en Tomás, en Bartolomé, en Mateo, en Jacobo, zxí'inë' Alfeo, en Simón, bönni' na' ruí'i ládxë'ë ladzë', en Judas, bóchë'ë Jacobo. ¹⁴ Yúgu'të bönni' ni tu'lidzë' Dios tsözxón, ate' yugu' bóchë'ë Jesús, en María, xinë'ë Jesús, en ia'zíca'rönu nigula ca' núngaquië' légaquië' tsözxón.

¹⁵ La' dza ná'asö guzuínë' Pedro gatsaj láhui'lö ga nacu'ë böchi' luzá'aru' na' ta'yéajlë'ë Cristo. Gulaca idú ca xópalalaj bönachi nupa nudúbigaca ni'. ¹⁶ Pedro gudxë' légaquië', rnnë':

—Böchi' luzá'ado'. Ben bayudxi guca le nazúaj lu guichi lá'ayi, ca na' gunné' Dios Bö' Lá'ayi dza ni'të, le buzúajë' David lu guichi, ca guca queë' Judas, bönni' na' guchë'ë nupa ni' gula'zón Jesús. ¹⁷ Judas na' gubábalenë' rë'u, en bënlenë' rë'u tsözxón dxin ni. ¹⁸ Gula'zí'inë' tu la' yëla lazxaj que dö' na' bi'ë bönni' ni. Judas ni gubixë', en biröza' lë'ë, ate' bila'rúaj yúgu'të le dzö'ö lë'ë. ¹⁹ Cate' bila'yöni bönachi nacuá' Jerusalén lë ni, gulu'ë le la' yëla na' Acéldama, tu didza' hebreo le rnna lu didza' xidza': La' Yëla Rön. ²⁰ Caní guca queë' Judas, ca na' nazúaj lu guichi lá'ayi nazí'i le Salmos, le rnna:

Ugá'ana cá'asö lidxë',
en biti' idzöli nu soa yu'u na'.

Rnna ca':

Nu yúbölö tsaza xilatjè'.

^{21,22} Run bayudxi na'a cöru'-në' tu bönni' gunë' rë'u tsözxón para gunë' ba nalí queë' Jesús, ca guca, bubanë' lu yöl-la' guti. Ral-la' gáquië' bönni' nabábalenë' bönni' ni' gula'cuá'lenë' rë'u dza ni'te cate' ni' Xanru' Jesús gudálenë' rë'u. Gula'sí lógaquië' nacuá'lenë' rë'u cate' ni' buquilë' Juan bönachi nisa, ga bidxintë dza buëpë' Jesús yehua' yubá, cate' buzë'ë ga zóaru'.

²³ Ní'irö bulu'lu'ë chopë', José, en Matías. José na' lë' ca' Barsabás, en zoa ia'tú lë' Justo. ²⁴ Ní'irö bulu'lidzë' Dios, ta'nnë':

—Xantu' Dios, nunbë' cazu' icja ládxí'do'gaca yúgu'të bönachi. Buluí'i netu' nulë' chopë' ni chiguró cazu' Li' ²⁵ para tsázië' lu dxin ni para gáquië' gubáz quiu'. Tsázië' xilatjè' Judas, bönni' ni' bunítië' xilatjè' tu' benë' dul-la', ate' guyijë' xilataj cazë' lataj chul-la.

²⁶ Ní'irö bulu'zúajë' yugu' lu guichi lágaquië', tu queë' José, en ia'tú queë' Matías. Bulu'gútsi'në' luzë'eguequi, en bulu'béajë' tu, ate' birúaj le nazúaj lë' Matías. Caní guca, Matías na' gubábalenë' ia'chinéajë' gubáz queë' Cristo.

Dios Bö' Lá'ayi ridisóalenë' légaquië'

2 ¹ Cate' chibidxín dza Pentecostés, nudúbigaquië' tsözxón yúgu'të bönni' ta'yéajlë'ë Cristo. ² Tsárido'os biyón bö le birúaj lúzxiba, le biyón ca riyón cate' recja bö' budunu', ate' biyón idútë lu yu'u ga na' ró'ögaquië'. ³ Bulu'luí'i lahui yugu' bululu guí'do' lu bö'ös lógaquië', ate' gula'guísi que queégaquië'. Bidisóalengaca tu tuë'. ⁴ Caní guca, Dios Bö' Lá'ayi bidisóalenë' yúgu'të', ate' gula'sí lógaquië' tu'ë didza' yúbölö, tsca naca le bë'ë Dios Bö' Lá'ayi que queë' gu'ë didza' yúbölö na'.

⁵ Nacu'ë zían bönni' judío yödzö Jerusalén dza na', nácagaquië' bönni' ta'yéaj ládxi'gaquië' Dios, en zá'gaquië' narúajgaquië' yúgu'të yödzö idútë yödzölió ni. ⁶ Cate' bila'yönnë' bö na', bulu'dubë' bönni' zían, ate' gula'bó'ë böniga, tu' bila'yönnë', ca naca xtídza'gaquië' que queégaquië', tu'ë didza' bönni' na' ta'yéajlë'ë Cristo. ⁷ Gula'ná' badxë' yúgu'të', en bulu'báninë, ta'nnë':

—Buli'yútsöca'. ¿Naru' calëga bönni' Galilea yúgu'të bönni' ni tu'ë didza'? ⁸ ¿Nacxi caz naca riyóniru' tu'ë xtídza'ru' ca naca didza' ruí'iru' tu turu'? ⁹ Rë'u ni nácaru' bönni' zían yödzö, bönni' narúajgaquië'

luyú Partia, en luyú Media, en luyú Elam,
en luyú Mesopotamia, en luyú Judea, en luyú Capadocia,
en luyú Ponto, en luyú Asia,

¹⁰ en luyú Frigia, en luyú Panfilia, en luyú Egipto,
en luyú Africa, ga nácarö zi'tu' ga dë luyú Cirene.

'Lësca' nacu'ë bönni' yödzö Roma ni. Bal-lë' nácagaquië' bönni' judío, en ia'bal-lë' nazí' lu ná'agaquië' le ta'yéajlë'ë bönni' judío Dios. ¹¹ Lësca' nacu'ë ni yugu' bönni' narúajgaquië' Creta, en luyú Arabia. Riyóniru' tu'ë didza' ruí'iru' que queéru', ate' ta'guíxjö'ë yugu' le zxön benë' Dios, le tun ga rubániru'.

¹² Caní guca, bulu'báninë yúgu'të', en gula'bó'ë böniga. Gulé luzá'agaquië' tuë' ia'túë', ta'nnë':

—¿Bizxi caz lë ni?

¹³ Bulu'titjë' bal-lë', ta'nnë':

—iTa'zúdxinë'!

Libán benë' Pedro lógaca bönachi zían

¹⁴ Ní'irö Pedro guzuílenë' ia'chinéajë' gubáz na' nasól-lë'ë Cristo, ate' gusí lahuë' ru'ë zidzaj didza', rë' légaquië':

—iLibí'ili', bönni' Judea, en yúgu'tëli' nacuá'ali' yödzö Jerusalén! iLë ni ral-la' inózili'! iBuli'zé nágali' le guía' libí'ili'! ¹⁵ Netu' ni biti' rizúdxitu' ca na' réquili' libí'ili', tu' ni zóaru' si' gala' xsila, ate' cuntu nu rizudxi hora caní. ¹⁶ Lë ni naca le gunné' Joel, bönni' bë'ë didza' uláz queë' Dios, gunné':

¹⁷ Caní rnnë' Dios: Lë ni le gaca dza tsöjsétëgaca.

Isól-la'a Bö' Lá'ayi quia', tsöjsóalenë' yúgu'të bönachi.
 Zxí'inili', bönni', en nigula, iluí'ibi' didza' uláz quia' neda'.
 Yugu' bi'i ra'bán ila'lé'ebi' le ulu'a lahui,
 ate' yugu' bönni' gula ila'nenë' yëla.

¹⁸ Cate' idxín dza ni' quisia' Bö' Lá'ayi quia',
 tsöjsóalenë' huen dxin quia', bönni', en nigula,
 ate' ilu'ë didza' uláz quia' neda'.

¹⁹ Ulu'a lahui lúzxiba xitsá' le ilún ga ulu'bani bönachi,
 ate' yödzölió ulu'a lahui le ilaca bë',
 rön, en guí', en dzön ca böaj.

²⁰ Ichul-la gubidza, ate' gaca beo' xiná ca naca rön.
 Caní gaca cate' idxín dza ni' chibulu'ë Dios.
 Gaca dza ni' le catu caz rilé'eru'.

²¹ Ulu'lágaca yúgu'të nupa ni' ulu'lidza Lë' Xanru',
 lu yöl-la' réajlë' quéguequi Lë'.

²² 'Buli'zé nágalí' lë ni guía' libí'ili', bönachi Israel. Dios caz benë' bal
 Jesús, bönni' Nazaret ga zóali'. Dios bë'ë Lë' lataj benë' le tun ga
 rubániru', yugu' yöl-la' huáca, en le taca bë'. Yúgu'të lë na' benë' Dios
 lu në'ë Jesús, ca na' chinóz quézili'. ²³ Lësca' caní, Dios bë'ë lataj nu
 budödi Jesús lu ná'ali'. Caní guca, ca na' chigunná ládxë'ë Dios gunë',
 en ca naca le chibucözë' dza ni'te. Libí'i cázali' guzxönli'-në' Jesús, en
 bëtili'-në' lu ná'agaquië' yugu' bönni' tuá' dö', bönni' gulútië' Lë' cate'
 ni' bulu'dá'gaquië' Lë' lë'e yaga cruz. ²⁴ Ní'irö Dios caz busubanë' Jesús
 na'. Bubéajë' Lë' lu yöl-la' guti, tu' cabí guca ugá'anë' tsaz lu yöl-la' guti
 na'. ²⁵ Ca naca lë ni, bë'ë didza' David uláz queë' Dios ca naca queë'
 Jesús, gunné':

Bilé'etiqui'sida'-në' Xanru', zoë' lahua'.
 Lë' zoë' cuita lë'a ibëla, rizönë' neda',
 para cabí gaca nu bi gun quia'.

²⁶ Que lë ni na' budzeja ládxa'a,
 ate' lu yöl-la' rudzeja quia' bil-la'.
 Que lë ni na' guna' löza Lë'
 cate' idxín dza gátia'.

²⁷ Xantu' Dios, nözda' biti' ucá'anú' neda'
 lataj chul-la ga nacuá' nupa nátigaca.
 Biti' gu'u lataj initi idútë le naca'.
 Naca' bönni' nadxí'i quézinu' Li'.

²⁸ Buzéajni'inu' neda' ca ral-la' guna'
 para idéli'da' yöl-la' na'bán idú.
 Gunu' ga udzējada' tu' zóalen cazu' neda'.

²⁹ 'Na'a, libí'ili', bócha'a. Naca bë' gútië' xuz xtó'oru' David, en
 bigáchë'ë yeru ba, ate' ba queë' na' dë ga zóaru' ga ridxintë na'a dza.

³⁰ David na' bë'ë didza' uláz queë' Dios, en gunózinë' benë' tsutsu Dios

didza' le guzxí' lu në'ë queë', gunë' ga galjë' Cristo ladaj di'a dza queë' si' zá'gaca, ate' Cristo na' inná bë'ë xilatjë' David na'. ³¹ Tu' bilé'enë' David lë ni zí'alö, bë'ë didza' ca guca, bubanë' Cristo, en ca guca, biti' bugá'anë' lataj chul-la ga nacuá' nupa nátigaca, en biti' guniti le naca cazë'. ³² Dios busubanë' Jesús lu yöl-la' guti, ate' ca guca lë ni yúgu'tëtü' runtu' ba nalí que. ³³ Caní guca, len yöl-la' huáca queë', Dios buchisë' Lë' xitsá' ga ni' nácatërë' zxön. Na'a, Cristo chigusól-lë'ë Dios Bö' Lá'ayi ni, ate' raca ca na' guzxí' lu në'ë Dios gunë' lu në'ë Cristo, ate' Dios Bö' Lá'ayi na' runë' yugu' lë ni rilé'eli', en riyónili'. ³⁴ Biti' buëpë' David na' yehua' yubá, pero lë cazë' David na' gunné':

Xanru' Dios gudxë' Xana':

Gurö'i cuita lë'a ibëla ga naca lo

³⁵ cate' gunra' ga ulu'zechu zxíbigaca nupa ta'dá'baga' Li' lo' Li'.

³⁶ 'Na'a, bönachi Israel, ral-la' inózili' le nácatë. Dios benë' ga náquië' Lë cazë' Jesús ni Xanru', en Bönni' Rusölá, bönni' na' budá'ali'-në' lë'e yaga cruz.

³⁷ Cate' yugu' bönni' ni' bila'yönnë' lë ni, gula'bö'ë böniga, ate' gulë' Pedro, en ia'zíca'rë' bönni' gubáz queë' Cristo, ta'nnë':

—Bóchi'ru', ¿nacxi gúntsatu'?

³⁸ Ní'irö Pedro gudxë' légaquië':

—Buli'bí'i ládxi'li', en guli'dila nisa tu tuli' lu Lë' Jesucristo para uniti lahuë' Dios dul-la' nabága'li', ate' Dios Bö' Lá'ayi idisóalenë' libí'ili', Nu na' isól-lë'ë Dios. ³⁹ Queé'li' nequi le guzxí' lu në'ë Dios, en quégaca zxí'inili', enca' quégaca yúgu'të bönachi izá'a, yúgu'të bönni' ni' ulidzë' Xanru' Dios légaquië'.

⁴⁰ Yugu' didza' ni, en ia'bal-la zían didza' benë' ba nalí Pedro, le guchízië' icja nágagaquië', gunné':

—Guli'gún ga uláli', irúajli' ladjagaca bönachi tuá' dö' nacuá' dza ni zóaru' na'a.

⁴¹ Caní guca, gula'dila nisa nupa ni' gula'zí' lu në'eguequi didza' na' bë'ë Pedro. Dza na' ca chi uruá' gayuá' bönachi gulún légaquië' tuz.

⁴² Gulunë' yúgu'të' idútë le bulu'sédinë' gubáz nasól-lë'ë Cristo légaquië'. Guláquië' tuz tuë' len ia'túë', en gulahuë' tsözxón le rusá' ládxi'ru' ca gútië' Jesús, ate' gulunë' tsözxón, bulu'lidzë' Dios.

Ca tun bönachi queë' Cristo

⁴³ Gulunë' gubáz queë' Cristo zían le run ga rubániru', en zían le taca bë', pero guladxi gula'dzöbi ia'zíca'rö bönachi. ⁴⁴ Yúgu'të nupa na' ta'yéajlë' Cristo gulaca tuz, ate' bulu'ún tuz yúgu'të le dë quéguequi.

⁴⁵ Cate' bila'lé'enë' ta'yadzaj nupa nútsa'gaca ladjagaquië', ní'irö yugu' bönni' bi dë quégaquië' gulúti'ë le, ate' gula'guísië' dumí na' que queégaca nupa ni' bi ta'yadzaj. ⁴⁶ Bulu'dübë' tsözxón chila yudo' yugu' dza, ate' gulahuë' le rusá' ládxi'ru' ca gútië' Xanru'. Caní gulunë' gapa

naca lu yu'u lídxigaquië'. Gulahuë' tsözxón, ate' bulu'dzéjanë', en gulaca idú ládxigaquië'. ⁴⁷ Gula'gu'ë Dios yöl-la' ba, ate' yúgu'të bönachi gulún légaquië' bal. Buzanë' Xanru' nupa tu'dubi queë', nupa na' tu'lá tu tu dza.

Ruhuöáquië' tu bönni' biti' raca së'ë

3 ¹ Tu dza ni' gula'benë' Pedro, en Juan, sōjáquië' tsözxón lu chila yudo', cate' tu'dubi bönachi tu'lidza Dios ni', le naca idú ridödi xihuó. ² Ga ni' ta'dödë' zoë' tu bönni' biti' raca së'ë dza ni'te ni' náquië' bí'ido'. Yugu' dza röjuá'gaquië' lë' ni', en ta'bëquië' lë' ra' yudo' ga nazí'i le Ra' Yu'u Lachi, para inábinë' nu bi unódzjasö queë' ladaj nupa ni' ta'yaza lö'a yudo'. ³ Bönni' ni, cate' bilé'enë' Pedro, en Juan, sōjáquië' ta'yázië' lö'a yudo', gúta'yuë' lógaquië' bi ulu'nódzjasë' queë'. ⁴ Ní'irö bulu'yúë' Pedro, en Juan lë', ate' Pedro gudxë' lë':

—Buyú netu'.

⁵ Ní'irö bönni' na' buzëda' náguië' légaquië' tu' runë' löza bi ulu'nódzjasë' queë'. ⁶ Pedro gudxë' lë':

—Biti' dë dumí plata, dumí oro quia', pero le dësö quia' gunna' quiu'. Ni'a que yöl-la' huáca que Lë' Jesucristo, bönni' Nazaret, guyasa, en guzë'e.

⁷ Ní'irö gudélë'ë Pedro në'ë ibëla bönni' huë' na', en buchisë' lë', ate' la' böacaté ni'ë, en buguitaj bëchaj ni'ë bönni' na'. ⁸ Ní'irö guzuínë' bönni' na', ate' guxíti'ë, en guzë'ë. Guyázalenë' tsözxón Pedro, en Juan, lö'a yudo', rizë'e ni'ë, en rixíti'ë, en rigu'ë Dios yöl-la' ba. ⁹ Yúgu'të bönachi nacuá' ni' ta'lé'e lë' rizë'e ni'ë, en rigu'ë Dios yöl-la' ba. ¹⁰ Caní guca, guládxinë', en bulu'bánninë ca naca lë na' guca, tu' bulu'únbë'ë lë', náquië' bönni' na' ribö'ë ra' yudo' ga nazí'i le Ra' Yu'u Lachi, rinabë' nu bi unódzjasö queë'.

Didza' bë'ë Pedro chila yudo'

¹¹ Tsanni ni' bönni' na' biti' guca së'ë, ate' böáquië', zönë' ná'agaquië' Pedro, en Juan, bulu'dubi yúgu'të bönachi ga na' nacu'ë chila yudo' nazí'i le: Chila Queë' Salomón, ate' gula'ná' badxë'. ¹² Cate' bilé'enë' Pedro lë ni, gudxë' bönachi na':

—Libi'ili', bönni' Israel, ¿bizx que rubánili' ca naca lë ni? ¿Bizx que ruyuli' netu', en réquitseli' nētu'sö buntu'-në' bönni' ni, en bentu' ga rizë'e ni'ë len yöl-la' huáca queéztu', o ni'a que le reaj ládxitu'-në' Dios? ¹³ Naca lë ni le benë' Dios. Náquië' Dios quégaquië' xuz gudödi queéru' Abraham, en Isaac, en Jacob. Lë cazë' bëntërë' bal Jesús, Zxí'inë'. Jesús ni, libí'i cázali' bëtili'-në' lu ná'agaquië' bönni' ta'nná bë'enë' libí'ili'. Cate' gú'unnë' Pilato usanë' Jesús, gudá'baga'li'-në'.

¹⁴ Buzóali' tsölá'alö Bönni' Tsahui', en Lá'ayi, ate' gunábili'-në' Pilato usanë' queéli' tu bönni' rútië' bönachi. ¹⁵ Caní guca, bëtili'-në' Bönni'

runna cazë' yöl-la' na'bán idú queëru'. Ní'irö Dios busubanë' Lë' lu yöl-la' guti, ate' ca naca lë ni runtu' ba nalí que. ¹⁶ Tu' guyéajlë'ë bönni' ni Jesús, böáca ni'ë. Rilé'eli'-në', en núnbë'ëli'-në'. Tu' réajlë'ë Jesús, Lë' bunë' dxí'ado' bönni' ni, ate' rilé'eli' yúgu'tëli' le nácatë na'.

¹⁷ Na'a, böcha'a, nözda' benli' caní, bétili'-në' Jesús tu' cabí guyéajni'ili', en bití' gula'yéajni'inë' bönni' ta'nná bé'enë' libí'ili'. ¹⁸ Caní busudxinë' Dios didza' na' bë'ë zí'alö, le gula'nné' bönni' gulu'ë didza' uláz queë' ca ral-la' qui'i sáquë'ë Cristo. ¹⁹ Que lë ni na', buli'bí'i ládxi'li', en buli'huóaca queë' Dios, para ugüë' dul-la' nabága'li', en gunë' ga huóaca ládxi'li'. ²⁰ Ní'irö isól-lë'ë leyúbölö Jesús, Bönni' na' buzóë' dza ni'te para gáquië' Cristo, Bönni' Rö queë', Bönni' na' inná bé'enë' libí'ili'. ²¹ Na'a, run bayudxi ugá'anë' yehua' yubá ni' cate' idxinrö dza uduhuénë' tsahui' yúgu'të le raca, en gaca ca na' chigunná cazë' Dios, lë na' gula'nné' bönni' gulu'ë didza' uláz queë', bönni' ni' gula'cu'ë dza ni'te. ²² Lësca' caní Moisés gudxë' xuz xtó'oru', gunné': "Xanru' Dios isól-lë'ë queéli' tu bönni' galjë' ladjagaca di'a dza queéli'. Gáquië' bönni' gu'ë didza' uláz queë' Dios. Isól-lë'ë Lë' queéli' ca na' gusól-lë'ë neda'. Run bayudxi uzé' nágali'-në' ca naca yúgu'të le guíë' libí'ili'. ²³ Yúgu'të nupa bití' ulu'zë' nágagaca bönni' ni' gu'ë didza' uláz queë' Dios ila'niti, en ulu'lá'alén bönachi queë' Dios."

²⁴ Ca naca dza ni zóaru' na'a, gula'guíxjö'ë yúgu'të bönni' gulu'ë didza' uláz queë' Dios ga gudéla'të zoë' Samuel, en gudödi ni'. ²⁵ Libí'ili' nácali' zxí'ini xi'sóagaquië' bönni' gulu'ë didza' uláz queë' Dios, ate' nequi queéli' didza' rucá'ana tsahui', le bénlenë' Dios xuz xtó'oru', cate' ni' gudxë' Abraham: "Ni'a que le gunë' zxí'ini xi'sú' ilaca bica' ba yúgu'të bönachi yödzölió." ²⁶ Cate' Dios busubanë' Zxí'inë' lu yöl-la' guti, gusól-lë'ë Lë' zí'alö queéli' para gunë' ga gácali' bica' ba, en ucá'anali' le cabí naca dxi'a runli'.

Ta'dxinë' Pedro, en Juan lógaquië' bönni' yudo' tu'chi'a tu'söröë'

4 ¹ Tsanni ni' bönachi na' tuí'ilenë' Pedro, en Juan, didza', yugu' bixúz judío, en yugu' bönni' yudo' saduceo, en bönni' ta'nná bé'enë' ni'a ná'agaquië' bönni' yudo', bila'dxinë' tsálido'os ga na' nacu'ë. ² Gula'lenë' bönni' ni tu' tu'sédinë' Pedro, en Juan, bönachi, en tē' léguequi ulu'bán nupa chinátigaca tu' bubanë' Jesús. ³ Ní'irö gula'zönë' Pedro, en Juan, ate' gula'gu'ë légaquië' lidxi guíë ga idxinrö dza yúbölö tu' chiridzó' dza na'. ⁴ Zían nupa ni' bila'yöni didza' gulu'ë Pedro, en Juan, gula'yéajlë' Cristo. Na'a, yugu' bönni' biguiú'sö ta'yéajlë'ë Cristo nácaagaquië' idú chi-un gáyu'ë.

⁵ Dza buropi ni', yugu' bönni' unná bë', en bönni' gula tu'zéajni'inë' bönachi judío, en yugu' bönni' yudo' usëdi, bulu'dubë' lu yödzö Jerusalén. ⁶ Lësca' Anás, bixúz lo, en Caifás, en Juan, en Alejandro, enca' yúgu'të bönni' di'a dza quégaquië' bixúz lo bulu'dubë' ni'. ⁷ Ní'irö

duché'gaquië' Pedro, en Juan, ate' bulu'sudxinë' légaquië' gatsaj láhui'lö ga na' nacu'ë, en gula'nábinë' légaquië', ta'nnë':

—¿Bizxi yöl-la' unná bë' dë lu ná'ali' runli' lë ni? ¿Nuzxi budödi lu ná'ali' yöl-la' unná bë' ni?

⁸ Ní'irö Pedro gudxë' légaquië', zóalenë' Dios Bö' Lá'ayi lë', rnnë':

—Libí'ili', núlöli' rinná bé'eli' netu', bönachi Israel, en libí'ili', bönni' gula. ⁹ Na'a, ¿rinábitseli' netu' ca naca dxin dxi'a bentu' queë' bönni' huë' ni, en nacxi guca, böáquië' bönni' ni? ¹⁰ Riguíxjöi'itu' libí'ili' para ila'nözi yúgu'të bönachi Israel. Zoë' bönni' ni loli', nuhuöáquië' tu' ben dxin yöl-la' huáca queë' Jesucristo, bönni' Nazaret, Bönni' ni' budá'ali'-në' lë'e yaga cruz, pero Dios busubanë' Lë' lu yöl-la' guti. ¹¹ Dios bë'ë didza' ca naca queë' Jesús ni, cate' ni' gunné': "Libí'ili', bönni' rucuá'ali' zö'ö, gurú'unali' guiój na', pero guró caza' neda' guiój na' para gaca guiójlen zö'ö." ¹² Cúnturö nu zoa nu gaca usölá bönachi, tu' cabí zoa yödzölió ni ia'tué' bönni' nuzöë' Dios, nu gaca usölá rë'u.

¹³ Cate' bila'lé'enë' nácagaquië' rugu ladxi' Pedro, en guléquibe'enë' biti' nazédagaquië' que yudo', en nácagaquië' bönni' cá'asö, bulu'bábinë', ate' yöjnéguequinë' Pedro, en Juan na', gula'cuá'lenë' Jesús. ¹⁴ Lësca' bila'lé'enë' bönni' na' böáquië', zuínë' lógaquië', ate' biti' guca bi ila'nnë' quégaquië'. ¹⁵ Ní'irö gula'nná bé'enë' nupa ulu'béaj légaquië' ló'alö yu'u ga na' nudúbigaquië', ate' gulún xtidzë'ë la' légacasë'. ¹⁶ Gula'nnë':

—¿Nacxi gúntsaru' quégaquië' bönni' ni? Le nácate gulunë' tu le run ga tu'bani bönachi, ate' nózigaca yúgu'të bönachi nacué' Jerusalén lë ni. Biti' gaca tá'baga'ru' le. ¹⁷ Na'a, para cabí sërö didza', en ila'yöni zíanrö ca' bönachi, uzeru' bach légaquië' para cabí iluí'ilenrë' bönachi didza' ca naca queë' Jesús na'.

¹⁸ Ní'irö bulu'lidzë' Pedro, en Juan, ate' bulu'zenë' bach légaquië' para cabí iluí'ilenrë' bönachi didza', en para cabí ulu'sédinë' légaquië' ca naca queë' Jesús. ¹⁹ Ní'irö bulu'bi'ë didza' Pedro, en Juan. Gulé' légaquië':

—Buli'chi'a buli'sörö libí'ili' channö naca tsahui' lahuë' Dios uzërö nágatu' xtídza'li' libí'ili' ca xtidzë'ë Dios. ²⁰ ¡Biti' gaca soa dxitu'! ¡Run bayudxi güí'itu' didza' que le bilé'etu', en le biyónitu'!

²¹ Ní'irö yugu' bönni' yudo' tu'chi'a tu'söröë' bulu'zenë' bach légaquië', pero bulu'sanë' légaquië' tu' cabí gula'dzölinë' nacxi ilunë' légaquië' xíguia'. Caní gulunë' tu' guládxinë' le ilún bönachi lu yödzö ni', tu' ta'gú'u Dios yöl-la' ba ni'a que lë na' guca. ²² Bönni' na' böáquië', en guca queë' lë na' run ga rubániru', chiyú'urë' ca choá' iz.

Ta'nábinë' Dios gunë' ga ilácagaquië' rugu ladxi'

²³ Cate' bönni' yudo' bulu'sanë' Pedro, en Juan, bóajgaquië' ga na' nacu'ë luzá'agaquië', ate' bulu'siyönnë' légaquië' yúgu'të lë na'

gula'nné' yugu' bixúz unná bë', en bönni' gula tu'zéajni'iné' bönachi judío. ²⁴ Cate' bila'yönné' læ ni, bulu'lidzë' Dios tsözxön, gula'nné':

—Xantu' Dios, izxöntërö nacu' Li'! iLi' nacu' Dios! iBenu' lúzxiba! iBenu' luyú! iBenu' nísado'! iBenu' yúgu'të le nacuá' tu tu lataj na'! ²⁵ Uláz quiu' Li' bë'ë didza' David, bönni' huen dxin quiu', ni' zóalenë' Dios Bö' Lá'ayi læ', gunné':

¿Bizx que tun dzatsa bönachi,
en ta'zá' ládxi'gaca le ruá' dö'?

²⁶ Yugu' bönni' ta'nná bë'ë yödzölió ni gulún dzatsë',
ate' guláquië' tuz bönni' unná bë'.

Gula'dá'báguë'ë Xanru' Dios,
enca' Cristo, bönni' guró cazë' Lë'.

²⁷ Le nácatë guláquië' tuz Herodes, en Poncio Pilato, en yugu' bönni' izá'a, en yugu' bönni' Israel lu yödzö ni. Gula'dá'báguë'ë Jesús, Zxí'inu' lá'ayi, Bönni' na' buzú' queétu'. ²⁸ Gulunë' yúgu'të le bucözu' zí'atëlö, en guzxí' lu no'o, ate' guca ca na' benu' tsutsu xtídz'u ca ral-la' gaca.

²⁹ Na'a, Xantu', buyú le tu'zenë' bach netu', en ben ga gácatu' rugu ladxi', para güí'itu' xtídz'u, netu' bönni' huen dxin quiu'. ³⁰ Ben ga gaca úngacatu' nupa te'e, tu' sóalen yöl-la' huáca quiu' netu', en ben ga gaca gúngacatu' le ilún ga ubánitu', en le ilaca bë'. Gaca caní tu' zóalenë' Jesús, Zxí'inu' lá'ayi, netu'. iCa' gaca!

³¹ Cate' budxi bulu'lidzë' Dios, guzxizi lataj ga na' nacu'ë, ate' Dios Bö' Lá'ayi guzóalenë' yúgu'të', ate' len yöl-la' rugu ladxi' quégaquië' gulu'ë xtídzë'ë Dios.

Tu'únë' tuz le dë quégaquië'

³² Bönachi zían na' ta'yéajlë' Cristo, tuz ca ta'zá' ládxi'guequi, en tuz ca gulúngaca. Biti' gunné' nu bönni' núsë'ë ladjagaquië' nequi queéze' le dë queë', pero bulu'únë' tuz le dë quégaquië'. ³³ Len yöl-la' huáca zxön gula'guíxjö'ë gubáz na' nasól-lë'ë Xanru' Jesús ca bubanë' Lë', ate' le buzá' ládxi'ë Dios quégaquië' gúcalen yúgu'të'. ³⁴ Cuntu nu bi biyadzaj nu nutsa' ladjagaquië'. Caní guca tu' yúgu'të bönni' zoa bi dë quégaquië', xiyúgaquië', o lídxigaquië', gulúti'ë le, ate' dumí que na' yöjuá'gaquië', ³⁵ en bulu'dödë' le lu ná'agaquië' gubáz na' nasól-lë'ë Cristo, ate' légaquië' gula'guísië' le que queégaca nupa bi biyadzaj quéguequi. ³⁶ Zoë' José ni', bönni' bulu'zóë' gubáz na' nasól-lë'ë Cristo ia'tú læ' Bernabé, le rnna lu didza' xidza', Bönni' Ruhué Tsáhuë'ë. Nabábalenë' zxí'ini xi'sóë' Leví, en guljë' luyú Chipre. ³⁷ Béti'ë bönni' ni tu cö' xiyúë', ate' yöju'ë dumí que na', en budödë' le lu ná'agaquië' gubáz na' nasól-lë'ë Cristo.

Dul-la' gulunë' Ananías, en Safira

5 ¹ Tu bönni' yúbölö lë' Ananías, bëti'ë tu cö' xiyúë'. Safira, nigula queë', bennu tsözxön lë'. ² Ananías na' bucachi' lanë' late' dumí que yu na', ate' nózinu ca' nigula queë'. Le bugá'anasö yöju'ë, en gulu'ë le lu ná'agaquië' gubáz nasól-lë'ë Cristo. Rnnë':

—Tsca nisö guzxi'a.

³ Pedro gudxë' lë':

—Ananías, ¿naru' guyázatsö Satanás tu' xihui' lu icja ládxi'do'o, en ben ga rizí' yé'enu' Dios Bö' Lá'ayi, ate' bucachi' lanu' late' dumí que xiyú' na'? ⁴ Tsanni ni' nagá'ana yu na' lu no'o, ¿naru' cabí nequi quez quiu'? Gudödi bëti'u le, ¿naru' cabí dë caz lu no'o dumí que na'? ¿Bizx que guró'ö icju' gunu' caní? Dios caz guzxi' yé'enu', calégasö bönachi.

^{5,6} Cate' biyönnë' Ananías didza' ni, gudzö'ë, en gútité'. Ní'irö gula'bíga'tëbi' bi'i ra'bán, ate' bulu'chólibi' lë' lari', en guluá'abi' lë', en yöjcáchi'gacabi' lë'. Guladxi gula'dzöbi yúgu'të nupa ni' bila'yöni ca guca lë ni.

⁷ Ca tsonna hora gudödi ni', bidxinnu nigula queë' Ananías na' ni', en biti' nózinu lë na' guca queë' bönni' queénu. ⁸ Ní'irö Pedro gudxë'-nu:

—Gudíxjöi'i neda'. ¿Naru' guzxi'ili' tsca nisö xiyuli' na'?

Gunnánu:

—Ön, tsca nisö guzxi'itu'.

⁹ Ní'irö Pedro gudxë'-nu:

—¿Bizx que ben tuz xtídza'li' guzxi' bë' xíhui'li' Dios Bö' Lá'ayi? Buyútsöca'. Chizóa ulu'dxinbi' yugu' bi'i bulu'cáchi'bi'-në' bönni' quiu', ate' ulu'béajbi' ca' li'.

¹⁰ Ní'irö la' gudzö'tënu xini'ë Pedro, en gútiténu. Cate' gula'yázabi' bi'i ra'bán na', gula'lé'ebi'-nu chinátinu. Ní'irö bulu'béajbi'-nu, en yöjcáchi'gacabi'-nu cuita lë'ë bönni' queénu. ¹¹ Que lë ni na' guladxi gula'dzöbi yúgu'të bönachi queë' Dios, ate' guladxi ca' yúgu'të nupa bila'yöni ca guca lë ni.

Tunë' bönni' gubáz nasól-lë'ë Cristo le taca bë'

¹² Gulunë' bönni' gubáz na' nasól-lë'ë Cristo zían le taca bë', en zían yöl-la' huáca zxön lógaca bönachi lu yödzö. Yúgu'të' bulu'dubë' tsözxön ga naca chila yudo' nazí'i le Chila Queë' Salomón. ¹³ Ladaj nupa ni' biti' ta'yéajlë' Cristo, cuntu nu burugui tsöjtá' légaquië', ate' bönachi lu yödzö ni' gulún légaquië' bal. ¹⁴ Ní'irö ia'bal-la bönachi zían ca' gula'yéajlë' Cristo, bönni', en nigula. ¹⁵ Cate' bila'lé'e bönachi yugu' le tunë' bönni' ni' ta'yéajlë'ë Cristo, yöjuá'agaca nupa te'e gapa naca la' nöza, ate' gula'xóë' léguequi lu da'a yaga, en ia'bal-la lu dá'asö, para cate' tödë' ni' Pedro, tsa zxúl-lasö queë' cu'u zxul-la bal-la bönachi huë' na', para ulu'huóaca. ¹⁶ Lësca' bila'ruáj bönachi yugu' dzaga yödzö, en

bila'dxín Jerusalén, nu'agaca nupa te'e, en nupa ta'guí'i ta'zaca' tu' yú'ugaca bö' xihui' léguequi, ate' bulu'huóaca yúgu'tèguequi.

Bönni' yudo' ta'bía ládxi'gaquië' bönni' gubáz nasól-lë'ë Cristo

¹⁷ Que lë ni na' bixúz lo, en bönni' yudo' saduceo na' dá'gaquië' bixúz lo, bulu'zxé'enë' Pedro. ¹⁸ Ní'irö bixúz lo na', en bönni' na' dá'gaquië' lë' gula'zönë' gubáz na' nasól-lë'ë Cristo, ate' gula'gu'ë légaquië' lidxi guíë. ¹⁹ Ní'irö bidxinë' gubáz lá'ayi queë' Xanru' chi'i dzó'ölö, ate' gusaljë' lidxi guíë na', en bubéajë' légaquië'. ²⁰ Gubáz lá'ayi na' gudxë' légaquië', rnnë':

—Guli'tséaj, guli'tsöjsóa chila yudo', en guli'tsöjë'len bönachi ni' didza', quíxjöi'ili' légaquië' ca naca yöl-la' na'bán idú ni, en ca gaca ila'déli'në' le.

²¹ Cate' bila'yönnë' didza' ni ru'ë gubáz lá'ayi na', gula'yázië' chila yudo' cate' za' rení' zílado', en bulu'sédinë' bönachi.

La' ní'isö bulu'dubë' bixúz lo, en nupa nacuá'len lë' tsözxón, len bönni' yudo' tu'chi'a tu'söröë', en bönni' gula tu'zéajni'inë' bönachi Israel, ate' gula'sól-lë'ë nupa tsöjaca lidxi guíë para tsöjxí'gaquië' yugu' gubáz na' nasól-lë'ë Cristo, tu' téquinë' ni' nacu'ë lidxi guíë na'. ²² Cate' ni'a ná'agaquië' bönni' yudo' na' bila'dxinë' ni', biti' yöjxáca'gaquië' légaquië' lu yu'u lidxi guíë na', ate' ní'irö bulu'huóajë' tsöjtíxjö'gaquië' ca'. ²³ Gulé' bönni' yudo' tu'chi'a tu'söröë' na', ta'nnë':

—Le nácatë yöjxáca'tu' nayáyajtë lidxi guíë, ate' nacuá' nupa tun chi'i ra' lidxi guíë na', pero cate' gusalajtu', cuntú nu yöjxáca'tu' lu yu'u na'.

²⁴ Cate' bixúz lo, en yugu' bixúz unná bë', en bönni' nacuá' lu në'ë ni'a ná'agaca bönachi yudo', bila'yönnë' didza' ni, gula'bó'dë'ë böniga tu' cabí nóziguequinë' bizxi guntë lë na' raca. ²⁵ Ní'irö bidxinë' tu bönni' ni', en gudíxjöi'inë' légaquië', rnnë':

—Buli'yútsöca'. Yugu' bönni' na' gulú'ugacali'-në' lidxi guíë nacu'ë chila yudo' tu'sédinë' bönachi.

²⁶ Ní'irö guyjë' bönni' na' rinná bé'enë' ni'a ná'agaca bönachi yudo', dzágagaquië' lë' ni'a ná'agaquië' na', ate' gula'ché'ë yugu' gubáz na' nasól-lë'ë Cristo, pero biti' bi gulunë' quégaquië', tu' guládxinë' ulu'ladxi' bönachi nacuá' ni' légaquië' guió. ²⁷ Cate' chinaché'gaquië' yugu' gubáz na', bulu'sudxinë' légaquië' lógaquië' bönni' yudo' tu'chi'a tu'söröë' na', ate' bixúz lo gunábinë' légaquië', rnnë':

²⁸ —¿Naru' cabí gúdxida'atu' libí'ili' biti' usédili' bönachi ca naca queë' bönni' na'? Na'a, chigudísili' xibá ni idútë yödzö Jerusalén, en ré'ënili' usubága'li' netu' xíguia' tu' nözi yöl-la' guti queë' bönni' na'.

²⁹ Ní'irö bulu'bi'ë didza' Pedro, en ia'zíca'rë' gubáz na' nasól-lë'ë Cristo, ta'nnë':

—Run bayudxi uzërö nágatu' xtídzë'ë Dios ca xtídza'gaca bönachi.

³⁰ Libí'ili' bétili'-në' Jesús cate' ni' budá'ali'-në' lë'e yaga cruz, pero Dios

quégaquië' xuz xtó'oru' busubanë' Lë'. ³¹ Jesús ni, Dios buzóa cazë' Lë' ga nayépisëtërë' cuita lë'ë ibëla, para gáquië' Bönni' Lo, en Bönni' Rusölá, en gunë' ga ulu'bí'i ládxi'gaca bönachi Israel, para gaca uniti lahuë' dul-la' nabága'gaquië'. ³² Ca naca lë ni, runtu' netu' ba nalí que, ate' lësca' runë' Dios Bö' Lá'ayi ba nalí que, Bö' na' risól-lë'ë Dios quégaca nupa tun ca rna xtídzë'ë.

³³ Cate' bila'yönnë' bönni' yudo' tu'chi'a tu'söróë' na' lë ni, gula'lenë', en gulë'ënnë' ilútië' légaquië'. ³⁴ Ní'irö guzuínë' tu bönni' yudo' ruchi'a rusöróë' lógaquië', lë' Gamaliel, tu bönni' yudo' fariseo. Racadë'ë bönni' ni xibá queë' Moisés, ate' yúgu'të bönachi tun lë' bal. Gudxë' nupa na' ulu'béaj yugu' gubáz na' nasól-lë'ë Cristo ló'alö tu chí'ido'. ³⁵ Ní'irö gudxë' bönni' yudo' tu'chi'a tu'söróë' na', gunné':

—Libi'ili', bönni' Israel, buli'yutëz queé'li' ca naca le ré'ënili' gunli' quégaquië' bönni' ni. ³⁶ Ral-la' tsöjnéli' ca guca zí'atëlö cate' si' idxín dza ni zóaru' na'a. Birúajë' Teudas, ate' ben cuinë' ca tu bönni' nayépisëtërë'. Guláquië' bönni' yójtá'gaquië' lë' idú tapa gáyu'ë bönni'. Yugu' bönni' rójáquië' gudil-la gulútië' lë', ate' gulásilasi yúgu'të nupa ni' yójtá'gaca lë', ate' gunítisö ca' yúgu'të le benë' bönni' na'. ³⁷ Gudödi guca lë ni, birúajë' ca' Judas, tu bönni' Galilea. Benë' caní cate' ni' gula'yú'u lu guichi bönachi ta'guíxaj lázagaquië', ate' yójtá'gaca bönachi zían lë'. Lësca' gulútië' bönni' ni, ate' gulásilasi yúgu'të nupa ni' yójtá'gaca lë'. ³⁸ Que lë ni na' rea' libí'ili': Guli'sán-gaquië' bönni' ni, en bití' bi gunli' quégaquië'. Channö naca quégacasö bönachi lë ni ta'nnë' o lë ni tunë', initi caz, ³⁹ pero channö naca queë' Dios, bití' gaca usunítili' le. iBuli'yú cuinli' cabí tíl-lalenli'-në' Dios!

⁴⁰ Ní'irö gulunë' tuz didza' len lë'. Bulu'lidzë' yugu' gubáz na' nasól-lë'ë Cristo, ate' gula'guínë' légaquië', en bulu'zenë' légaquië' bach para cabirö iluí'ilenë' bönachi didza' ca naca queë' Jesús. Ní'irö bulu'sanë' légaquië'. ⁴¹ Bila'rúajë' gubáz na' nasól-lë'ë Cristo lógaquië' bönni' yudo' tu'chi'a tu'söróë' na'. Tu'dzéjanë' tu' bë'ë Dios légaquië' lataj gula'guí'i gula'záquë'ë tu' dá'gaquië' Jesús. ⁴² Yugu' dza bulu'séditiqui'sinë' bönachi, en gulunë' libán queë' Jesucristo lu chila yudo', en gapa naca lu yu'u lídxigaca bönachi.

Ta'bóë' gadxi bönni' para ilácalenë' bönachi queë' Cristo

6 ¹ Dza ni', tu' gula'yán bönachi ta'yéajlë' Cristo, yugu' bönni' judío tu'ë didza' griego gula'nnë' quégaquië' bönni' judío tu'ë didza' hebreo tu' nözi le raca cate' ta'guísië' le ilágunu nigula uzëbi, tu' cuntunu ruí'i le ilágunu nigula uzëbi quégaquië' bönni' ni' tu'ë didza' griego. ² Ní'irö idxínnutë' bönni' gubáz na' nasól-lë'ë Cristo bulu'tubë' yúgu'të bönachi ni' ta'yéajlë' Cristo, ate' të' légaquië':

—Bití' naca dxi'a soa dxitu', en cabí guntu' libán que xtídzë'ë Dios, para guntu' dxin cú'utu' le ilágugaca bönachi. ³ Que lë ni na', böchi'

luzá'atu', guli'cô gadxë' bönni' ladjali', para ugú'uru' lu ná'agaquië' dxin ni. Yugu' bönni' na' run bayudxi ilácagaquië' bönni' tun yúgu'të bönachi légaquië' bal, en nácagaquië' bönni' ta'yéajni'i, en naca bë' Dios Bö' Lá'ayi zóalenë' légaquië'. ⁴ Netu' ni ulídzatica'stu'-në' Dios, en uséditu' bönachi xtídzë'ë Dios.

⁵ Yúgu'të' gula'yaza ladxí'gaquië' didza' ni, ate' gula'böö' Esteban, tu bönni' réajlë'ë Cristo idú ladxë'ë, en zóalenë' Dios Bö' Lá'ayi lë'. Lësca' gula'böö' Felipe, en Prócoro, en Nicanor, en Timón, en Parmenas, en Nicolás, bönni' yödzö Antioquía, bönni' zí'alö butsé'ë ca runë' para tseaj ladxë'ë Dios ca tunë' yugu' bönni' judío. ⁶ Ní'irö bulu'sudxinë' bönni' na' gula'böö' lógaquië' gubáz na' nasól-lë'ë Cristo. Yugu' bönni' gubáz na' gula'xóa ná'agaquië' légaquië', ni' tu'lídzë' Dios.

⁷ Guzërö xtídzë'ë Xanru', ate' gula'yanda' bönachi ta'yéajlë' Cristo nacué' Jerusalén. Lësca' zían bixúz judío gula'zí' lu ná'agaquië' le réajlë'ëru' Cristo.

Ta'zönë' Esteban

⁸ Esteban na' benë' le tun ga rubániru', en yugu' le taca bë' lógaca bönachi lu yödzö, zóalen yöl-la' huáca queë' Dios lë' le buzá' ladxë'ë queë'. ⁹ Ní'irö gula'yasë' bal-lë' bönni' nabábagaquië' yu'u ga tu'dubë' bönni' judío, en tu'sëdë' queë' Dios, nazí'i le Yu'u Quégaquië' Bönni' Nadzángaquië'. Bönni' narúajgaquië' yödzö Cirene, en yödzö Alejandría, en luyú Cilicia, en luyú Asia, gulunë' légaquië' tsözxón. Bönni' ni gula'díl-lalenë' Esteban didza'. ¹⁰ Biti' guca tá'baga'gaquië' didza' ru'ë Esteban na', tu' bë'ë didza' len yöl-la' réajni'i, tu' zóalenë' Dios Bö' Lá'ayi lë'. ¹¹ Ní'irö gula'guíxjë' bönni' ila'zí' yë'ë, ila'nnë': "Netu' biyónitu' didza' ru'ë Esteban ni, rnnë' zi'ë queë' Moisés, en queë' Dios." ¹² Caní guca, bönni' ni gula'gu'ë xilá ladxí'gaca bönachi, tsözxón len bönni' gula tu'zéajni'inë', en yugu' bönni' yudo' usëdi. Yúgu'të bönni' ni gula'bía di'ë Esteban na'. Gula'zönë' lë', en gula'ché'ë lë' lógaquië' bönni' yudo' tu'chi'a tu'söróë'. ¹³ Lësca' bulu'cu'ë lógaquië' nupa gula'guíxjö' le cabí nácatë, bönni' na' gula'nnë':

—Biti' zoë' dxisö bönni' ni rnnë' zi'ë que yudo' lá'ayi ni, en que xibá queë' Dios. ¹⁴ Biyónitu' didza' bë'ë bönni' ni ca gunë' Jesús, bönni' Nazaret, rnnë' usunítië' yudo' ni, en utsé'ë yugu' le nalébiru' runru', yugu' lë' na' gunná bé'enë' Moisés rë'u.

¹⁵ Ní'irö bönni' yudo' tu'chi'a tu'söróë', en yúgu'të nupa ró'gaca ni' bulu'yúë' Esteban, ate' bila'lé'enë' lahuë', rna' ca rna' lahuë' tu gubáz lá'ayi queë' Dios.

Didza' bë'ë Esteban, le gunné' uláz queë'

7 ¹ Ní'irö bixúz lo gunábinë' Esteban na', rnnë':
—¿Naru' nácatë caní?

² Bubi'ë didza' Esteban, rnnë':

—Libi'ili', bönni' gula, en libí'ili', bócha'a. Buli'zé nágali' le guía' libí'ili'. Dios, Bönni' nayépisëtërë', buluí'i lahuë' ga zoë' Abraham, xúziru' gudödi, cate' ni' zoë' luyú Mesopotamia, cate' si' tsöjsóë' yödzö Harán. ³ Dios gudxë' lë': "Birúaj ladzu', en bulá'alén di'a dza quiu', ate' guyéaj luyú ni' uluí'ida' li'." ⁴ Ní'irö birúajë' Abraham luyú Mesopotamia le naca xiyúgaca bönachi Caldea, ate' yöjsóë' yödzö Harán. Lu yödzö ni' gútië' xuzë' Abraham na', ate' lë' buzë'ë ni', ate' Dios guchë'ë lë' luyú ga ni' zóaru' na'a. ⁵ Dios biti' bë'ë lë' lataj guequi queë' luyú ni. Calëga láti'sö bunödzjë' queë' ga soë' luyú ni, pero guzxi' lu në'ë Dios unödzjë' queë' luyú ni, ate' tódi gátië' Abraham guequi luyú ni quégaca zxí'ini xi'sóë', sal-la' biti' nacu'ínibi' bi'i queë'. ⁶ Lësca' caní Dios gudxë' Abraham: "Tsöjáquië' zxí'ini xi'sú' lu xiyúgaca bönachi izá'a, ate' ni' ilácagaquië' ca bönachi zi'tu'. Ilunë' bönni' luyú ni' ga ilácagaquië' zxí'ini xi'sú' bönni' nadó'ogaquië'. Ulu'saca' zi'ë légaquië' idú ca tapa gayuá' iz." ⁷ Lësca' Dios gudxë' lë': "Neda' uzötja' bönachi luyú ni', ga ni' ilácagaquië' zxí'ini xi'sú' bönni' nadó'ogaquië', ate' tódi ni' ulu'rúajë' ni', ate' ilunë' xichina' luyú ni." ⁸ Dios bénlenë' Abraham tu didza' rucá'ana tsahui', en gunná bé'enë' lë' ichúguië' lu xipëla'gaquië' bönni' biguiú' nacu'ë lidxë' tu le gaca bë' nazí' lu ná'agaquië' didza' na' rucá'ana tsahui'. Gudödi ni' gúquië' Abraham xúzibi' bi'i Isaac, en cate' chigúqui'bi' xunu' gubidza, guchúguië' lu xipëla'bi' lë na' naca bë'. Isaac na', lësca' caní benë' queë'bi' bi'i Jacob, zxí'inë', en caní benë' ca' Jacob quégaca idxínnutëbi' bi'i bönni' queë', nupa ni' gulaca xuz xtó'ogaca idxinnu cö' bönachi Israel.

⁹ 'Yugu' xuz xtó'oru' na', lu yöl-la' ruzxé'e quégaquië', gulúti'ë-bi' bi'i José, bóchi'gaquië', lu ná'agaquië' bönni' ni' gulúti'gaquië'-bi' luyú Egipto. Dios guzóalenë'-bi' bi'i José na' ¹⁰ en busölé'-bi' lu le gulaca queë'bi'. Dios bë'ë-bi' yöl-la' réajni'i, le ben ga guyaza ládxë'ë-bi' Faraón, bönni' rinná bé'enë' bönachi Egipto, ate' Faraón na' budödë' lu ná'abi' bi'i José yöl-la' unná bë' para gunná bé'ebi' bönachi luyú Egipto, en yúgu'të bönachi nacuá' lidxë' Faraón na'.

¹¹ 'Ní'irö gúcada' gubín idú luyú Egipto, en luyú Canaán ni, ate' gula'guí'i gula'zaca' yúgu'të bönachi dza ni'. Biti' bidzöli le ilahuë' xuz xtó'oru'. ¹² Cate' biyönnë' Jacob dë xzoa' xtila luyú Egipto, gusól-lë'ë yugu' zxí'inë', bönni' ni' nácagaquië' xuz xtó'oru', luyú ni'. Caní guca le zí'alö luzuí yöjáquië' ni'. ¹³ Cate' le buropi luzuí yöjáquië' luyú Egipto, benë' José ga bulu'únbë'ë bóchë'ë lë'. Caní guca, gunózinë' Faraón nupa nácagaca di'a dza queë' José. ¹⁴ Ní'irö gusól-lë'ë José didza', en benë' ga bidxinë' Jacob, xuzë', luyú Egipto, ate' dzágagaca di'a dza queë' lë'. Gulaca idú tsónnalalaj yu' chinu bönachi. ¹⁵ Caní guca, bidxinë' Jacob luyú Egipto, ga ni' gútië' lë', ate' gulátië' ca' xuz xtó'oru' luyú ni' cate' bizá'a dza que quéëgaquië'. ¹⁶ Cate' gulátië' tu tu xuz xtó'oru', zxí'ini

xi'sóagaquië' yójuá'agaquië' légaquië' luyú Siquem, ate' ni' bulu'cáché'e légaquië' yeru ba lu zzan bulóaj na' gú'uë' Abraham lu ná'agaca zxí'inë' Hemor, bönni' Siquem na'.

¹⁷ 'Gudödi zían iz, cate' bidxín dza ral-la' gaca le guzxi' lu në'ë Dios, lë na' benë' tsutsu xtídzë'ë gunë' queë' Abraham, gula'yán bönachi yugu' cö' Israel, ate' gulaca bönachi zían cate' ni' gula'cuá' luyú Egipto.

¹⁸ Ní'irö guyázië' bönni' yúbölö gunná bë'ë luyú Egipto na', en catu caz biyönnë' ca naca le benë' José, gúcalenë' bönachi Egipto. ¹⁹ Bönni' unná bë' na' bi'ë dö' quégaca bönachi uládz queéru'. Busaca' zi'ë yugu' xuz xtó'oru' na', en benë' ga bulu'sanë'-bi' bi'i bönni' hué'ënido' que queégaquië', para ilátibi'. ²⁰ La' dza ní'sö gúljabí' ca' bí'ido' Moisés, ate' Dios guyaza ládxë'ë-bi'. Xuz xiná'abi' bulu'sculë'-bi' lídxigaquië' idú ca tsonna beo'. ²¹ Cate' bidxín dza ulu'sanë'-bi' xuz xiná'abi' para gátibi' bí'ido' Moisés na', bidxinnu nigula zxí'inë' Faraón ga ni' bulu'cá'anë'-bi', ate' yójzxi'inu-bi', en buscúlunu-bi' ca bi'i que cázanu. ²² Caní guca, bizédabi' bi'i Moisés yúgu'të le táquië' bönni' Egipto, en gúcatëröbi' zxön ca naca didza' bé'ëbi', en ca nácagaca le benbi'.

²³ 'Cate' Moisés na' chiyú'ubi' choá' iz, gunná ládxi'bi' tsöjyubi' bönachi uládz queébi', bönachi Israel. ²⁴ Cate' bidxinbi' ga na' nacu'ë, bilé'ebi'-në' tu bönni' Egipto, rusaca' zi'ë tu bönni' uládz queébi'. Ní'irö gúcalenbi'-në' bönni' uládz queébi' na', en bétibi'-në' bönni' Egipto na'. Caní guca, buzí' labi' bi'i Moisés bönni' na' uláz queë' bönni' uládz queébi'. ²⁵ Gúquibi' Moisés huala'yéajni'inë' bönni' bóchi'bi' gunë' Dios ga usölábi' lë cázabi' légaquië', pero légaquië' bití' gula'yéajni'inë'.

²⁶ Ia'tú dza ca' yójxáca'bi' ia'chopë' bönni' Israel, ta'dil-lë', ate' gú'unibi' cuéqui dxibi' légaquië', en gúdxibi' légaquië': "Libí'ili', bóchi'li' naca. ¿Bizx que ruá'ali' luzá'ali' dö'?" ²⁷ Ní'irö bönni' na' ru'ë dö' que luzé'ë budxíguë'ë-bi' bi'i Moisés, gunné': "¿Núzxitë buzóa li' para inná bé'enu' netu', en uchi'a usöróu' le runtú?" ²⁸ ¿Naru' ré'ënitsenu' gútiu' ca' neda' ca benu' néaje, bétiu'-në' bönni' Egipto na'?" ²⁹ Cate' Moisés biyónibi' didza' ni, buzxúnnajbi' ni', en yójsóabi' luyú Madián ga ni' guzóabi' ca tu bönni' zi'tu'. Luyú Madián na' butsaga ná'aleni'-nu nigula lu yödzo ni', ate' gúljugacabi' chópabi' bi'i bönni' queë'.

³⁰ 'Cate' chigudödi choá' iz zoë' ni', bulu'í'lahuë' tu gubáz lá'ayi queë' Dios ga zoë' lu guí' que yaga yótsi'do' régui, ga ni' naca lu lataj cá'asö, le rö'ö ra' guí'a nazí'i le Sinaí. ³¹ Cate' Moisés bilé'enë' guí' na', bubáninë', ate' gubígui'ë gala' para ilé'enë' dxi'a, ate' biyönnë' chi'ë Xanru'. ³² Caní gudxë' Xanru' lë': "Neda' naca' Dios quégaquië' xuz xto'o. Naca' Dios queë' Abraham, en Dios queë' Isaac, en Dios queë' Jacob." Ní'irö lu yöl-la' radxi queë', guzxyzidë'ë Moisés, en bítí'rö burúguinë' uyúë'. ³³ Xanru' gudxë' lë': "Guléaj xirachu' nudó'o, tu' naca lá'ayi ga ni' zu' tu' zoa caza' neda', Dios, ni. ³⁴ Le nácatë chibilé'eda' le ta'guí'i ta'zaca' bönachi quia' nacuá' luyú Egipto, en chibiyönda'

ta'bödxi yeche'. Bötja', zoa' ni para usölá' légaquié'. Gudá na'a, isól-la'a li' luyú Egipto.”

³⁵ 'Sal-la' bönni' uládz queë' Moisés, bulu'cá'anë' lë' cá'asö, gula'nné': “¿Núzxité buzóa li' para inná bé'enu' netu', en uchi'a usöróu' le runtu'?” Dios gusól-lë'ë lë' para gáquië' bönni' unná bë', en bönni' rusölá, ca na' gubáz lá'ayi na' queë' Dios gudxë' Moisés, cate' buluí'i lahuë' lu yaga yótsi'do' régui ga na' zoë'. ³⁶ Moisés ni bubéajë' bönni' uládz queëru' luyú Egipto. Guca caní gudödi benë' le gulún ga bulu'bani bönachi ni', en le taca bë' benë' luyú ni'. Lësca' caní benë' lu nísado' nazí'i le Nísado' Xiná. Caní benë' lógaquië' idú ca choá' iz lu lataj cá'asö. ³⁷ Lë cazë' Moisés na' gudxë' bönachi Israel ni', gunné': “Xanru' Dios isól-lë'ë queéli' tu bönni' galjë' ladaj di'a dza queéli', ate' gáquië' bönni' gu'ë didza' uláz queë' Dios. Isól-lë'ë lë' queéli' ca na' gusól-lë'ë neda'. Lë cazë' run bayudxi uzé nágali'-në'.” ³⁸ Lësca' lë cazë' Moisés na' guzóalenë' bönachi nudúbigaca queë' Dios lu lataj cá'asö, ate' gudzáguië' gubáz lá'ayi queë' Dios lë', Nu na' bë'len lë' didza' lu guí'a Sinaí na'. Moisés na' guzóalenë' xuz xtó'oru', ate' Dios budödë' lu në'ë xibá lá'ayi queë', le ruí'i didza' ca gaca ila'deli' bönachi yöl-la' na'bán, ate' budödë' Moisés xibá ni lu ná'agaca zxí'ini xi'sóagaquië' ga ridxintë queëru' rë'u.

³⁹ 'Biti' gulé'ënnë' xuz xtó'oru' ilunë' ca rnna xtídzë'ë Moisés, pero bulu'zöë' lë' tsölá'alö, en gulé'ënnë' tsöjhuójgaquië' luyú Egipto. ⁴⁰ Cate' ni' zoë' Moisés na' lu guí'a Sinaí na', légaquië' gulé' Aarón, böchë'ë Moisés na', gula'nné': “Ré'ënitú' gunu' yugu' dios queétu', tu budó' guië, para tsöjnórugaca lotu'. Biti' nöztu' bi guca queë' Moisés, bönni' na' nubéajë' netu' luyú Egipto.” ⁴¹ Ní'irö gulunë' tu budó' oro le naca ca tu bédxido', ate' gulútië'-ba' bö'cu' zxíla'do', en gulú'ugaquië'-ba' lo budó' oro na', ate' gulunë' laní lo budó' na' núngaquië'. ⁴² Que lë ni na' Dios bucá'anë' légaquië', en guléaj ládxi'ë légaquië'. Ní'irö gula'yéaj ládxi'gaquië' yugu' le ta'yëpi lúzxiba. Ca naca lë ni nazúaj lu guichi le gula'nné' bönni' gulu'ë didza' uláz queë' Dios, le rnna:

Libí'ili', bönachi Israel,
 ¿naru' gulú'ugacatsali'-ba' quia' neda' böa' bédxi ni'
 bétigacali'-ba', en buzégui'gacali'-ba',
 lë na' benli' lu lataj cá'asö idú ca choá' iz?

⁴³ Biti' gulú'ugacali'-ba' quia' neda',
 pero biá'ali' le nequi que Moloc, budó' guiój queéli'.
 Biá'ali' ca' tu le naca ca bölj lúzxiba nazí'i le Refán,
 lë na' buzóali' ca dios queéli'.
 Yugu' budó' guiój budó' yaga ni,
 la' libí'isili' benli' para guyéaj ládxi'li' léguequi.
 Que lë ni na', ubéaja' libí'ili' lu xiyuli',
 en ichë'a libí'ili' zítu'rö ga dë luyú Babilonia.

⁴⁴ 'Cate' ni' gula'cu'ë xuz xtó'oru' lu lataj cá'asö, guta' quégaquië' yu'u lari' na' ga gulún chi'ë xibá queë' Dios, lë na' naca bë' Dios caz zóalenë' légaquië'. Gulunë' tu yu'u lari' na' ca na' Dios gunná bé'enë' Moisés, cate' ni' gudxë' lë' gunë' le ca naca lë na' bilé'enë', le buluí'inë' Dios lë' lu guí'a ni'. ⁴⁵ Lësca' bulu'dödë' yu'u lari' na' lu ná'agaquië' zxí'inigaquië' ga bidxintë dza ni' gulu'ë xuz xtó'oru' le luyú ni, cate' ni' dzáguië' Josué légaquië', ate' gula'gúë' xiyúgaca bönachi izá'a, nupa ni' buláguië' Dios lógaquië' xuz xtó'oru'. Caní gulunë' zían iz ga bidxintë dza zoë' David. ⁴⁶ Dios guyaza ládxë'ë David na', ate' lë' gunábinë' Dios gu'ë lë' lataj gunë' tu yu'u ga soë' Dios queë' Jacob. ⁴⁷ Biti' bë'ë Dios lë' lataj, ate' Salomón, zxí'inë' David na' benë' yu'u queë' Dios. ⁴⁸ Caní benë' sal-la' bití' zoë' Dios, Nu nácatërö lo, tu lu yudo' núngaca bönachi. Ca naca lë ni gunné' tu bönni' bë'ë didza' uláz queë' Dios, gunné':

⁴⁹ Yehua' yubá naca ga rö'a rinná bë'a,
ate' yödzölió naca xilibi ni'a.

Rnnë' Xanru': "¿Naru' gúntsali' tu yu'u ga soa'?
¿Naru' zóatsö tu lataj ga ral-la' uzí' ládxa'a?"

⁵⁰ ¿Naru' cabí len na'a caza' bena' yúgu'të lë ni?"

⁵¹ Ní'irö Esteban na' gudxë' yugu' bönni' yudo' tu'chi'a tu'söröë' na', gunné':

—Libí'ili', bönni' zidi, bití' bi raza icja nágali'. Nazidi icja ládxi'do'oli' ca raca quégaca bönachi bití' núnbë'gaquië' Dios. Ridá'baga'tica'sili'-në' Dios Bö' Lá'ayi. Ca na' gulunë' xuz xtó'oli', runli' ca' libí'ili'. ⁵² Gula'bía ládxi'gaquië' xuz xtó'oli' na' yúgu'të bönni' ni' gulu'ë didza' uláz queë' Dios. Lësca' gulútië' bönni' ni' gula'guíxjö'ë zí'alö ca ral-la' guídë' Cristo, Bönni' Tsahui', ate' na'a, cate' ni' bidxinë' Bönni' Tsahui' na', libí'i cázali' bétili'-në' lu ná'agaquië' bönni' gulútië' Lë'. ⁵³ Libí'i cázali' dë lu ná'ali' xibá queë' Dios, lë na' gubáz lá'ayi queë' Dios bulu'dödë' lu ná'agaquië' xuz xtó'oli', pero bití' runli' ca rna.

Tútië' Esteban

⁵⁴ Cate' bönni' yudo' tu'chi'a tu'söröë' na' bila'yönnë' didza' ni, gula'léde'enë' Esteban, ate' lu yöl-la' rilé quégaquië' lë' gulagu zxéatica' láyë'ë. ⁵⁵ Ní'irö buyúë' Esteban na' lúzxibalö, ate' zóalenë' Dios Bö' Lá'ayi lë', bilé'enë' lataj bení' ga zoë' Dios, enca' Jesús, zuínë' cuita lë'ë ibëla Dios ga nayépisëtërë'. ⁵⁶ Ní'irö gunné':

—Buli'yútsöca'. Rilé'eda' nayalaj lúzxiba, ate' zuínë' Bönni' Guljë' Bönachi cuita lë'ë ibëla Dios.

⁵⁷ Ní'irö bönni' yudo' tu'chi'a tu'söröë' na' bulu'sayaj nágagaquië'. Gula'bódxí'ë zidzaj, en tsözxón gula'bía di'ë Esteban na'. ⁵⁸ Bulu'béajë' lë' ní'ilö ra' yödzö na', ga ni' bulu'ladxë' lë' guió'j. Yugu' bönni' ni' tunë' ba nalí le tu'zéguíë' Esteban didza' bulu'cu'ë lari' ta'xóa yéngaquië'

xini'ë tu bönni' lë' Saulo cate' ni' bulu'ladxë' Esteban guióǵ. ⁵⁹ Cate' ni' tu'ladxë' Esteban guióǵ, lë' bulidzë' Dios, gunné':

—Xána' Jesús. Buzí' bö' naca caza'.

⁶⁰ Ní'irö biyéchuë', buzóa zxibë', en bë'ë zidzaj didza', gunné':

—iXan! iBiti' usubágu'u légaquië' dul-la' ni!

Cate' budxi bë'ë didza' ni, gútité'.

Saulo ribía ládxë'ë bönachi queë' Cristo

8 ¹⁻³ Saulo benë' tsözxón yugu' bönni' ni' gulútië' Esteban. La' ní'isö yugu' bönni' ta'yéaj ládxi'gaquië' Dios guluá'agaquië' Esteban, ate' yójcáchi'gaquië' lë'. Gula'bódxidë'ë ni'a queë'.

Dza na' yugu' bönni' judío cabí ta'yéajlë'ë Cristo gula'bía ládxi'da'gaquië' bönachi queë' Cristo nacuá' Jerusalén. Lësca' Saulo gudxía ládxë'ë bönachi queë' Cristo. Guyázië' gapa naca lu yu'u quégaquië', ate' guzxönë' yugu' bönni', en nigula, ate' gulu'ë légaquië' lidxi guíë.

Ní'irö gulásilasi ia'láti'sö cabí bidáchigaca yúgu'të bönachi queë' Cristo idú luyú Judea, en luyú Samaria, ate' légacasë' gubáz na' nasól-lë'ë Cristo bulu'gá'anë' Jerusalén.

Raca libán que didza' dxi'a luyú Samaria

⁴ Yugu' bönni' na' gulásilasië' yójáquië' yúgu'të lataj, ate' gulunë' libán que didza' dxi'a. ⁵ Ní'irö Felipe, tu bönni' dzáguië' nupa na' gulásilasi, guyijë' luyú Samaria, ate' benë' libán ni' ca naca queë' Cristo. ⁶ Bulu'dubë' yugu' bönni' ni', ate' idú ládxi'gaquië' bulu'zé nágagaquië' didza' ru'ë Felipe na', tu' bila'yönnë' xtídzë'ë, en bila'lé'enë' yugu' le taca bë' runë'. ⁷ Caní guca, tu' benë' ga bulu'rúaj zían bö' xihui' yú'ugaca bönachi, ta'bódxí'a zidzaj, ate' bulu'huöaca zían nupa te'e huë' nacú'uni bin, en nupa biti' guca sá'gaca. ⁸ Caní guca, bulu'dzeja bönachi yödzö ni'.

⁹ Zoë' Simón, tu bönni' zí'alö gúquië' bönni' udzá' uné ya'a lu yödzö na', bönni' guzxí' yé'enë' bönachi Samaria na', gunné' lë cazë' náquië' bönni' nayépisëtërë'. ¹⁰ Yúgu'të bönachi bulu'zëda' nágagaca bönni' ni, ga riguela' yugu' bönni' cá'asö ga ridxintë yugu' bönni' lo, gula'nnë': “Bönni' ni dë lu në'ë yöl-la' huáca zxön queë' Dios.” ¹¹ Caní guca, gulunë' lë' bal, tu' xidzé nazí' yé'enë' légaquië' len yöl-la' gudzá' uné ya'a queë'.

¹² Cate' gula'yéajlë'ë libán runë' Felipe que didza' dxi'a ca rinná bë'ë Dios, en ca naca queë' Jesucristo, ní'irö gula'dilë' nisa, bönni', en nigula. ¹³ Ní'irö guyéajlë'ë ca' Simón na', en bidilë' nisa, ate' gudá'entica'së' tsözxón Felipe na'. Cate' bilé'enë' yugu' yöl-la' huáca zxön, en yugu' le taca bë' runë' Felipe, bubáninë' Simón na'.

¹⁴ Cate' yugu' gubáz na' nasól-lë'ë Cristo nacu'ë Jerusalén bila'yönnë' ca guca lë ni, chinazí' lu ná'agaca bönachi luyú Samaria xtídzë'ë Dios, ní'irö gula'sól-lë'ë Pedro, en Juan ni'. ¹⁵ Cate' Pedro, en Juan na' bila'dxinë' ni', bulu'lidzë' Dios uláz quégaca bönachi ni' ta'yéajlë' Cristo para idisóalenë' Dios Bö' Lá'ayi léguequi. ¹⁶ Ga bidxintë dza na', biti' ridxíninë' Dios Bö' Lá'ayi quégaquië'. Nadílagacasë' nisa para ilácagaquië' tuz len Xanru' Jesús. ¹⁷ Ní'irö Pedro, en Juan na', gula'xóa ná'agaquië' bönachi Samaria na'. Bulu'lidzë' Dios, ate' bidisóalenë' Dios Bö' Lá'ayi légaquië'.

¹⁸ Cate' bilé'enë' Simón, bönni' udzá' na', le guca cate' gubáz na' nasól-lë'ë Cristo gula'xóa ná'agaquië' bönachi ni', bidisóalenë' Dios Bö' Lá'ayi légaquië', gú'unnë' quíxjé' légaquië' dumí, ¹⁹ ate' rë' légaquië':

—Benna ca' yöl-la' huáca ni quia', para cate' ixóa na'a nütitës bönachi, idisóalenë' Dios Bö' Lá'ayi nu na'.

²⁰ Ní'irö Pedro gudxë' lë', rnnë':

—Initi dumí quiu' tsözxón len li', tu' réquinu' len dumí idéli'nu' yöl-la' huáca queë' Dios. ²¹ Biti' nacu' bachi gútsu'u lë ni, tu' dxía le naca ruá' dö' icja ládxi'do'o lahuë' Dios. ²² Bubí'i ládxi' ca naca huiá' dö' ni runu', en gúta'yu lahuë' Dios, nadxi ca' uniti lahuë' li' ca naca lë ni rizá' ládxi'u. ²³ Réquibe'eda' nabágu'u xíguia', en nadzunu' lu yalaj que tu' xihui'.

²⁴ Ní'irö bubi'ë didza' Simón na', rë' légaquië':

—Buli'lídzë' Dios, gáta'yuli' lahuë' Xanru' ni'a quia' neda' para cabí gaca quia' nitú lë na' chigunnáli'.

²⁵ Cate' Pedro, en Juan na' budxi gulunë' ba nalí queë' Cristo lu yödzö ni', en bulu'siyönnë' légaquië' xtídzë'ë Dios, gulunë' ca' libán que didza' dxi'a yugu' lu ládzaquië' bönni' Samaria, ate' gudödi ni' yöjhuógaquië' Jerusalén.

Felipe, en tu bönni' Etiopía

²⁶ Ní'irö tu gubáz lá'ayi queë' Xanru' bé'lenë' Felipe didza', en gudxë' lë':

—Guyasa, en guyéaj saca' ga ridödi gubidza beo' ziaga. Idxinu' ga ni' nalá' nöza zeaj Jerusalén zéajtë yödzö Gaza, nöza na' ridödi lu lataj cá'asö.

²⁷ Ní'irö guyu'ë nöza Felipe na', sa'yéajë'. La' nöza ni' yöjtságuië' tu bönni' Etiopía, náquië' bönni' huödx. Luyú Etiopía náquië' bönni' huen dxin lo queënu Candace, nigula na' rinná bé'enu bönachi Etiopía na', en yu'u lu në'ë yúgu'të yöl-la' tsahui' queënu dzö'ö lídxinu. Guyijë' Jerusalén bönni' ni para guyéaj ládxië'ë Dios. ²⁸ Na'a, söhuóje' ladzë', rö'ë lu carreta queë', en rulabë' le nazúaj lu guichi ca gunné' Isaías, bönni' bë'ë didza' uláz queë' Dios. ²⁹ Ní'irö Dios Bö' Lá'ayi gudxë' Felipe na':

—Gubíga' ga zeaj carreta na', en guyéajlen le.

³⁰ Cate' chigubíguë' Felipe ni', biyönnë' ru'ë didza' bönni' huödx na', rulabë' le nazúaj lu guichi ca gunné' Isaías, ate' gudxë' lë':

—¿Naru' réajni' inu' lë na' rulabu'?

³¹ Bubi'ë didza' bönni' Etiopía na', gunné':

—¿Nacxi gaca tséajni'ida' channö cuntú nu zoa uzéajni'i neda'?

Ní'irö gúta'yuë' lahuë' Felipe cuenë', en có'lenë' lë' tsözxón lu carreta na'.

³² Lë na' nazúaj lu guichi rulabë', rna caní:

Ca bö'cu' zxíla'do',

gula'ché'ë Lë' para ilútië' Lë',

en ca bö'cu' zxíla'do',

biti' rnnëba' cate' nu richugu lítsa'ba',

ca' benë' Lë', biti' gusalaj ru'ë bi innë'.

³³ Bulu'cá'anë' Lë' cá'asö,

en biti' gulu'ë lataj nu uchi'a usöró Lë'.

¿Nuzxi caz gaca inözi xíguia' nabága'gaca bönachi uládz queë'?

La' légacasë' gulútië' Lë'.

³⁴ Bönni' huödx na' gunábinë' Felipe, rë' lë':

—Ráta'yua' lo' quíxjöi' inu' neda'. ¿Nuzxi que gunné' caní bönni' na' bë'ë didza' uládz queë' Dios? ¿Naru' queë' cazë', o que nu yúbölö?

³⁵ Ní'irö la' didza' nisö buguélë' Felipe, en busiyönnë' lë' didza' dxi'a ca naca queë' Jesús. ³⁶ Cate' ni' yú'ugaquië' nōza sōjāquië', bila'dxinë' ga dë nisa, ate' bönni' huödx na' rë' Felipe, rnnë':

—Buyútsöca'. Ni dë nisa. ¿Naru' huácatsö idila' nisa?

³⁷ Felipe gudxë' lë':

—Channö réajlë'u idú ládxu'u, huáca idilu' nisa.

Lë' bubi'ë didza', rnnë':

—Réajlë'a Jesucristo, náquië' Zxí'inë' Dios.

³⁸ Ní'irö benë' ga guzóa dxisö carreta queë' na', ate' bulu'huöjtjë' irópatë', yöjtsázagaquië' lu nisa. Ní'irö Felipe buquilë' bönni' huödx na' nisa. ³⁹ Cate' bulu'rúajë' lu nisa, Dios Bö' Lá'ayi buchë'ë Felipe, ate' bönni' huödx na' bítirö bilé'enë' lë'. Ní'irö buguélë'ë xinözë', söhuójtjë' rudzéjanë'. ⁴⁰ Cate' chiréquibe'enë' Felipe, zoë' lu yödzö Azoto. Gudödë' yúgu'të yödzö ni', ate' benë' libán que didza' dxi'a, ga bidxintë' yödzö Cesarea.

Saulo ruhuöáquië' queë' Cristo

9 ¹ Ni' ruzenë' bach Saulo nupa ta'yéajlë' Xanru', gú'unnë' gútië' légaquië'. Para gunë' caní bidxinë' lahuë' bixúz lo, ² en gunábinë' lë' tu guichi unná bë', le tsöju'ë lógaquië' bönni' unná bë' quégaca yu'u gapa tu'dubë' bönni' judío, en tu'sëdë' queë' Dios lu yödzö Damasco, ate' channö utsöjxáquië' yugu' bönni', en nigula ta'yéajlë'ë Jesús ni',

gaca iché'ë légaquië' nadzúngaquië' lu yödzö Jerusalén. ³ Tsanni ni' yú'ugaquië' nöza Saulo, en nupa nacuá'len lë', sôjáquië', en cate' chizóa ila'dxinë' Damasco, tsálido'os buzeni'da' tu bení' za' lúxiba, le buzení' ga ni' sôjáquië'. ⁴ Ní'irö gudzö'ë Saulo lu yu, en biyönnë' chi'i Nu rë lë':

—Saulo, Saulo, ¿bizx que ribía ladxu'u neda'?

⁵ Saulo gunábinë' Lë', gunné':

—¿Nuzxi li', Xan?

Lë' gunné':

—Neda' Jesús, Nu ribía ladxu'u. Run zi' cuinu', ridá'bagu'u neda'.

Raca quiu' ca na' raca queéba' bëdxi, run zi' cuinba' richégu'ba' yaga tuchi' túndë'ë-ba' zi'.

⁶ Ní'irö Saulo guxzízidë'ë, gúdxinë', en gunné':

—Xan, ¿bizxi ré'ënu' guna'?

Xanru' gudxë' lë':

—Guyasa, en guyáz lu yödzö, ate' ni' isól-la'a quiu' nu guíë li' le ral-la' gunu'.

⁷ Guládxinë' yugu' bönni' na' sôjácalenë' Saulo, tu' bila'yönnë' chi'i na', sal-la' cuntu nu bila'lé'enë'. ⁸ Ní'irö böasë' Saulo luyú, en cate' guxá' guió'j lahuë', biti' ca' rilé'enë'. Que lë ni na' gula'guélë'ë në'ë, en gula'ché'ë lë' Damasco. ⁹ Guzöë' ni' tsonna dza nachul-la lahuë', en biti' bi güí'i gudahuë'.

¹⁰ Zoë' ca' Ananías, bönni' réajlë'ë Cristo, yödzö Damasco, ate' Xanru' buluí'i lahuë' ga zoë' ca tu lu yëla béchigal, en gudxë' lë':

—Ananías.

Lë' bubi'ë didza', gunné':

—Ni zoa', Xan.

¹¹ Xanru' gudxë' lë':

—Guyasa, en guyéaj ga naca la' nöza na' nazí'i le Nöza Li, ate' lu yu'u lidxë' Judas gunaba didza' queë' Saulo, bönni' Tarso. Lu yu'u na' rulidzë' Dios. ¹² Chibilé'enë' tu bönni' ca tu lu yëla béchigal zë'ë tsázië' ga zoë', lë' Ananías, en ixóa në'ë lë' para huóálaj guió'j lahuë'.

¹³ Ní'irö bubi'ë didza' Ananías, rë' Lë':

—Xan, zían nupa chibulu'siyönnë' neda' ca runë' bönni' ni, zían le naca dö' nu'ë le benë' quégaca bönachi ta'yéajlë' Li', nacuá' Jerusalén.

¹⁴ Zë'ë ca' ni, dë lu në'ë uláz quégaquië' bixúz unná bë' sönë' yúgu'të nupa tu'lidza Dios len Lo' Li'.

¹⁵ Ní'irö Xanru' rë' Ananías na', rnnë':

—Guyéaj, tu' guró caza' neda' bönni' ni para gunë' libán ca naca quia' lógaca bönachi izá'a, en lógaquië' bönni' ta'nná bé'enë' légaquië', enca' lógaca bönachi Israel. ¹⁶ Uluí'ida' lë' le zían le qui'i sáquë'ë uláz quia' neda', gunë' xichina'.

¹⁷ Ní'irö guyijë' Ananías ni', ate' guyázië' yu'u, en guxóa në'ë Saulo, ate' rë' lë':

—Böcha'a Saulo, Xanru' Jesús, Nu na' buluí'i lahui la' nöza ga ni' zo'o, gusól-lè'è neda' para huóalaj guiój lo', en idisóalenè' Dios Bö' Lá'ayi li'.

¹⁸ La' ní'isö gula'guínnaj le naca ca xilácuba' böla lu guiój lahuè', ate' la' böáljatè' guiój lahuè'. Ní'irö guyasè' Saulo, en bidilè' nisa. ¹⁹ Gudödi ni' gudahuè', en böáca ládxè'è. Ca chopá tsonna dza guzóalenè' yugu' bönni' ta'yéajlè'è Cristo nacu'è Damasco.

Runè' libán Saulo lu yödzö Damasco

²⁰ La' gusí lotè' Saulo runè' libán queè' Cristo gapa naca lu yu'u ga tu'dubè' bönni' judío, en tu'sèdè' queè' Dios, rnnè':

—Jesús náquiè' Zxí'ini cazè' Dios.

²¹ Bulu'bánninè' yúgu'tè' bönni' ni' ta'yönnè' lè', ta'nnè':

—¿Naru' calèga bönni' ni' bönni' na' busunítiè' nupa nacua' Jerusalén, en tu'lidza Dios lu Lè' Jesús? Para gunè' caní bidè' ca' ni' para iché'è légaquiè' nadzúngaquiè' lógaquiè' bixúz unná bè'.

²² Bidíparö ládxè'è Saulo, en benè' ga gula'bö'è böniga bönni' judío nacu'è Damasco, tu' buluí'inè' légaquiè' Jesús naca cazè' Cristo, bönni' na' tunè' löza idinná bé'enè' légaquiè'.

Rulé' Saulo lu ná'agaquiè' bönni' judío

²³ Cate' chigudödi zían dza, gulún xtídza'gaquiè' bönni' judío nacu'è ni' ilútiè' Saulo. ²⁴ Rëla, en tè dza gula'bó' nísie' yugu' bönni' judío ga nu ridödi lu zö'ö run chi'i yödzö na' para ilútiè' lè', pero gúquibe'enè' Saulo le té'ennè' ilunè' queè'. ²⁵ Ní'irö yugu' bönni' ta'yéajlè'è Cristo gula'guélè'è Saulo chi'i dzó'ölö, ate' gula'gu'è lè' tu lu ga'böra zxön naga' du, en bulu'zötjè' lè' ní'ilö lu zö'ö run chi'i yödzö na'.

Rudxinè' Saulo Jerusalén

²⁶ Cate' budxinè' Saulo Jerusalén, gú'unnè' tsöjenè' tsözxón bönni' ni' ta'yéajlè'è Cristo, pero yúgu'tè' guládxinè' lè', tu' cabí téquinè' réajlè'è Saulo na' Cristo. ²⁷ Ní'irö bönni' na' lè' Bernabé gudélè'è Saulo, en guché'è lè' ga na' nacu'è bönni' gubáz nasól-lè'è Cristo. Busiyönnè' légaquiè' ca na' guca queè' Saulo, bilé'enè' Xanru' la' nöza, ate' Xanru' caz bé'lenè' lè' didza', en ca na' benè' Saulo lu yödzö Damasco, len yöl-la' rugu ladxi' benè' libán ca naca queè' Jesús. ²⁸ Ní'irö Saulo guzóalenè' légaquiè' lu yödzö Jerusalén, ate' gudálenè' légaquiè' tsözxón. ²⁹ Lu yöl-la' rugu ladxi' benè' libán Saulo ca naca queè' Xanru', en gudíl-lalenè' didza' bönni' judío tu'è didza' griego, ate' légaquiè' gula'zóa gula'bö'è ilútiè' lè'. ³⁰ Cate' guléquibe'enè' bóchi'ru' ta'yéajlè'è Cristo lè' ni, gula'ché'è Saulo lu yödzö Cesarea, ate' gula'sól-lè'è lè' yödzö Tarso, le naca ladzè' Saulo.

³¹ Ní'irö guca tsahui' quégaca yúgu'të cö' bönachi queë' Cristo, nacuá' idú luyú Judea, en luyú Galilea, en luyú Samaria, ate' bila'dipa ládxi'gaquië'. Gula'cu'ë lu yöl-la' radxi quégaquië' Xanru', ate' gula'yanë' tu' gúcalenë' Dios Bö' Lá'ayi légaquië'.

Pedro ruúnë' tu bönni' lë' Eneas

³² Ia'tú le guca, cate' Pedro yöjyüë' yugu' bóchi'ru', bidxinë' ga nacu'ë bönni' ta'yéajlë'ë Jesús lu yödzö Lida. ³³ Yöjxáquië' tu bönni' ni' lë' Eneas, chiguca xunu' iz dë' ré'enë', nací'unië' bin. ³⁴ Pedro gudxë' lë': —Eneas, Jesucristo ruúnë' li'. Guyasa, en butubi xto'o.

La' guyásatë' Eneas na'. ³⁵ Yúgu'të nupa nacuá' yödzö Lida, en yödzö Sarón bila'lé'e lë', ate' bulu'huóaca queë' Xanru', tu' chita'yéajlë' Lë'.

Rátinu Dorcas, en rubannu

³⁶ Ia'stú le guca, lu yödzö Joep zóanu tu nigula réajlë'ënu Cristo, lënu Tabita, en ca naca didza' griego lënu Dorcas. Bennu nigula ni zían le nácagaca dxi'a le tácalen bönachi yechi'. ³⁷ Le guca dza ni', gü'ínu Dorcas na', en gútinu. Gudödi gula'guíbinu lënu, gula'guíxjë'-nu tu lu yu'u ga naca buropi cuía. ³⁸ Tu' dë yödzö Lida gála'sö ga na' dë yödzö Joep, ga na' zoë' Pedro, bila'yönnë' bönni' Joep na' ta'yéajlë'ë Cristo zoë' Pedro ni', ate' que lë ni na' gula'sól-lë'ë chopë' bönni' ga na' zoë', ate' guláta'yuë' lahuë', të' lë':

—Biti' tsenu' guídu' queétu'.

³⁹ Ní'irö la' guyásatë' Pedro, sa'yéajlenë' légaquië'. Cate' bidxinë' ni', la' gula'chë'të' lë' ga naca lu yu'u ga dënu nigula nati na'. Ní'irö yugu' nigula uzëbi bulu'dúbinu gásibi'ilë', ta'bódxinu, en tu'luí'ínu lë' lari' quégaquië' bönni', en nigula, yugu' le bennu Dorcas cate' ni' zóalennu légacanu. ⁴⁰ Ní'irö Pedro bubéajë' ní'ilö yúgu'të nupa nacuá' ni', ate' buzóa zxibë', rulidzë' Dios. Ní'irö buécjë' ga dënu Dorcas na', gunné':

—Tabita, guyasa.

La' buxa'të guió' lonu Dorcas. Cate' bilé'enu-në' Pedro, la' guyástënu, guró'önu. ⁴¹ Gudélë'ë Pedro ná'anu, en buchisë'-nu. Ní'irö bulidzë' bönni' na' ta'yéajlë'ë Jesús, len yugu' nigula uzëbi na', ate' busudxinë' Dorcas na' lógaquië', nabannu. ⁴² Ca guca lë ni guzé didza' idú lu yödzö Joep, ate' gula'yéajlë' bönachi zían Xanru' Jesús. ⁴³ Bugá'anë' Pedro yödzö Joep na' zían dza lu yu'u lidxë' Simón, bönni' runë' tsahui' guídi zxa bëdxi.

Le benë' Pedro lidxë' Cornelio

10 ¹ Zoë' yödzö Cesarea tu bönni' lë' Cornelio, bönni' rinná bé'enë' tu gáyu'ë bönni' röjáquië' gudil-la, nazí'i lágaquië' Bönni' Italia Röjáquië' Gudil-la. ² Cornelio na' reaj ládxë'ë Dios, en rádxinë' Lë', ate' yúgu'të bönachi nacuá' lidxë' núngaca lë' tsözxón.

Runödzejë' Cornelio dumí zían le rácalen bönachi yechi', en rulídzatica'së' Dios. ³ Tu dza idú ridödi xihuó bilé'enë' Cornelio ca tu lu yëla béchigal, razië' tu gubáz lá'ayi queë' Dios ga na' zoë', en rë' lë':

—Cornelio.

⁴ Gúdxinë' Cornelio. Buyüë' gubáz lá'ayi na', en gudxë' lë':

—¿Bizxi rnno', Xan?

Gubáz lá'ayi na' gudxë' lë', rnnë':

—Dios riyönnë' le rulidzu'-në', en nözinë' ca runu', rácalenu' bönachi yechi'. ⁵ Na'a, gusól-la' yugu' bönni' tsöjáquië' yödzö Jope tsöjlídzagaquië' bönni' na' lë' Simón, zoa ia'tú lë' Pedro. ⁶ Bönni' ni zoë' lidxë' tu bönni' runë' tsahui' guídi zxa bëdxi. Bönni' ni, lësca' lë' Simón, ate' zoa lidxë' ra' nísado'. Pedro na' guíë' li' le ral-la' gunu'.

⁷ Cate' chibuzé'ë gubáz lá'ayi na' bé'lenë' lë' didza', bulidzë' Cornelio chópabi' bi'i huen dxin queë', en tuë' bönni' rejë' gudil-la reaj ládxxë'ë Dios, en dzáguie' bönachi nacuá' lidxë' Cornelio. ⁸ Cate' budxi busiyönnë' légaquië' yúgu'të le guca, gusól-lë'ë légaquië' yödzö Jope.

⁹ Dza buropi, tsanni ni' yú'ugaquië' nöza, en ta'dxinë' gala' ga dë Jope na', la' ní'isö gurenë' Pedro ícjo'olö yu'u para ulidzë' Dios, ni' naca idú huagubidza. ¹⁰ La' ná'asö ridunë' Pedro, en gú'unnë' gahuë', ate' tsanni ni' tu'pé'ë queë', bilé'enë' le naca ca tu lu yëla béchigal. ¹¹ Bilé'enë' nayalaj lúzxiba, en ruhuötaj tu le naca ca tu lari' guitsa' zxön ga zoë', le naga' idapa la'a. ¹² Lahui lari' na' dxíagacaba' yugu' böa' guixi' izá'a nacuá' tapa ni'a ná'agacaba', en yugu' böa' tá'ayöj lé'egacaba' lu yu, en yugu' böa' zoa xíligacaba'. ¹³ Ní'irö biyönnë' chi'i nu rë lë':

—Pedro, guyasa. Béti-gacaba', en gudagu.

¹⁴ Bubi'ë didza' Pedro, rnnë':

—iCalëga, Xan! Catu caz gudahua' le cabí ral-la' gágutu', o le cabí naca dxi'a.

¹⁵ Le buropi luzuí biyönnë' chi'i nu na' gudxi lë':

—Le nunë' Dios dxi'a, biti' innó' que: “Biti' naca dxi'a.”

¹⁶ Tsonna luzuí guca caní, ate' ní'irö la' buépitë lari' zxön na' lúzxiba.

¹⁷ Tsanni ni' rö'ë böniga Pedro, rizá' ládxxë'ë bizxi sa'yéaj lë na' bilé'enë' ca tu lu yëla béchigal, bila'dxinë' bönni' na' nasól-lë'ë Cornelio légaquië' ra' yu'u, ta'nabë' gazxi zoa lidxë' Simón na'. ¹⁸ Cate' bila'dxinë' ni', bulu'lidzë' nupa nacuá' yu'u na', en gula'nábinë' légaquië' channö zoë' tu bönni' lë' Simón ni', zoa ia'tú lë' Pedro. ¹⁹ Tsanni ni' rizá' ládxxë'ë Pedro ca naca lë na' bilé'enë', Dios Bö' Lá'ayi gudxë' lë', rnnë':

—Buyútsöca'. Chibila'dxinë' tsonnë' bönni' ni, tu'guiljë' li'.

²⁰ Guyaschi na'a, en bötaj xzan yu'u. Biti' gaca chopa ládxxu'u tséajlenu' légaquië', tu' nasól-la'a neda' yugu' bönni' ni.

²¹ Ní'irö bötjë' Pedro xzan yu'u ga na' nacu'ë bönni' na' nasól-lë'ë Cornelio, en gudxë' légaquië':

—Neda' bönni' ruguílajli'. ¿Bizxi huen zá'ali' ni?

²² Bulu'bi'ë didza', tē' lē':

—Cornelio, tu bönni' rinná bé'enē' bönni' rōjáquiē' gudil-la, nasól-lē'ë netu'. Náquiē' bönni' tsahui', en rádxiñē' Dios. Yúgu'tē bönni' judío tunē' bal bönni' ni, en nadxí'iguequinē' lē'. Ia'tú le guca, tu gubáz lá'ayi queē' Dios bé'lenē' lē' didza', en gudxē' lē' isól-lē'ë nu udulídza li' guídu' lidxē' para yōnnē' didza' gu'u.

²³ Ní'irō Pedro gulu'ë légaquiē' lu yu'u, en bē'ë ga ila'cu'ë. Cate' za' rení' ia'tú dza, guyasē' Pedro, en guyéajlenē' légaquiē'. Bal-lē' böchi'ru' nacu'ë Jope na' gulunē' lē' tsōzxón.

²⁴ Dza bunni ni', bila'dxinē' Cesarea. Chizóē' Cornelio ribözē' légaquiē', ate' chinutubē' yugu' di'a dza queē', en yugu' böchi' luzē'ë nadxí'irōnē' lidxē'. ²⁵ Cate' guyáziē' Pedro lö'a, birúajē' Cornelio yu'u, yōjtságuiē' lē'. Biyéchuē' xini'ë Pedro, en guyéaj ládxē'ë lē' ca runru' queē' Dios caz. ²⁶ Pedro buchisē' lē', en gudxē' lē':

—Guyasa. Lēasca' bōnachi yōdzōlió naca' ca nacu' li'.

²⁷ Ni' tuí'isē' ca' didza', guyázatē' Pedro yu'u, en yōjxáquiē' nudúbigaca bōnachi zían ni'. ²⁸ Ní'irō Pedro gudxē' légaquiē', rnnē':

—Libí'ili' nōz quézili' ca rinná bē' xibá queē' Moisés, rnaa bití' ral-la' gunē' tu bönni' judío tsōzxón o tsázalenē' nu bönni' izá'a. Na'a, Dios buluí'inē' neda' bití' ral-la' inní'a' queē' nitúē' bönni' náquiē' cá'asō o bití' náquiē' dxi'a. ²⁹ Que lē' ni na' cate' bulídzali' neda', la' bídatea', en bití' guca chopá ládxa'a. Rinaba' na'a, ¿bizx que na' bulídzali' neda'?

³⁰ Ní'irō bubi'ë didza' Cornelio, gunné':

—Chiguca tapa dza ca zóaru' na'a, idú ridödi xihuó, cate' ni' runa' gubasa, en rulidza'-nē' Dios lu yu'u lidxa' ni, bilé'eda'-bi' tubi' bönni' ra'bán nácubi' lari' rēpi yōsa bení', dului'i lobi' neda'. ³¹ Caní gúdxibi' neda': "Cornelio. Dios riyōnnē' le rulidzu'-nē', en nōzinē' ca runu', rácalenu' yugu' bōnachi yechi'. ³² Na'a, isól-lu'u nu bönni' lu yōdzō Jope para tsōjlídzē' tu bönni' lē' Simón, zoa ia'tú lē' Pedro. Bönni' ni zoē' lidxē' tu bönni' runē' tsahui' guídi zxa bēdxi, en lē' ca' Simón. Zoa lidxē' bönni' ni ra' nísado'. Cate' idxinē' Pedro na' ga zu', usiyōnnē' li' didza' dxi'a." ³³ Caní guca, la' gusól-la'tea' nu tsōjlidza' li', ate' tsáhui'do' benu' bidu' ga zóatu' ni. Que lē' ni na' zóatu' ni yúgu'tētu', nudúbitu' lahuē' Dios para uzé' nágatu' le inná bé'enē' Dios li' innó'.

Didza' bē'ë Pedro lidxē' Cornelio

³⁴ Ní'irō gusí lahuē' Pedro ru'ë didza', rnnē':

—Le nácate réajni'ida' na'a, bití' ruyusē' Dios yöl-la' rinnēsō quégaca bōnachi, pero tuz ca rilé'enē' rē'u. ³⁵ Dios raza ládxē'ë bōnachi idútē yōdzōlió, nupa na' tadxi Lē', en tun le naca dxi'a. ³⁶ Gusól-lē'ë Dios xtídzē'ë ga nacué' bōnachi Israel, en gusól-lē'ë nu ben libán que didza' dxi'a, le run ga raca dxi'a quégaca bōnachi, lē' na' bidxín queéru' lu nē'ë Jesucristo. Lē' cazē' náquiē' Xanru' yúgu'tēru'. ³⁷ Libí'ili' nōz quézili' lē'

na' guca luyú Judea, le gusí lo guca luyú Galilea gudödi benë' libán Juan para ila'dila bönachi nisa. ³⁸ Nózili' ca benë' Dios le guca queë' Jesús, bönni' Nazaret. Gusól-lë'ë Dios Bö' Lá'ayi, en yöl-la' huáca queë' para sóalengaca Lë'. Nózili' ca na' gudé' Jesús, runë' le naca tsahui', en ruúnë' yúgu'të nupa gula'guí'i gula'zaca' lu na' tu' xihui'. Caní benë', tu' guzóalenë' Dios Lë'. ³⁹ Na'a, netu' runtu' ba nalí que yúgu'të lë na' benë' Jesús luyú Judea, en lu yödzö Jerusalén, en ca na' guca, gulútië' Jesús, cate' bulu'dé'ë Lë' lë'e yaga cruz. ⁴⁰ Ní'irö Dios busubanë' Lë' cate' guca tsonna dza nátië', en benë' ga buluí'i lahuë' ga zóatu' netu'. ⁴¹ Biti' buluí'i lahuë' lógaca yúgu'të bönachi, pero lotu' netu' buluí'i lahuë'. Dios guröë' netu' dza ni'te para guntu' ba nalí queë' Jesús, ate' güí'i gudágulentu' Lë' tsözxón gudödi bubanë' lu yöl-la' guti. ⁴² Gunná bé'enë' Dios netu' guntu' libán lógaca bönachi, ate' runtu' ba nalí queë' Cristo, náquië' Nu buzóa cazë' Dios para uchi'a usöröë' nupa nabángaca, en nupa chinátigaca. ⁴³ Lësca' yúgu'të bönni' gulu'ë didza' uláz queë' Dios gulunë' ba nalí queë' Jesús, gula'nnë': "Yúgu'të nupa ila'yéajlë' Lë', Dios uniti lahuë' dul-la' nabága'gaquië' ni'a que le benë' Lë'."

Dios Bö' Lá'ayi ridisóalenë' bönachi izá'a

⁴⁴ Ni' ruí'isë' caní didza' Pedro, la' bidxintë' Dios Bö' Lá'ayi, bidisóalenë' légaquië', yúgu'të nupa ni' ta'yöni libán runë' lë'. ⁴⁵ Gula'ná' badxë' bönni' judío ta'yéajlë'ë Cristo, nupa na' bila'dxín ni' tsözxón len Pedro, tu' bidë' Dios Bö' Lá'ayi, Nu na' nasól-lë'ë Dios Xuz. Bidisóalenë' bönachi ni' bití' nácagaca judío. ⁴⁶ Caní gulunë' tu' bila'yönnë' tu'ë bönni' zi'tu' na' didza' yúbölö, en tunë' Dios zxön. ⁴⁷ Ní'irö bë'ë didza' Pedro, gunné':
—¿Naru' huácatsö nu inná be'e bönachi ni para cabí ila'dila nisa? Naca bë' Dios Bö' Lá'ayi bidisóalenë' légaquië', ca na' bidisóalenë' netu'. ⁴⁸ Gunná bë'ë Pedro ila'dilë' nisa tu' nazí' lu ná'agaquië' Lë' Xanru' Jesús. Ní'irö yugu' bönni' ni' guláta'yuë' lahuë' Pedro ugá'analënë' légaquië' ca chopa tsonna dza.

Didza' bë'ë Pedro lógaca bönachi queë' Cristo nacuá' Jerusalén

11 ¹ Bila'yönnë' gubáz nasól-lë'ë Cristo, en bóchi'ru' nacu'ë luyú Judea ca na' bönni' bití' nácagaquië' judío gula'zí' lu ná'agaquië' xtídzë'ë Dios. ² Cate' budxinë' Pedro Jerusalén, bóchi'ru' judío gula'díl-lalenë' lë' didza'. ³ Gulé' Pedro:

—¿Bizx que yöjtsú'ulenu' bönni' bití' nácagaquië' judío, en gudágulenu' légaquië' tsözxón?

⁴ Ní'irö gusí lahuë' Pedro rusiyönnë' légaquië' idútë lë na' guca, rnnë':

⁵ —Guzóa' lu yödzö Joje, en cate' ni' rulidza'-në' Dios, bilé'eda' ca tu lu yëla béchigal tu le buluí'inë' Dios neda'. Bilé'eda' bötaj birúaj lúzhiba tu le naca ca tu lari' guitsa' zxön, naga' idapa la'a, ate' bidxín ga na'

zoa'. ⁶ Cate' ni' ruyúa' le para ilé'eda' le dxía láhuilö, bilé'egacada'-ba' böa' guixi' nacuá' tapa ní'agacaba', yugu' böa' guixi' sínia', en böa' tá'ayöj lé'egacaba' lu yu, en böa' zoa xíligacaba'. ⁷ Biyönda' chi'i nu gudxi neda': "Pedro, guyasa. Bëti-ba', en gudagu." ⁸ Ní'irö gudxa'-në': "Biti' ca', Xan. Catu caz gudahua' tu le cabí ral-la' gágutu', o tu le cabí naca dxi'a." ⁹ Ní'irö le buropi luzuí bulidza chi'i lúzxiba na' neda', en gudxi neda': "Le nunë' Dios dxi'a, biti' innó' biti' naca dxi'a." ¹⁰ Tsonna luzuí guca caní, ate' ní'irö idútë læ na' bilé'eda' la' buépité lúzxiba. ¹¹ La' ní'isö bila'dxintë' tsonnë' bönni' ra' yu'u ga na' zoa', narúajgaquië' yödzö Cesarea, nasól-lë'ë légaquië' tu bönni' læ Cornelio. Sududíljagaquië' neda'. ¹² Dios Bö' Lá'ayi gudxë' neda': "Guyéajlen légaquië', en cabí gaca chopá ladxu'u." Lësca' izxópatë' bóchi'ru' ni gula'zá'lenë' neda' tsözxón. Guyéajtu' Cesarea, ate' guyaztu' lidxë' tu bönni' zoë' ni'. ¹³ Bönni' ni' gudíxjöi'inë' netu' ca na' bilé'enë', bidxinë' tu gubáz lá'ayi queë' Dios lu yu'u lidxë'. Guzuínë' lahuë', en gudxë' læ': "Na'a isól-la'gacu'-në' bönni' tsöjáquië' yödzö Jope, tsöjlídzagaquië' Simón, zoa ia'tú læ Pedro. ¹⁴ Bönni' na' usiyönnë' li' naca gaca uló' li', en ulu'lágaca ca' yúgu'të bönachi nacuá' lidxu'." ¹⁵ Cate' ni' gusí lahua' ruí'ilenä' légaquië' didza', bidisóalenë' Dios Bö' Lá'ayi légaquië' ca na' bidisóalenë' rë'u zí'atëlö. ¹⁶ Ní'irö yöjneda' didza' na' bë'ë Xanru', gunné': "Le nácatë Juan buquilë' bönachi nisa lu nisa, pero libí'ili', gaca queé'li' le ruluí'isö yöl-la' ridila nisa na', idisóalenë' Dios Bö' Lá'ayi libí'ili'." ¹⁷ Que læ ni na', channö Dios gusól-lë'ë Dios Bö' Lá'ayi quégaquië', la' tuz ca benë' queë'ru' rë'u réajlë'ëru' Xanru' Jesucristo, ñnúzxitë neda' inná bé'eda'-në' Dios?

¹⁸ Ní'irö, cate' bila'yönnë' læ ni, gula'cuá' dxíë', en gula'gu'ë Dios yöl-la' ba, ta'nnë':

—Caní naca, Dios ru'ë lataj bönni' biti' nácagaquië' judío, tu'bí'i ladxí'gaquië' para ila'déli'në' yöl-la' na'bán idú.

Yugu' bönni' nacu'ë Antioquía ta'yéajlë'ë Cristo

¹⁹ Cate' ni' yugu' bönni' judío biti' ta'yéajlë'ë gulútië' Esteban, en gula'bía ladxí'gaquië' ia'zíca'rö bönachi ta'yéajlë' Cristo, bulu'zxunnaj bönachi ni, en gulásilasi zían yödzö luyú Fenicia, en luyú Chipre, en lu yödzö Antioquía. Gulunë' libán ni' que xtídzë'ë Dios, pero lógacasö bönachi judío. ²⁰ Yugu' bönni' Chipre, en yugu' bönni' Cirene, gula'cuá'lenë' légaquië', ate' yugu' bönni' ni, cate' bila'dxinë' lu yödzö Antioquía, gulu'ílenë' ca' didza' yugu' bönni' izá'a. Gulunë' libán lógaquië' que didza' dxi'a ca naca queë' Xanru' Jesús. ²¹ Yöl-la' huáca queë' Xanru' guzóalen légaquië', ate' bönachi zían gula'yéajlë' Xanru', en bulu'huóaca queë'.

²² Cate' bidxín didza' ca guca læ ni, ate' bila'yönnë' bönni' queë' Cristo nacu'ë Jerusalén, gula'sól-lë'ë Bernabé tséajë' Antioquía na'. ²³ Cate'

Bernabé na' bidxinë' Antioquía, bilé'enë' le ruzá' ládxë'ë Dios quégaquië', en budzéjanë'. Guchízië' icja nágagaquië' para ila'día'tica'së' queë' Xanru' idú ládxi'gaquië'. ²⁴ Náquië' Bernabé na' tsahui', en idú zóalenë' Dios Bö' Lá'ayi lë', en idú ládxë'ë réajlë'ë Cristo. Ni'a que libán benë' Bernabé na', bönachi zían lu yödzo na' gula'yéajlë' Xanru'.

²⁵ Gudödi ni', guyijë' Bernabé na' yödzo Tarso, yöjdiljë' Saulo. Cate' budzölinë' lë', buchë'ë lë' Antioquía. ²⁶ Idú ca tu iz gula'cu'ë ni', tunë' tsözxón bönachi queë' Cristo, en tu'sédinë' bönachi zían. Lu yödzo Antioquía na', gusí lo gula'zí' lágaquië' cristiano le rna len didza' xidza': Bönachi Queë' Cristo, nupa ni' ta'yéajlë' Lë'.

²⁷ Dza ni' bila'rúajë' Jerusalén, en yójáquië' Antioquía bal-lë' bönni' tu'ë didza' uláz queë' Dios. ²⁸ Guzuínë' Agabo, bönni' dzáguië' yugu' bönni' na', en uláz queë' Dios Bö' Lá'ayi buzéajni'inë' légaquië', gunné': —Si' gaca gubín idútë yödzölió.

Guca gubín na' cate' ni' rinná bè'ë Claudio, lu yödzo Roma. ²⁹ Ní'irö gula'zí' lu ná'agaquië' bönni' ta'yéajlë'ë Cristo nacu'ë Antioquía, ila'söl-lë'ë tsca le dësö que queégaquië', le gácalen bóchi'ru' nacu'ë luyú Judea. ³⁰ Caní gulunë', ate' lë na' bulu'nödzjë', gula'gu'ë lu ná'agaquië' Bernabé, en Saulo para ilu'ë le lógaquië' bönni' gula tapa chi'ë bönachi queë' Cristo nacu'ë Judea.

Tútië' Jacobo, en ta'gu'ë Pedro lidxi guíë

12 ¹ Dza na' Herodes, bönni' unná bè', benë' ga gula'zönë' bal-lë' bönni' queë' Cristo para ulu'saca' zi'ë légaquië'. ² Gunná bé'enë' bönni' gulútië' Jacobo, bóchë'ë Juan. Gulu'ë lë' guíë tuchi'. ³ Cate' gúquibe'enë' Herodes gula'yaza ládxi'gaquië' bönni' judío lë ni, benë' ga gula'zönë' ca' Pedro. Gulaca lë ni dza ni' raca laní cate' tahuë' yöta xtila biti' nazí'i cúa zi que. ⁴ Gudödi gula'zönë' Pedro, gula'gu'ë lë' lidxi guíë, en bulu'dödë' lë' lu ná'agaquië' tapa cö' bönni' rójáquië' gudil-la, nacu'ë tapë' tu huéaj cö' na', para uyúgaquië' lë'. Yu'u ládxë'ë Herodes ubéajë' Pedro lógaca bönachi tödi Laní Pascua, laní na' tu'subanë' ca benë' Dios, bubéajë' bönachi judío luyú Egipto. ⁵ Caní guca, nun chí'igacrë' Pedro lu yu'u lidxi guíë na', pero bönachi queë' Cristo bulu'lídzatica'sö Dios, ta'nábini Dios gácalenë' Pedro.

Dios rubéajë' Pedro lidxi guíë

⁶ Cate' si' idxín dza yu'u ládxë'ë Herodes ubéajë' Pedro lidxi guíë na', la' dzö' ní'isö dë' rásië' Pedro, ate' nacu'ë chopë' bönni' rójáquië' gudil-la cuita lë'ë Pedro na', en nuga'gaquië' lë' chopa du guíë. Gula'cu'ë ia'bal-lë' bönni' rójáquië' gudil-la tapa chi'ë ga nu riyaza lidxi guíë na'. ⁷ Tsárido'os buluí'i lahuë' tu gubáz lá'ayi queë' Xanru' ni', ate'

buzení'da' bení' lidxi guíë. Gudanë' gubáz lá'ayi na' cuita lè'ë Pedro, ate' busubanë' lè', en gudxë' lè':

—Guyaschi.

Ní'irö bulu'huédxi du guíë na' naga' ni'a në'ë Pedro. ⁸ Gubáz lá'ayi na' gudxë' lè', gunné':

—Béga' lè'u, en gudá' xirachu'.

La' bentë' Pedro caní. Ní'irö gubáz lá'ayi na' gudxë' lè', rnnë':

—Guxóa lari' cúdzu'u, en gudá len neda'.

⁹ Burúajë' Pedro, sa'yéajlenë' gubáz lá'ayi na', pero biti' réquibe'enë' nácatë le runë' gubáz lá'ayi na'. Gúquinë' yélasö rinenë'. ¹⁰ Cate' chigula'dödë' ga nacu'ë bönni' zí'alö, en bönni' buropi cö', bönni' na' rōjáquië' gudil-la tapa chi'ë, bila'dxinë' ga zoa le néquini guíë le nusayaj ga nu riyaza lidxi guíë na', ga nu rurúaj la' nöza que yödzö. Ga nu riyaza na', rácasö que gyalaj. Cate' bila'rúajë' ni', gula'zë'ë ga ridzaga ia'turö nöza, ate' ni' gubáz lá'ayi na' la' bulá'alentë' Pedro. ¹¹ Ní'irö réquibe'enë' Pedro, ate' lu icja ládxi'da'azë' gunné':

—Na'a chinözda' le nácatë gusól-lë'ë Xanru' gubáz lá'ayi queë', en busölë' neda' lu në'ë Herodes, en lu yúgu'të le gulé'ënnë' bönni' judío ilunë' quia'.

¹² Tsanni ni' yu'ë nöza Pedro, rizá' ládxë'ë ca naca lë na' guca, ate' bidxinë' lídxinu María, xiná'abi' Juan, bi'i na' zoa ia'tú labi' Marcos. Lu yu'u na' nudúbigaca bönachi zían ta'yéajlë' Cristo, en tu'lidza Dios.

¹³ Cate' bulidzë' Pedro ra' yu'u lö'a, birúajbi' bi'i nigula lëbi' Rode para inózibi' nuzxi na'. ¹⁴ Cate' búnbë'ëbi' bi'i nigula ni chi'ë Pedro, lu yöl-la' rudzeja queëbi' biti' gusaljbi' yu'u, pero carelö bóajbi' lu yu'u, yöjtíxjöi'ibi' nupa nacuá' ni', rnnabi':

—Zoë' Pedro ra' yu'u.

¹⁵ Ní'irö gulé' lëbi':

—Nachixi icju'.

Lëbi' tsútsurö ben xtídza'bi' naca caní. Ní'irö gula'nnë':

—Calëga lë'. Bixín queë' na'.

¹⁶ Tsanni na' biti' zoa dxíë' Pedro rulidzë' nupa nacuá' lu yu'u. Cate' gula'saljë' yu'u, gula'nítisinë' cate' bila'lé'enë' lë'. ¹⁷ Ní'irö guchisa në'ë Pedro para ila'cu'ë dxisö, ate' busiyönnë' légaquië' ca benë' Xanru', bubéajë' lë' lidxi guíë. Ní'irö gudxë' légaquië':

—Guli'siyönnë' ca' Jacobo, en yugu' bóchi'ru' ca na' guca.

Ní'irö burúajë' Pedro, sa'yéajë' ga yúbölö.

¹⁸ Cate' za' rení' dza na', bönni' rōjáquië' gudil-la gula'bö'ë böniga nacxi guca, bíti'rö yu'ë Pedro lidxi guíë. ¹⁹ Ní'irö gusól-lë'ë Herodes nupa tsöjxi'gaca Pedro. Cate' biti' bulu'dzólinë' lë', Herodes gunabi yúdxinë' yugu' bönni' na' rōjáquië' gudil-la, bönni' gulún chi'ë Pedro. Gudödi ni' gunná bé'enë' nupa bétigaca yugu' bönni' na' rōjáquië' gudil-

la. Ní'irö buzé'ë Herodes luyú Judea, sa'yéajë' Cesarea, ate' bugá'anë' ni'.

Ca gútië' Herodes

²⁰ Dza ní'isö rilenë' Herodes bönachi yödzö Tiro, en yödzö Sidón. Zí'alö bönachi lu xiyüë' Herodes na' gula'sól-la' le biyadzaj quégaca bönachi lu xiyúgaca yödzö Tiro, en Sidón na', pero tu' rilenë' Herodes légaquië', bíti'rö bi ta'sól-lë'ë quégacuië'. Ní'irö gulunë' tuz bönni' Tiro, en Sidón na', ate' gulunë' ga soë' Blasto uné quégacuië' lahuë' Herodes na'. Náquië' Blasto na' huen dxin nadéli'në' lataj lo lahuë' Herodes. Gulé'ënnë' bönni' Tiro, en Sidón na' ila'dxinë' lahuë' Herodes, para ila'nábinë' lë' ugá'ana tsahui' didza' bizxaj quégacuië'. ²¹ Ní'irö budxië' bë' Herodes dza yönnë' légaquië', ate' dza na' gurö'ë xilatjë' ga ruchi'a rusöröë' bi raca, nácuë' lari' nazaca', en benë' libán lógaquië'. ²² Ní'irö bulu'lidzë' zidzaj bönni' na', ta'nnë':

—iCalëga bönni'sö ni! iDios caz ni ru'ë didza'!

²³ La' ná'asö la' bë'të' gubáz lá'ayi queë' Xanru' lë' tu' buzi'ë lë cazë' yöl-la' ba ral-la' gaca queë' Dios. Ní'irö gurö'ë Herodes na' buzuga', ate' gútië' tu' táguba' lë'.

²⁴ Ní'irö guca libán que xtídzë'ë Xanru', ate' gula'yán nupa nazí' lu ná'agaca le.

Le zí'alö luzuí röjéngaquië' Bernabé, en Saulo libán

²⁵ Cate' Bernabé, en Saulo chibulu'dödë' dumí na' lu ná'agaquië' bönni' gula tapa chi'ë bönachi queë' Cristo nacu'ë Jerusalén, bulu'zé'ë ni', yöjhuójgaquië' yödzö Antioquía. Gula'ché'ë-bi' ca' bi'i Juan, zoa ia'tú labi' Marcos.

13 ¹ Dza ná'asö gula'cu'ë bönni' tu'ë didza' uláz queë' Dios, en bönni' tu'sédinë' bönachi lu yödzö Antioquía, tunë' tu zxön bönachi queë' Cristo lu yödzö na'. Caní légaquië':

Bernabé,

Simón, (lë' ca' Bönni' Gasja),

Lucio, (bönni' Cirene),

Saulo,

Manaén, (bönni' na' guzxónlenë' tsözxón Herodes, bönni' rinná bë'ë luyú Galilea).

² Tsanni ni' nudúbigaquië' bönni' ni queë' Xanru', en tunë' gubasa, Dios Bö' Lá'ayi gudxë' légaquië', rnnë':

—Guli'béaj-gáquië' quez quia' Bernabé, en Saulo para tsöjéngaquië' dxin na' bulidza' légaquië' ilunë'.

³ Budxi gulunë' gubasa, en gulu'ílenë' Dios didza', ní'irö gula'xóa ná'agaquië' chopë' ni, en gula'sól-lë'ë légaquië'.

Yugu' gubáz nasól-lè'ë Cristo tunë' libán luyú Chipre

⁴ Ní'irö yöjáquië' Bernabé, en Saulo yödzo Seleucia, tu' gusól-lè'ë Dios Bö' Lá'ayi légaquië' ni', ate' ni' gula'benë' tu lè'e barco le guché' légaquië' ga naca tu luyú bidxi lu nísado', nazí'i le Chipre. ⁵ Cate' bila'dxinë' lu yödzo Salamina luyú na', gulu'ë xtídzë'ë Dios gapa naca lu yu'u ga tu'dubë' bönni' judío luyú na', en tu'sedë' queë' Dios. Naché'gaquië'-bi' bi'i Juan para gunbi' légaquië' tu zxön. ⁶ Budxi gula'dödë' idú gapa dë yödzo' luyú bidxi na' lu nisa zxön, ní'irö bila'dxinë' yödzo Pafos. Yöjxáca'gaquië' Barjesús, tu bönni' judío ni'. Náquië' bönni' udzá' rinné yë'ë, en rnnë' ru'ë didza' uláz queë' Dios. ⁷ Bönni' ni dzáguië' Sergio Paulo, bönni' réajni'i rinná bë'ë. Bönni' unná bë' na' bulidzë' Bernabé, en Saulo, tu' ré'ënë' yönnë' xtídzë'ë Dios. ⁸ Ní'irö bönni' udzá' na' gudá'baguië' Bernabé, en Saulo, tu' gú'unnë' gunë' ga biti' tséajlë'ë Dios bönni' rinná bë'ë. Bönni' udzá' na' lë' ca' Elimas tsca naca xtídzä'gaca bönachi izá'a ga na'. ⁹ Ní'irö Saulo, lë' ca' Pablo, buzóa tsutsu lahuë', zóalenë' Dios Bö' Lá'ayi lë'. Ruyúë' Elimas na' ¹⁰ en rë' lë':

—Li', bönni' rizí' yë', en bönni' huiá' dö', nacu' ca zxí'ini caz tu' xihui', en bönni' biti' rilé'enë' dxi'a yúgu'të le naca tsahui'. ¿Naru' cabí soa dxitso' ca runu', ridá'bagu'u didza' tsahui' queë' Xanru', en ruzágu'u xinöza nu ré'ëni tséajlë' Lë'? ¹¹ Na'a, Xanru' usaca' zi'ë li', ate' ichul-la lo', en biti' ilé'enu' gubidza nababa dza.

La' guchúl-latë lahuë' Elimas na', ate' gudé' nilö ná'alö, riguiljë' nuzxi sön në'ë para iché' lë'. ¹² Cate' bilé'enë' bönni' unná bë' na' lë' na' guca, bubáninë' ca naca xtídzë'ë Xanru', ate' guyéajlë'ë Cristo.

Le gulunë' Pablo, en Bernabé lu yödzo Antioquía luyú Pisidia

¹³ Ní'irö buzé'ë Pablo lu yödzo Pafos na' len yugu' bönni' dzágagaquië' lë', nacu'ë tu lè'e barco, ate' bila'dxinë' yödzo Perge luyú Panfilia. Lu yödzo na' bi'i Juan bulá'alēnbi' légaquië', en bóajbi' Jerusalén. ¹⁴ Gudödi ni' bulu'zé'ë Perge na', en yöjáquië' yödzo Antioquía luyú Pisidia. Lu yödzo na', cate' ni' naca dza lá'ayi quégaquië' bönni' judío, gula'yázië' lu yu'u ga tu'dubë' tu'sedë' queë' Dios, ate' lu yu'u na' gula'bö'ë. ¹⁵ Ní'irö tu bönni' zoë' ni' bulabë' guichi ga nazúaj xibá queë' Dios, enca' le nazúaj lu guichi ca gula'nnë' bönni' gulu'ë didza' uláz queë' Dios. Gudödi ni' yugu' bönni' unná bë' que yu'u na' gula'sól-lè'ë nu yöjódx Saulo, en Bernabé, gunné':

—Libi'ili', bóchi'tu'. Channö nuá'ali' bi innali' le uzéajni'i netu', guli'nnë'.

¹⁶ Ní'irö guzuínë' Pablo, en guchisa në'ë para ila'cu'ë dxisö, gunné':

—Buli'zé' nágali' le guía' libí'ili', bönni' Israel, en libí'ili', núlöli' rádxili'-në' Dios. ¹⁷ Xanru' Dios, Nu ta'yéaj lādxi'gaca bönachi Israel,

guró cazë' xuz xtó'oru', en benë' ga gula'yándë'ë cate' ni' nácagaquië' bönni' zi'tu' luyú Egipto. Len yöl-la' huáca zxön queë' bubéajë' légaquië' luyú ni'. ¹⁸ Idú choá' iz Dios biá' gulénë' quégaquië' cate' ni' gula'dé' idú luyú bidxi lu lataj cá'asö. ¹⁹ Cate' budxi busunítië' gadxi cö' yödzö gula'cuá' luyú Canaán, bunödzejë' xiyúgaca bönachi ni' quégaquië' xuz xtó'oru'. ²⁰ Gudödi ni', le guca idú ca tapa gayuá' yu' chi-un iz, Dios bucu'ë yugu' bönni' bulu'chi'a bulu'söröë' légaquië' ga bidxintë zoë' Samuel, bönni' bë'ë didza' uláz queë' Dios. ²¹ Ní'irö gula'nábinë' Dios uzóë' tu bönni' unná bë' quégaquië'. Dios guróë' Saúl, zxí'inë' Cis, bönni' nababë' di'a dza queë' Benjamín. Idú ca choá' iz gunná bé'enë' Saúl na' légaquië'. ²² Gudödi ni' Dios gudúë' Saúl na', ate' buzóë' David quégaquië' para inná bë'ë. Dios benë' ba nalí queë' David ni, gunné': "Nözda' runë' David, zxí'inë' Isaí, le raza ládxa'a, en gunë' yúgu'të le ré'ënda' neda'." ²³ Ladaj zxí'ini xi'sóë' David na' benë' Dios ga guljë' Jesús para gáquië' bönni' usölë' bönachi Israel, ca na' guzxí' lu në'ë Dios zí'atëlö gunë'. ²⁴ Zí'alö cate' si' ilá' lahuë' Jesús, benë' Juan libán lógaca yúgu'të bönachi Israel para ulu'bí'i ládxi'gaca, en ila'dila nisa. ²⁵ Cate' ni' chizóa údxi gunë' libán Juan na', gunné': "¿Nuzxi réquili' naca' neda'? Biti' naca' Cristo, bönni' na' ral-la' guídë'. iNa'a, buli'yútsöca! Chizóë' idxinë' bönni' na' ga zoa' ni, ate' neda' bití' naca' lesaca' ilecja' xiráchuë' nudé'ë."

²⁶ 'Libí'ili', bócha'a, yugu' zxí'ini xi'sóë' Abraham, en nülöli' zóali' ni, en rádxili'-në' Dios. Dios caz gusól-lë'ë queë'li' didza' ni para uláli'.

²⁷ Nupa nacué' Jerusalén, en bönni' ta'nná bé'enë' légaquië' bití' bulu'únbë'ë Jesús, en bití' gula'yéajni'inë' le nazúaj lu guichi le gula'nnë' yugu' bönni' gulu'ë didza' uláz queë' Dios, sal-la' tu'labá cazë' yugu' didza' ni yugu' dza lá'ayi. Lu yöl-la' cabí réajni'i quégaquië' gulunë' ga budxín ca rnna didza' ni cate' ni' gula'chúguië' queë' Jesús gátië'. ²⁸ Sal-la' bití' budzöli le nabáguë'ë Jesús gátië', gula'nábinë' Pilato inná bé'enë' bönni' ilútië' Lë'. ²⁹ Cate' budxi gulunë' queë' yúgu'të le nazúaj lu guichi ca ral-la' gaca queë', bulu'zötjë' Lë' lë'e yaga cruz, en bulu'cáché'ë Lë' yeru ba. ³⁰ iNí'irö Dios busubanë' Lë' lu yöl-la' guti! ³¹ Zían dza bulu'í'i lahuë' Jesús lógaca nupa yöjácálen Lë' tsözxón cate' ni' buzé'ë luyú Galilea, en bidxinë' Jerusalén. Na'a, yugu' bönni' na' tunë' ba nalí queë' lógaca bönachi.

³² 'Caní naca, lësca' netu' ni rusiyöntu' libí'ili' didza' dxi'a ca naca lë na' guzxí' lu në'ë Dios gunë' quégaquië' xuz xtó'oru'. ³³ Lë na' guzxí' lu në'ë Dios quégaquië', Lë cazë' benë' ga budxín queë'ru', nácaru' zxí'ini xi'sóagaquië'. Caní benë' cate' busubanë' Jesús. Guca ca na' nazúaj lu guichi ga zoa salmo buropi, le rnna caní: "Li' nacu' Zxí'ina'. Neda' buzóa caza' Li'." ³⁴ Ca naca na', Dios busubanë' Lë' lu yöl-la' guti para cabí initi le naca cazë', Lë cazë' Dios gunné' caní: "Gunna' quiu' le nácagaca bica' ba guzxí' lu na'a lahuë' David." ³⁵ Que lë ni na' nazúaj ca' lu guichi, ga

zoa ia'tú salmo, le rnna caní: “Biti' gu'u lataj ugá'anë' bönni' lá'ayi quiu' ga initi le naca cazë'.” ³⁶ Le guca queë' David naca bë'. Gudödi benë' dxin lógaca bönachi uládz queë', ca na' gunná bé'enë' Dios læ', ní'irö gútië', ate' gula'gu'ë læ' yeru ba ga nacu'ë xuz xtá'ahuë', ate' guniti le naca cazë'. ³⁷ Na'a, ca naca queë' Jesús na', Dios busubanë' Lë', ate' bití' guniti le naca cazë' lu yeru ba. ³⁸ Libí'ili', bócha'a, ral-la' inózili' læ' ni rusiyöntu' libí'ili'. Dios runiti lahuë' libí'ili' ca naca dul-la' nabága'li' ni'a que le benë' Jesús ni. ³⁹ Na'a, Dios ruúnë' tsahui' yúgu'të nupa ta'yéajlë' Jesús, rugúë' yugu' dul-la' na' le cabí guca ugúa xibá queë' Dios, le bë'ë Moisés. ⁴⁰ Guli'gún chí'i cuinli' na'a para cabí gaca queëli' le nazúaj lu guichi le gula'nnë' bönni' gulu'ë didza' uláz queë' Dios, le rnna caní:

⁴¹ Buli'yútsöca', libí'ili', bönni' cabí tunë' neda' bal.

Ubánili', pero lu yöl-la' cabí réajlë' queëli' gátili'.

Neda' guna' tu dxin dza ni zóali',

en sal-la' nu uluí'i libí'ili' le ruluí'i dxin na', bití' ca' tséajlë'ëli'.

⁴² Cate' bulu'rúajë' Pablo, en yugu' bönni' na' dzágagaquië' læ' lu yu'u ga na' tu'dubë' bönni' judío, en tu'sëdë' queë' Dios, ní'irö bönachi ni' guláta'yu lógaquië' ulu'sëdinë' légaquië' ca naca læ' ni cate' idxín ia'tú dza lá'ayi quégaquië'. ⁴³ Cate' ni' bulu'rúajë' lu yu'u na' bönni' nudúbigaquië' ni', zían bönni' judío, en bönni' nuhuöácagaquië' judío, yugu' bönni' ta'yéaj ládxi'gaquië' Dios, gulunë' tsözxón Pablo, en Bernabé. Chopë' ni' gulu'ilenë' légaquië' didza', en bulu'së'ë ládxi'gaquië' para ilácatica'së' tsutsu, ilunë' löza le ruzá' ládxi'ë Dios quégaquië'.

⁴⁴ Ia'xunu' gubidza ca' cate' bidxín ia'tú dza lá'ayi quégaquië', bulu'dubë' látu'biqui' yúgutë bönachi lu yödzö na' para ila'yönnë' xtídzë'ë Dios. ⁴⁵ Ní'irö bulu'zxé'enë' bönni' judío bití' ta'yéajlë'ë, cate' bila'lé'enë' bönachi zían na', ate' gula'nnë' que didza' ru'ë Pablo, en gula'dá'báguë'ë le. ⁴⁶ Ní'irö lu yöl-la' rugu ládxi' quégaquië' Pablo, en Bernabé, gulé' yugu' bönni' judío na', ta'nnë':

—Ben bayudxi usiyöntu' libí'ili' zí'alö xtídzë'ë Dios, pero tu' rucá'anali' cá'asö didza' ni, en rusáca'li' queëli' bití' nácali' lesaca' sí'ili' yöl-la' na'bán idú ni, que læ' ni na', na'a uyéajtu' ga nacuá' bönachi izá'a. ⁴⁷ Lësca' caní gunná bé'enë' Xanru' Dios netu' guntu' libán queë' Cristo lógaca bönachi izá'a, en naca ca rnna didza' na' bë'ë Dios ca naca queë' Cristo, gunné':

Nuzóa' Li' para gacu' bení' quégaca bönachi izá'a,

en gacu' Nu usölá bönachi idútë yödzölió.

⁴⁸ Cate' bila'yöni bönachi izá'a nacuá' ni' didza' ni, bulu'dzéjanë', en gula'gu'ë Xanru' yöl-la' ba ni'a que xtídzë'ë, yúgu'të nupa ni' chinunë' Dios quéguequi gata' quéguequi yöl-la' na'bán idú. ⁴⁹ Caní guca, guzé xtídzë'ë Xanru', ate' bila'yöni bönachi yúgu'të yödzö nacuá' luyú ni'.

⁵⁰ Ní'irö bönni' judío biti' ta'yéajlë'ë na' gula'gú'u yól-lë'ë yugu' bönni' lo que yödzo ni' para cabí ila'lé'enë' dxi'a Pablo, en Bernabé. Lësca' caní gula'gú'u yól-lë'ë nigula lo ta'yéaj ládxi'nu Dios. Caní guca, gulunë' ga gula'bía ládxi'gaquië' Pablo, en Bernabé, ate' bulu'láguë' chopë' ni ní'ilö lu xiyúgaquië'. ⁵¹ Ní'irö Pablo, en Bernabé bulu'quínnejë' yu bëchtö da' la' lábagaquië' le ruluí'i nagá'ana xíguia' nabága'gaca bönachi lu yödzö na', ate' yöjáquië' lu yödzö Iconio. ⁵² Bulu'dzéjanë' bönni' yödzö Antioquía na', bönni' ta'yéajlë'ë Xanru', ate' guzóalenë' Dios Bö' Lá'ayi légaquië'.

Le gulunë' Pablo, en Bernabé lu yödzö Iconio

14 ¹ Cate' bila'dxinë' Pablo, en Bernabé yödzö Iconio, gula'yu'ë tsözxón lu yu'u ga tu'dubë' bönni' judío, en tu'sëdë' queë' Dios, ate' gulu'ë didza' ni'. Caní guca, zían bönachi judío, enca' zían bönachi izá'a gula'yéajlë' Cristo. ² Ní'irö bönni' judío biti' ta'yéajlë'ë gula'gú'u yól-lë'ë bal-lë' bönni' izá'a, para cabí ila'lé'enë' dxi'a bóchi'ru' ta'yéajlë'ë Cristo. ³ Tu' gula'yéajlë' bönachi zían na' Cristo, gula'cu'ë Pablo, en Bernabé ni' zían dza, ate' lu yól-la' rugu ládxi' gulu'ë xtídzë'ë Dios, tu' tu'zxóni ládxi'gaquië' Xanru'. Lë cazë' Xanru' bulu'e naca idútë li didza' tu'ë ca naca le ruzá' ládxi'ë Dios quégaca bönachi, tu' bë'ë légaquië' lataj gulunë' yugu' le taca bë', en le tun ga tu'bani bönachi. ⁴ Ní'irö bönachi lu yödzö na' bila'rúaj choplö. Bal-lë' gula'dé'ë bönni' judío biti' ta'yéajlë'ë, ate' ia'bal-lë' gula'dé'ë Bernabé, en Pablo, gubáz na' nasól-lë'ë Cristo. ⁵ Ní'irö bönni' judío biti' ta'yéajlë'ë na', en yugu' bönni' izá'a ni' gulunë' tuz bönni' ta'nná bé'enë' légaquië', ate' bulu'dubë' para ilu'ë dö' quégaguië' gubáz na' nasól-lë'ë Cristo, en ulu'ládxë' légaquië' guió. ⁶ Cate' téquibe'enë' Pablo, en Bernabé lë ni, bulu'zxúnnajë' ni', yöjáquië' yödzö Listra, en Derbe luyú Licaonia, ate' gula'dödë' yúgu'të yödzödo' idú gásibi'ilö ni', ⁷ gapa ni' gulunë' libán que didza' dxi'a ca naca queë' Cristo.

Tu'ládxë' Pablo guió lu yödzö Listra

⁸ Zoë' tu bönni' lu yödzö Listra biti' raca së'ë. Ró'ösë' ni' tu' cabí rizé'ë cate' ni' guljë', en catu caz guzë'e ni'ë. ⁹ Bönni' ni ruzé náguie' didza' ru'ë Pablo. Pablo buyúë' lë', en gúquibe'enë' réajlë'ë Cristo para huóáquië'. ¹⁰ Ní'irö Pablo bë'ë zidzaj didza', en rë' lë':

—Guzuí.

La' guxítitë' bönni' na', en guzë'e ni'ë. ¹¹ Cate' yugu' bönni' Listra bila'lé'enë' lë na' benë' Pablo, gula'sí lógaquië' tu'ë zidzaj didza' lu didza' tu'ë bönni' Licaonia na', ta'nné':

—iYugu' dios bönni' ni! iNuhuójtjagaquië' ga zóaru', en tu'luí'i cúngaquië' ca nácagaquië' bönni'!

¹² Gula'nné' Bernabé na' náquië' Júpiter, ca lë' dios lo quégaquië', ate' gula'nné' náquië' Pablo Mercurio, ia'tú dios quégaquië'. Caní gula'nné' tu' ru'ë didza' Pablo ca na' ta'nné' runë' Mercurio na'. ¹³ Zoa yudo' que Júpiter ga ni' nacu'ë, cuita nōza ga ni' ta'yaza bōnachi lu yōdzō na'. La' bidxintë' bixúz que Júpiter na', nachë'ë-ba' yugu' bēdxi, en nu'ë ca' yugu' bregui' yōj, ate' dzágagaca bōnachi zían lë'. Gul'éënnë' ilútië'-ba' bēdxi na' lógaquië' Pablo, en Bernabé para ila'yéaj lādxi'gaquië' légaquië' ca tunë' quégaca dios quégaquië'. ¹⁴ Cate' Bernabé, en Pablo, gubáz na' nasól-lë'ë Cristo, guléquibe'enë' lë ni, gula'chözë' lari' nácugaquië'. Tu'huí'ininë' tu' tunë' bōnni' ni le cabí ral-la' ilunë', ate' gula'xíti'ë, en yōjcu'ë gatsaj lāhui'lō bōnachi zían na', en gulu'ë zidzaj didza', tē' légaquië':

¹⁵ —¡Libí'ili' bōnachi! ¿Bizx que runli' caní? Lēasca' bōnni' ca libí'ili' nácatu', en riguíxjöi'itu' libí'ili' lë ni caz ral-la' ucá'anali', le cabí nácaté, para guéquili' queë' Dios ban. Dios ni benë' lúzxiba, en yōdzölió, en nísado', en yúgu'të le nacuá' tu tu lataj na'. ¹⁶ Yugu' iz chigula'dödi, gulún yúgu'të bōnachi ca rnнасö que queëguequi, ate' Dios biti' buzáguë'ë xinózguequi, ¹⁷ pero benë' ga gulaca le tun ba nalí queë', yugu' le nácagaca dxi'a benë' quégaquië'. Risól-lë'ë queëru' nisa guiój, en runë' ga ta'yán le rázaru'. Ruzölaj rudzé'enë' rë'u, en runë' ga rudzeja lādxi'ru'.

¹⁸ Sal-la' Bernabé, en Pablo gul'é légaquië' caní, cánnisö bila'déli'në' bulu'záguë'ë xinózguequi bōnachi zían na', para cabí ilútië'-ba' bēdxi na' lógaquië'.

¹⁹ Ní'irö bal-lë' bōnni' judío biti' ta'yéajlë'ë, narúajgaquië' Antioquía, en Iconio, bila'dxinë' ni', ate' gula'gú'u yól-lë'ë bōnachi zían na'. Ní'irö yúgu'të' bulu'ladxë' Pablo guiój, en gulá'ayöjë' lë' ní'ilö ra' yōdzö na', tu' téquinë' chinátie'. ²⁰ Ní'irö bulu'dubë' yugu' bōnni' ta'yéajlë'ë Cristo idú gásibi'ilö ga dë' Pablo. Guyasë' lë', en buázië' lu yōdzö na'. Cate' za' rení' ia'tú dza, burúajlenë' Bernabé, yōjáquië' yōdzö Derbe.

²¹ Lu yōdzö ni' gulunë' libán que didza' dxi'a ca naca queë' Jesucristo, ate' bōnachi zían ni' gula'yéajlë' Cristo. Gudödi ni' yōjhuójgaquië' Listra, en Iconio, en Antioquía. ²² Cate' gula'dödë' Bernabé, en Pablo yugu' yōdzö na', bulu'tipë' lādxi'gaquië' bōnni' ni' ta'yéajlë'ë Cristo, en bulu'sé'ë lādxi'gaquië' ulu'gá'anë' tsutsu ca na' ta'yéajlë'ë Lë'. Gul'é légaquië':

—Rë'u tsaza cázaru' ga rinná bē'ë Dios, run bayudxi quí'i sáca'ru' zían le gaca queëru'.

²³ Bulu'cu'ë yugu' bōnni' gula' ilún chi'ë bōnachi queë' Cristo tu cō' huéaj bōnachi ni' queë' Cristo. Cate' chigulu'íilenë' Dios didza', en gulunë' gubasa, ní'irö gula'gu'ë légaquië' lu nē'ë Xanru', Nu na' ta'yéajlë'ë.

Pablo, en Bernabé tu'dxinë' Antioquía luyú Siria

²⁴ Ní'irö Pablo, en Bernabé gula'dödë' luyú Pisidia, ate' bila'dxinë' luyú Panfilia. ²⁵ Budxi gulunë' libán que xtídzë'ë Cristo lu yödzö Perge, yöjáquië' yödzö Atalia. ²⁶ Bulu'zë'ë ni', ate' gula'benë' tu lë'e barco, en bulu'dxinë' yödzö Antioquía, ga na' nacu'ë bönni' queë' Cristo, bönni' na' gula'sól-lë'ë légaquië' tsöjéngaquië' libán, cate' ni' gula'gu'ë légaquië' lu në'ë Dios, Nu na' ruzá' ladxi' quégaquië' ilunë' xichinë', dxin na' chibudxi gulunë'. ²⁷ Cate' ni' bulu'dxinë' Antioquía, bulu'dubi bönachi queë' Cristo nacué' ni'. Ní'irö Pablo, en Bernabé bulu'siyönnë' légaquië' ca nácagaca le zxön benë' Dios lu ná'agaquië', enca' ca benë' Dios, bë'ë yugu' bönachi izá'a lataj ta'yéajlë' ca' Lë'. ²⁸ Pablo, en Bernabé bulu'gá'analënë' bönachi ni' ta'yéajlë' Cristo zían dza.

Tu'dubë' huen dxin queë' Cristo lu yödzö Jerusalén

15 ¹ Ní'irö bal-lë' bönni' narúajgaquië' luyú Judea bila'dxinë' yödzö Antioquía, ate' bulu'sédinë' böchi'ru', bönni' izá'a ni', ta'nnë':

—Channö cabí irugu lu xipéla'li' ca nalébitu' runtu' ca na' gunná bë'ë Moisés, biti' gaca uláli'.

² Ní'irö Pablo, en Bernabé gula'díl-lalenë' légaquië' didza', ate' gúcada' dzatsa. Gudödi ni', gula'böö' Pablo, en Bernabé len ia'bal-lë' bönni' böchi'ru' ni', para tsöjáquië' Jerusalén, en ila'dxinë' lógaquië' gubáz ni' queë' Cristo, enca' lógaquië' bönni' gula tapa chi'ë bönachi queë' Cristo ni', para iluí'ilenë' légaquië' didza' ca naca lë ni raza, tu'sédinë' bönni' na' bönachi le nachixi.

³ Ní'irö yugu' bönni' queë' Cristo nacu'ë Antioquía bulu'gu'ë légaquië' nöza, ate' gula'dödë' lu xiyú yödzö Fenicia, en luyú Samaria, ate' bulu'siyönnë' böchi' luzá'aru' yugu' lataj ni' ca guca, bulu'huóáquië' bönni' izá'a queë' Cristo. Lë ni ben ga bulu'dzéjanë' yúgu'të böchi' luzá'aru' ni'.

⁴ Cate' bila'dxinë' Pablo, en Bernabé lu yödzö Jerusalén, yugu' bönni' queë' Cristo nacu'ë ni', enca' yugu' gubáz nasól-lë'ë Lë', en yugu' bönni' gula tapa chi'ë gulunë' légaquië' bal. Pablo, en Bernabé bulu'siyönnë' légaquië' yúgu'të le benë' Dios lu ná'agaquië'. ⁵ Ní'irö gula'zuínë' bal-lë' bönni' yudo' fariseo, bönni' ta'yéajlë'ë Cristo, en ta'nnë':

—Run bayudxi irugu lu xipéla'gaquië' bönni' izá'a na' ta'yéajlë'ë Cristo, en inná bé'eru' légaquië' ilunë' ca rnna bë' xibá queë' Moisés.

⁶ Ní'irö bulu'dubë' gubáz nasól-lë'ë Cristo len bönni' gula tapa chi'ë bönachi queë', para ulu'chi'a ulu'söróë' lë ni raza. ⁷ Gudödi gulu'ë zían didza', guzuínë' Pedro, en gudxë' légaquië':

—Libi'ili', bócha'a. Nöz quézili' ca guca dza ni'te, Dios guró cazë' neda' para guna' libán lógaca bönachi izá'a para ila'yöni didza' dxi'a, en

ila'yéajlë' Cristo. ⁸ Dios, Nu nunbë' caz le yu'u icja ládxi'do'gaca bönachi, buzóë' le naca bë' runë' légaquië' bal, gusól-lë'ë Dios Bô' Lá'ayi quégaquië', ca na' gusól-lë'ë Lë' queëru'. ⁹ Biti' butsé'ë ca benë' quégaquië', en queëru', en lësca' bunë' dxi'a icja ládxi'do'gaquië' tu' ta'yéajlë'ë Cristo. ¹⁰ Na'a, ¿bizx que run leli'-në' Dios, rusubága'li' yua' xiyéngaca böchi' luzá'aru'? Yua' ni, le naca le ta'nná bë' xibá queë' Moisés, bití' guca guá'aru' rë'u, en bití' guca ilu'ë xuz xtó'oru' le. ¹¹ Rë'u ni, réajlë'ëru' nuláru' ni'a que le buzá' ládxi'ë Xanru' Jesús queëru', en ca na' nuláru' rë'u, ulu'lë' ca' légaquië'.

¹² Cate' budxi bë'ë Pedro didza' ni, yúgu'të' gula'cu'ë dxisö, ate' bulu'zë' nágagaquië' didza' gulu'ë Bernabé, en Pablo. Bulu'siyönnë' légaquië' yugu' le taca bë', en le tun ga tu'bani bönachi, yugu' le benë' Dios lu ná'agaquië' ga nacuá' bönachi izá'a. ¹³ Cate' Bernabé, en Pablo budxi gulu'ë didza' ni, bubi'ë didza' Jacobo, gunné':

—Libí'ili', bócha'a. Buli'zë' nágali' le guía' libí'ili'. ¹⁴ Simón Pedro chigudíxjöi'i quézinë' rë'u ca benë' Dios, bulu'e lahui yöl-la' huáca queë' le zí'alö luzuí lógaca yugu' bönachi izá'a para bubéajë' quez queë' bönachi nútsa'gaca ladjagaquië'. ¹⁵ Ca naca lë ni röjlózgaca xtídza'gaquië' bönni' gulu'ë didza' uláz queë' Dios, ca na' nazúaj lu guichi lá'ayi, rnna:

¹⁶ Dza tödi lë ni huöda', en uchisa' Nu inná bë',
bönni' na' tsázië' xilatjë' David.

Guna' ca run nu ruchisa tu yu'u naguinnaj.

Uchisa' ca' bönachi ila'cuá' lidxë', nupa nagá'anagaca.

Guna' ca run nu ruchisa tu zö'ö yexu'.

Caní uchisa' le gunná bë'ë David

¹⁷ para ulu'guilaj ia'zica'rö bönachi Xanru'.

Ulu'guilaj bönachi izá'a Lë',

ate' si' láguequi: Bönachi Queë' Dios.

¹⁸ Caní rnnë' Xanru',

Nu na' dza ni'te ben ga naca bë' yúgu'të lë ni.

¹⁹ 'Que lë ni na' runi neda' bití' ral-la' gun níguiru' bönachi izá'a, nupa tu'huóaca queë' Dios. ²⁰ Ral-la' uzúajru' lu guichi quégaquië' ulu'cá'anë' yugu' le bití' ral-la' ilahuë', le nadödi lógaca budó' guiój budó' yaga, en cabí ilunë' le ruá' dö', en cabí ilahuë' xipéla'gacaba' böa' guixi' bití' narúaj-gácaba' rön, en cabí ilahuë' xichönba' bíti'tës böa' guixi'. ²¹ Dza ni'te nacuá' yúgu'të yödzo nupa tun libán lu yu'u gapa tu'dubë' bönni' judío, en tu'sëdë' queë' Dios. Tunë' libán ni' que le buzúajë' lu guichi Moisés. Tu'laba cazë' le yugu' dza lá'ayi.

²² Ní'irö gula'yaza ládxi'gaquië' gubáz nasól-lë'ë Cristo, en bönni' gula tapa chi'ë, en yúgu'të bönachi queë' Cristo, ila'böö' bal-lë' bönni' ladjagaquië', en ila'sól-lë'ë légaquië' Antioquía. Tsöjácalenë' Pablo, en Bernabé. Chopë' na' gula'böö', légaquië' Judas, zoa ia'tú lë' Barsabás,

enca' Silas. Nácagaquië' bönni' lo ladjagaquië' bóchi'ru' ni'.

²³ Bulu'zúajë' lu guichi le bulu'dödë' lu ná'agaquië' ilu'ë, le rnna caní:

“Netu', gubáz nasól-lë'ë Cristo, en bönni' gula tun chi'ë, en yugu' bóchi'ru', rugápatu' libí'ili' Dios, bóchi'tu', nácali' bönachi izá'a zóali' Antioquía, en yugu' yödzö luyú Siria, en Cilicia. ²⁴ Biyónitu' ca tun bal-la bönachi bila'rúaj ga zóatu', nupa na' biti' nasól-la'tu'. Dutsá'agaquië' libí'ili' len le ta'nnë', en tu'bequi böniga icja ládxi'do'oli', tu' ta'nná bë'ë irugu lu xipéla'li', en gunli' ca rinná bë' xibá queë' Moisés. ²⁵ Que lë ni na' guyaza ládxi'tu' cate' chibén tuz xtídza'tu', gurötu' chopë' bönni', nupa isól-la'tu' para uduyúgaquië' libí'ili'. Guídlengaquië' Bernabé, en Pablo, nupa na' nadxí'iru'. ²⁶ Chiyöjáquië' Bernabé, en Pablo gapa guzóa bönadxi ilátië' tu' nadxí'iguequinë' Xanru' Jesucristo. ²⁷ Caní naca, risól-la'tu' Judas, en Silas ga zóali'. Chopë' ni ulu'siyönnë' libí'ili' lë ni ruzúajtu' lu guichi ni. ²⁸ Dios Bö' Lá'ayi bulu'ínë' netu' le raza ládxi'ë, en lësca' caní raza ládxi'tu' netu', biti' usubága'rötu' libí'ili' yua', le naca le rinná bë' xibá queë' Moisés, pero yugu' lë nisö run bayudxi gunli':

²⁹ Biti' gáguli' le nadödi lógaca budó' guiöj budó' yaga.

Biti' gáguli' rön.

Biti' gáguli' xipéla'gacaba' böa' guixi' biti' narúaj-gácaba' rön.

Biti' gunli' le ruá' dö'.

Channö gun chi'i cuinli' para gunli' ca rnna yugu' lë ni, gunli' dxi'a.”

³⁰ Caní guca, yugu' bönni' na' nasól-la'gaquië' bila'dxinë' Antioquía. Bulu'tubë' bönachi queë' Cristo nacuá' ni', ate' gula'gu'ë guichi na' lu ná'agaquië'. ³¹ Cate' chibudxi bulu'labë' le, bulu'dzéjanë' ca naca le nazúaj lu guichi na', le ruhué tsahui' légaquië'. ³² Tu' nácagaquië' Judas, en Silas bönni' tu'ë didza' uláz queë' Dios bulu'hué tsáhuë'ë légaquië', en bulu'tipë' ládxi'gaquië' bóchi'ru' ni', bulu'gunë' dxin didza' zían le gulu'ílenë' légaquië'. ³³ Gudödi bulu'dzénë' Judas, en Silas ni' nababa dza, ní'irö bóchi'ru' ni' bulu'zenë' légaquië' dxi'a didza' para tsöjhuóajgaquië' Jerusalén ga nacu'ë bönni' gula'sól-lë'ë légaquië'.

³⁴ Guyaza ládxi'ë Silas bugá'anë' Antioquía. ³⁵ Bulu'gá'anë' ca' Pablo, en Bernabé Antioquía na', ate' bulu'sédinë' bönachi, en gulunë' libán que xtídzë'ë Xanru'. Lësca' caní gulún zíanrö ca' bönachi.

Risí lahuë' Pablo röjenë' libán le buropi luzuí

³⁶ Gudödi nababa dza Pablo gudxë' Bernabé:

—Uyéajru' leyúbölö tsöjyúgacaru'-në' bóchi'ru' nacu'ë yúgu'të yödzö gapa chiyöjenru' libán que xtídzë'ë Xanru', para ilé'eru' nacxi raca quégaquië'.

³⁷ Gú'unnë' Bernabé ila'ché'ë-bi' bi'i Juan Marcos, tséajlenbi' légaquië', ³⁸ pero biti' guyaza ládxi'ë Pablo ila'ché'ë-bi' tséajlenbi' légaquië' tu' bulá'alénbi' légaquië' luyú Panfilia, en bíti'rö yöjénlenbi' légaquië' dxin queë' Xanru'. ³⁹ Biti' guca tuz xtídzä'gaquië' Bernabé, en

Pablo ga bidxintë bulu'lá'alenë' tuë' ia'túë'. Bernabé guché'ë-bi' bi'i Marcos, ate' gula'benë' tu lë'e barco, yöjáquië' luyú Chipre. ⁴⁰ Pablo guróë' Silas para tséajlenë' lë'. Ní'irö yugu' bóchi'ru' gula'gu'ë légaquië' lu në'ë Xanru', en gula'nábinë' Lë' uzá' ládxë'ë quégaquië', ate' bulu'zé'ë Pablo, en Silas ni'. ⁴¹ Gula'dödë' yugu' yödzö luyú Siria, en Cilicia, ate' bulu'tipë' ládxi'gaca bönachi queë' Cristo nacué' ni'.

Bi'i Timoteo runbi' tsözxón Pablo, en Silas

16 ¹ Gudödi ni' bila'dxinë' Pablo, en Silas yödzö Derbe, en yödzö Listra. Zóabi' tu bi'i bönni' ni', réajlë'ëbi' Cristo, lëbi' Timoteo. Nácabi' xxi'ininu tu nigula judío réajlë'ënu Cristo, pero xúzibi' biti' náquië' judío. ² Yugu' bóchi'ru' nacué' Listra, en Iconio tunë' ba nalí queébi', ta'nnë' runbi' le naca dxi'a. ³ Gú'unnë' Pablo tséajlenbi' bi'i ni lë', ate' gudélë'ë-bi', en guchúguië' lu xipéla'bi' ca tun bönachi judío. Caní benë' para cabí ila'nnë' queébi' bönni' judío nacué' yugu' yödzö ni', tu' nóziguequinë' yúgu'të' xúzibi' biti' náquië' judío. ⁴ Cate' Pablo, en nupa dzágagaca lë' gula'dödë' gapa nacué' yödzö ni', tu tu yödzö na' bulu'dödë' lu ná'agaquië' yugu' bóchi'ru' nacué' gapa ni' yugu' xibá na' gulunë' gubáz nasól-lë'ë Cristo, en bönni' gula tapa chi'ë bönachi queë', nacué' Jerusalén. Bulu'dödë' yugu' xibá ni lu ná'agaquië' para ilunë' ca rinná bë' xibá na'. ⁵ Caní guca, bönachi yúgu'të' cö' bönachi queë' Cristo bila'dipa ládxi'gaca ca naca le réajlë'ëru' Cristo, ate' gula'yán tu tu dza.

Tu bönni' Macedonia rulidzë' Pablo lu yëla béchigal

⁶ Pablo, en bönni' dzágagaquië' lë' gula'dödë' luyú Frigia, en luyú Galacia, tu' buzáguë'ë Dios Bö' Lá'ayi xinózgaquië', para cabí ilunë' libán que xtídzë'ë Xanru' luyú Asia. ⁷ Cate' bila'dxinë' luyú Misia, gulé'ënnë' tsöjáquië' luyú Bitinia, pero Dios Bö' Lá'ayi, Nu risól-lë'ë Jesús queëru', biti' bë'ë légaquië' lataj. ⁸ Ní'irö gula'dödë' gala' ga dë Misia, ate' yöjáquië' lu yödzö Troas. Neda' Lucas, ruzúaja' lu guichi lë ni, guzóa' Troas na', ate' yöjsóalena'-në' Pablo. ⁹ Lu yödzö ni' Dios buluí'inë' Pablo tu le bilé'enë' lu yëla béchigal. Tu bönni' Macedonia buluí'i lahuë' lë', zuínë', en ráta'yuë' lahuë' Pablo, rnnë': "Gudödi ladztu', lu xiyú Macedonia, en gúcalen netu'." ¹⁰ Cate' bilé'enë' Pablo lë ni, lë na' buluí'i lahui lë', la' bë' ládxi'tëtu' tséajtu' luyú Macedonia, tu' gúquibe'etu' Dios chibulidzë' netu' tsöjentu' libán que didza' dxi'a lógaca bönachi luyú ni'.

Le gulunë' Pablo, en Silas lu yödzö Filipos

¹¹ Ní'irö gurentu' lë'e barco, en buzá'atu' Troas. Gudóditu' lírá ga bidxintu' yödzö Samotracia, ate' gudödi ia'tú dza bidxintu' yödzö Neápolis. ¹² Buzá'atu' ni', ate' bidxintu' Filipos, yödzö na' nácarö lo ca yúgu'të yödzö nabábagaca tsólá'a ni' luyú Macedonia. Lu yödzö ni'

yugu' bönni' Roma nucuá'agaquië' bönachi uládz quégaquië'. Lu yödzö nisö guzóatu' nababa dza. ¹³ Cate' bidxín tu dza lá'ayi, birúajtu' lu yödzö, en guyéajtu' ra' yegu ga na' tu'dubi caz bönachi yödzö na', en tu'lidza Dios. Guró'ötu' ni', en busiyöntu' yugu' nigula nudúbigacanu ni' ca naca xtídzë'ë Xanru'. ¹⁴ Nútsa'nu ládjagacanu Lidia, tu nigula Tiatira. Nácanu nigula rúti'nu lari' xiná chul-la le nazáca'da'. Reaj ládxi'nu Dios, ate' buzé náganu didza' ru'ë Pablo, ate' Xanru' gúcalenë'-nu para guzxi' lu ná'anu didza' na' bë'ë. ¹⁵ Ní'irö bídílanu lënu nisa, ate' gula'dila ca' nisa bönachi nacuá' lídxinu. Gudödi ni' gúta'yunu lotu', gunnánu:

—Channö réquibe'eli' réajlë'a Xanru', guli'tsaza lidxa', en guli'sóa ni'. Bennu bayudxi ugá'anatu' ni'.

¹⁶ Ia'tú le guca tu dza tsanni ni' zéajtu' ga na' rulidztu'-në' Dios, birúajbi' dutságabi' tu bi'i nigula netu' yu'u lëbi' bö' le run ga rinné yá'abi'. Len yöl-la' rinné ya'a queébi' runbi' ga ta'zídë'ë dumí yugu' bönni' xanbi'. ¹⁷ Bi'i nigula ni sudunóbi'-në' Pablo, en netu', ruí'ibi' zidzaj didza', rnnabi':

—iYugu' bönni' ni tunë' xichinë' Dios nayépisëtë'rë'! iTu'siyönnë' libí'ili' naca gaca uláli'!

¹⁸ Caní benbi' zían dza. Cate' bíti'rö guyaza ládxë'ë Pablo, buécjë', en bulidzë' bö' na' yu'u lëbi', rnnë':

—Lu Lë' Xanru' Jesucristo, rinná bé'eda' li'. iBurúaj icja ládxi'do'obi' bi'i nigula ni!

La' ní'isö burúajtë bö' na'.

¹⁹ Cate' bila'lé'enë' xanbi' chiburúaj bö' na' run ga rinné yá'abi', en bíti'rö naca löza ila'zi'ë dumí ni'a queébi', que lë ni na' gula'zönë' Pablo, en Silas, ate' gula'ché'ë légaquië' lógaquië' bönni' yúlahui', nudúbigaquië' ga naca lu yé'ëyi. ²⁰ Bulu'cu'ë légaquië' lógaquië' bönni' yúlahui' na', ta'nnë':

—Yugu' bönni' ni nácagaquië' judío, en tunë' ga tu'tsatsa bönachi yödzö ni. ²¹ Tu'sédinë' le cabí ral-la' si' lu ná'aru', en biti' ral-la' gunru', tu' nabábaru' Roma.

²² Ní'irö bönachi zían ni' gula'dá'baga' Pablo, en Silas, ate' yugu' bönni' yúlahui' gula'nná bé'enë' nupa gula'lecja lari' nácugaquië' Pablo, en Silas, ate' gula'guínë' légaquië' gubá'ayi. ²³ Gudödi gula'guíndë'ë légaquië', gula'gu'ë légaquië' lidxi guíë. Gula'nná bé'enë' bönni' rusayjë' lidxi guíë na' gun chí'idë'ë légaquië'. ²⁴ Bönni' ni, cate' chigula'nná bé'enë' lë' caní, gulu'ë légaquië' lu yu'u lë'e dxi' lidxi guíë na', en gulu'ë ní'agaquië' yeru yaga ta'zón ní'agaquië'.

²⁵ Idú guluhuëla Pablo, en Silas tu'lidzë' Dios, en tul-lë' yöl-la' ba queë' Dios, ate' ta'yönnë' yugu' bönni' nadzúngaquië' lidxi guíë na'.

²⁶ Ní'irö tsárido'os gudödi budó' xzu' bach. Caní guca ga bidxintë guxzizi xilibi zö'ö lidxi guíë na', ate' la' gula'yáljatë yúgu'të gapa nu riyaza, ate' bulu'huédxi ca' yugu' du guíë nága'gaca bönni' nadzúngaquië' ni'.

²⁷ Bubanë' bönni' na' rusayjë' lidxi guié. Cate' bilé'enë' nayáljagaca gapa nu riyaza lidxi guié na', gulecjë' guié tuchi' queë' para guti cuinë', tu' réquinë' chibulu'zxúnnajë' bönni' nadzúngaquië' lidxi guié na'. ²⁸ Ní'irö Pablo zidzaj bulidzë' lë', gunné':

—iBiti' bi gúni cuinu', tu' zóatu' ni yúgu'tëtu'!

²⁹ Ní'irö bönni' na' gunabë' guí', ate' gudá'atë' lu yu'u lidxi guié na'. Guzxízidë'ë lu yöl-la' radxi, ate' biyéchuë' xiní'agaquië' Pablo, en Silas.

³⁰ Cate' chinubéajë' légaquië' lidxi guié na', gudxë' légaquië':

—Libi'ili', bönni', ¿bizxi ral-la' guna' para ulá'?

³¹ Légaquië' të' lë':

—Guyéajlë'ë Xanru' Jesucristo, ate' uló' li', en lësca' caní ulu'lágaca bönachi nacuá' lidxu'.

³² Guluí'ilenë' lë' didza' ca naca xtídzë'ë Xanru', dzágagaca lë' yúgu'të bönachi nacuá' lidxë'. ³³ La' ná'asö, ni' naca chi'i dzó'ölö la' guchë'të' légaquië', ate' yöjtibë' légaquië' ga dxíagaquië' huë'. Gudödi ni', la' bidílatë' nisa, ate' gula'dila ca' nisa yúgu'të bönachi nacuá' lidxë'.

³⁴ Ní'irö guchë'ë légaquië' lidxë', en bë'ë le gulahuë'. Rudzéjanë' lë', en tu'dzeja ca' yúgu'të bönachi nacuá' lidxë' tu' ta'yéajlë'ë Dios.

³⁵ Cate' za' rení' dza na', yugu' bönni' yúlahui' gula'sól-lë'ë ni'a ná'agaquië', ate' gulé' bönni' na' rusayjë' lidxi guié:

—Busán-gáquië' bönni' na'.

³⁶ Ní'irö bönni' na' rusayjë' lidxi guié gudíxjöi'inë' Pablo didza' ni, gunné':

—Gula'sól-lë'ë bönni' yúlahui' didza' usana' libí'ili'. Na'a, guli'ruáj, en buli'huóaj dxí'ado' ga rizóali'.

³⁷ Ní'irö birúajë' Pablo, en gudxë' yugu' ni'a ná'agaquië' bönni' yúlahui' na', gunné':

—Chigula'guínë' netu' lógaca bönachi sal-la' biti' narúguini queëtu' ca rinná bë' xibá, en gula'gu'ë netu' lidxi guié, ate' netu' ni nabábatu' Roma. ¿Naru' tu'santsë' netu' bagáchi'sö? iBiti' ca' gaca! iIlídigarë' légaquië' udusángaqië' netu'!

³⁸ Yöjhuójgaquië' ni'a ná'agaquië' bönni' yúlahui' na', en bulu'siyönnë' yugu' bönni' yúlahui' didza' ni, ate' légaquië' guládxinë' cate' bila'yönnë' nabábagaquië' Pablo, en Silas Roma. ³⁹ Cate' bila'dxinë' lidxi guié ni', guláta'yuë' lógaquië' Pablo, en Silas cabí ulu'subáguë'ë légaquië' xíguia'. Ní'irö gula'béajë' légaquië' lidxi guié na', en guláta'yuë' lógaquië' ulu'ruájë' yödzo na'. ⁴⁰ Ní'irö bila'ruájë' Pablo, en Silas lidxi guié na', ate' gula'yázië' lídxinu Lidia. Cate' chibila'lé'enë' bóchi'ru' nacu'ë ni', bulu'chízië' didza' icja nágagaquië', en la' bulu'zá'atë' ni'.

Yugu' bönachi Tesalónica tunë' dzatsa

17 ¹ Gula'dödë' Pablo, en Silas lu yödzo Anfípolis, en lu yödzo Apolonia, ate' bila'dxinë' lu yödzo Tesalónica, ga ni' zoa tu yu'u ga tu'dubë' bönni' judío, en tu'sedë' queë' Dios. ² Bugá'anë' Pablo ni' idú galaj dza, ate' ca run cazë', guyijë' ga zoa yu'u na' cate' naca dza lá'ayi quégaquië' bönni' judío, ate' bé'lenë' légaquië' didza'. ³ Buchila lá'anë', en bulu'ínë' légaquië' rusëdi le nazúaj lu guichi lá'ayi run bayudxi qui'i sáquë'ë Cristo, Bönni' na' tunë' löza bönni' judío udusölë' légaquië', ate' tödi gátie' ubanë' lu yöl-la' guti. Ní'irö Pablo gudxë' légaquië':

—iCaní guca queë' bönni' na' lë' Jesús, runa' libán queë' ga ni zóali'!
iBönni' ni náquië' Cristo!

⁴ Ní'irö bal-lë' gula'yéajlë'ë Cristo, ate' gulunë' tsözxón Pablo, en Silas. Lësca' caní zían bönni' izá'a, bönni' ta'yéaj ládxi'gaquië' Dios, gula'yéajlë'ë Cristo. Lësca' zían nigula lo gula'yéajlë'ënu Cristo. ⁵ Ní'irö yugu' bönni' judío biti' ta'yéajlë'ë, lu yöl-la' ruzxé'e quégaquië' Pablo, bulu'tubë' yugu' bönni' biti' nácagaquië' tsahui', bönni' ta'dasë' ca'. Cate' chibulu'túbë' bönachi zían, gulunë' ga gulún dzatsa idú lu yödzo na', ate' bayudxi gula'yázië' lidxë' Jasón para ulu'béajë' Pablo, en Silas lógaca bönachi na' tun dzatsa. ⁶ Cate' biti' bulu'dzólinë' Pablo, en Silas, gula'béajë' Jasón, en ia'zícá'rë' bóchi'ru' nacu'ë ni', ate' gula'chéë légaquië' lógaquië' bönni' yúlahui'. Gulu'ë zidzaj didza', ta'nnë':

—Yugu' bönni' na' nutsá'gaquië' bönachi idútë yödzölió chibila'dxinë' ca' ni. ⁷ Jasón ni gulu'ë légaquië' lidxë'. Yúgu'të bönni' ni ta'dá'baguë'ë xibá queë' César, bönni' rinná bé'enë' rë'u, ta'nnë': “Zoë' ia'túë' bönni' rinná bë'ë, lë' Jesús.”

⁸ Cate' bila'yönnë' yugu' bönni' lu yödzo, en yugu' bönni' yúlahui' na' lë ni, gula'bö'ë böniga. ⁹ Ní'irö, gudödi gula'zi'ë bönni' yúlahui' dumí le bulu'cá'anagarë' Jasón, en ia'zícá'rë' bönni' na', bulu'sanë' légaquië'.

Le gulunë' Pablo, en Silas lu yödzo Berea

¹⁰ Ní'irö yugu' bóchi'ru' ni' la' gula'sól-la'të' Pablo, en Silas, ni' naca chi'i dzó'ölö, ate' sōjáquië' yödzo Berea. Cate' bila'dxinë' ni', gula'yázië' lu yu'u ga tu'dubë' bönni' judío nacu'ë ni', en tu'sedë' queë' Dios.

¹¹ Gulácarë' tsahui' bönni' ni ca bönni' nacu'ë Tesalónica, tu' gula'z'í lu ná'agaquië' xtídzë'ë Xanru' idú ládxi'gaquië'. Yugu' dza bulu'labë' dxi'a le nazúaj lu guichi lá'ayi, para iléquibe'enë' channö nácatë lë na' rnnë' Pablo. ¹² Caní guca, zían bönni' judío gula'yéajlë'ë Cristo. Lësca' caní, zían bönni' izá'a, yugu' nigula lo, en yugu' bönni' gula'yéajlë'ë Cristo.

¹³ Ní'irö cate' guléquibe'enë' bönni' judío nacu'ë Tesalónica, lësca' riguíxjö'ë Pablo xtídzë'ë Dios lu yödzo Berea, yōjáquië' ni', en gulunë' ca' ni' ga gulún dzatsa bönachi zían. ¹⁴ Ní'irö yugu' bóchi'ru' ni' la'

gula'sól-la'të' Pablo, para tsejë' ga naca ra' nísado', pero bulu'gá'anasë' Silas, en bi'i Timoteo lu yödzö Berea. ¹⁵ Yugu' bönni' Berea na' gula'ché'ë Pablo lu yödzö Atenas. Ní'irö la' yöjhuó'gacatë' lu yödzö Berea, tu'ú'ë xtídzë'ë Pablo, para ilé' Silas, en bi'i Timoteo, tsöjácátë' ga ni' zoë' Pablo.

Le benë' Pablo lu yödzö Atenas

¹⁶ Tsanni ni' zoë' Pablo ribözë' Silas, en bi'i Timoteo, lu yödzö Atenas, ruhuí'ini ládxë'ë tu' rilé'enë' ta'yéaj ládxi'gaca yúgu'të bönachi yödzö na' yugu' budó' guió'j budó' yaga. ¹⁷ Que lë ni na' bé'lenë' bönni' judío, en bönni' ta'yéaj ládxi'gaquië' Dios didza' ga naca lu yu'u ga tu'dubë' tu'sëdë' queë' Dios. Yugu' dza bé'lenë' nupa ta'dá lu yé'ëyi didza' ca naca xtídzë'ë Cristo. ¹⁸ Bal-lë' bönni' dá'gaquië' le tu'sédinë' bönni' epicúreo, en le tu'sédinë' bönni' estoico guluí'ilenë' Pablo didza'. Bal-lë' gula'nnë':

—¿Bizxi ré'ënitsenë' innë' bönni' huë' didza' ni?

Ia'bal-lë' gula'nnë':

—Réquitu' náquië' nu run libán quégaca dios zi'tu'.

Caní gula'nnë' tu' runë' libán Pablo lógaquië' que didza' dxi'a queë' Jesús, en que yöl-la' rubán. ¹⁹ Ní'irö gula'guélë'ë në'ë Pablo, en gula'ché'ë lë' lu guí'a ga tu'dubë' tu'ë didza', nazí'i le Areópago, ta'nnë':

—¿Naru' huácatsö yónitu' didza' cubi ni rusiyönnu' netu'?

²⁰ Rusiyönnu' netu' le tun ga rubánitu'. Ré'ënitú' inó'zitu' bizxi rna didza' ni ru'u.

²¹ Bítirö ta'yaza ládxi'gaquië' ilunë' bönni' Atenas na', en bönni' izá'a nacu'ë ni', pero ila'yónisinë', en ilu'í'së' didza' tu le cubi.

²² Ní'irö guzuínë' Pablo gatsaj láhui'lö lö'a Areópago na', gunné':

—Bönni' Atenas, yúgu'të le rilé'eda' naca bë' reaj ládxi'da'ali' yugu' dios queéli'. ²³ Cate' gudöda' lu yödzö, en buyúgaca' yugu' le reaj ládxi'li', yöjxáca'a ca' tu nichu ga ni' nazúaj le rna caní: “Tu Dios, Cuntu Nu Nunbë' Lë'.” Dios na' reaj ládxi'li'-në' sal-la' biti' núnbë'ëli'-në', Dios ni runa' libán queë' loli'.

²⁴ 'iDios ni benë' yödzölió, en yúgu'të le nacuá' yödzölió ni! iNáquië' Xani yehua' yubá, en Xani luyú ni, en biti' ca' zoë' tu yudo' núngaca bönachi! ²⁵ Biti' bi riyadzaj queë' le gaca ulu'nödzaj bönachi, tu' runödzjë' Lë' cazë' quégaca yúgu'të bönachi yöl-la' na'bán, en yúgu'të le riquíniru'.

²⁶ Lë' benë' tuzë' bönni' ga zá'gaca yúgu'të bönachi izá'a para ila'cuá' idú yödzölió, en bulu'e dza ila'cuá', en gapa ral-la' ila'cuá'. ²⁷ Dios bucu'ë légaquië' para ulu'guiljë' Lë', channö nácati'tës ila'dzólinë' Lë' sal-la' ila'gán ila'zönsë'. Caní raca sal-la' biti' zoë' zi'tu' ga zóaru' tu turu'. ²⁸ Lë' cazë' runë' ga zóaru' nabanru', en bi gaca gunru', en le nácaru'. Naca ca na' gula'nnë' bal-lë' bönni' nútsa'gaquië' libí'ili', nupa

bulu'zúaj le do' rúl-lali', le ta'nná: “Di'a dza queë' Dios nácaru'.” ²⁹ Na'a, channö nácaru' di'a dza queë' Dios, biti' ral-la' innaru' náquië' Dios ca tu budó' guió'j budó' yaga, o tu le néquini oro, o plata, o guió'j, le núngaca bönachi ca naca tu le ta'guínnajsö ícjaguequi. ³⁰ Dios budödë' cá'asö yugu' le gulunë' lu yöl-la' biti' réajni'i quégaquië' yugu' iz chigula'dödi, pero na'a rinná bé'enë' yúgu'të bönachi idútë yödzölió ulu'bí'i ládxi'gaca. ³¹ Dios chinulu'ë tu dza cate' uchi'a usöröë' yúgu'të bönachi. Idú tsahui' naca ca uchi'a usöröë' légaquië' lu në'ë Jesús, bönni' na' buzóa cazë' Lë', ate' lógaca yúgu'të bönachi benë' tsutsu gaca caní tu' busubanë' Lë' lu yöl-la' guti.

³² Cate' bila'yönnë' didza' bë'ë Pablo ca guca, zoa nu bubán lu yöl-la' guti, bulu'titjë' bal-lë', ate' ia'bal-lë' gula'nnë':

—Yóniguetu' ia'tú lë ni ru'u didza' que.

³³ Ní'irö burúajë' Pablo gatsaj láhui'lö ga na' nacu'ë, söhuó'jë'. ³⁴ Bal-lë' gula'yéajlë'ë Cristo, en gulunë' tsözxón Pablo. Nútsë'ë Dionisio, bönni' areópago, ladjagaquië', ate' nútsa'nu ca' ladjagaquië' nigula na' lënu Dámaris. Ia'bal-lë' na' gula'yéajlë'ë ca' Cristo.

Le benë' Pablo lu yödzö Corinto

18 ¹ Gudödi guca lë ni, buzë'ë Pablo yödzö Atenas na', ate' guyijë' yödzö Corinto. ² Yöjxáquië' Aquilo, tu bönni' judío ni'. Guljë' bönni' ni luyú Ponto, en si' bidxíngazë' yödzö Corinto na'. Buzë'ë luyú Italia len nigula queë', lënu Priscila, tu' gunná bë'ë Claudio, bönni' unná bë', ulu'rúajë' yúgu'të bönni' judío yödzö Roma. Guyijë' Pablo ga nacu'ë Aquilo, en Priscila na' ³ tu' naca tuz dxin tunë' Aquilo, en Pablo. Bugá'analenë' légaquië', ate' tsözxón gulunë' dxin, tunë' yugu' yu'u guídido'. ⁴ Cate' nácacagaca dza lá'ayi quégaquië' bönni' judío, razië' Pablo lu yu'u ga tu'dubë' tu'sëdë' queë' Dios, ga ni' bé'lenë' légaquië' didza'. Gú'unnë' uluí'inë' yugu' bönni' judío, en yugu' bönni' izá'a nacu'ë ni', naca idútë li le riguíxjö'ë ca naca queë' Jesucristo.

⁵ Cate' bila'dxinë' Silas, en bi'i Timoteo ni', nuzá'agaquië' luyú Macedonia, nuguí'ide'enë' Pablo, runë' libán que xtídzë'ë Dios, en runë' ba nalí lógaquië' bönni' judío, rnnë':

—Jesús náquië' Cristo, Nu na' tunë' löza yugu' bönni' judío udusölë' légaquië'.

⁶ Cate' bönni' judío nacu'ë ni' gula'dá'báguë'ë xtídzë'ë, en gula'nnë' zi'ë que, ní'irö Pablo gudxibë' lari' nácuë' para uluí'inë' légaquië' bíti'rö nabáguë'ë lë' ni'a quégaquië', ate' gudxë' légaquië':

—La' cuínsili' nabága'li' xíguia' que yöl-la' guti queéli', calëga neda' nabága'a le. Na'a, uyija' ga nacuá' bönachi izá'a.

⁷ Ní'irö burúajë' Pablo ni', en guyijë' lidxë' Justo, bönni' reaj ládxië'ë Dios, ate' zoa lidxë' gal-la' ra' yu'u ga tu'dubë' bönni' judío, en tu'sëdë' queë' Dios. ⁸ Crispo, bönni' lo que yu'u ga na' tu'dubë' tu'sëdë' queë'

Dios guyéajlè'è Xanru' Jesús, ate' dzágagaca lè' yúgu'tè bönachi nacuá' lidxè'. Cate' bila'yönnè' xtídzè'è Dios, zían bönni' Corinto gula'yéajlè'è Cristo, ate' gula'dilè' nisa. ⁹ Ní'irö Lè cazè' Xanru' gudxè' Pablo lu yèla béchigal, gunné':

—Biti' gádxinu', en biti' su' dxisö, quíxjö'u xtídza'a, ¹⁰ tu' zóalen caza' neda' li', ate' cuntu nu uzapa' në'e li' para guá' dö' quiu', tu' néquiquequi quia' bönachi zían lu yödzö ni.

¹¹ Bugá'anè' Pablo ni' idú ca tu iz yu' gatsaj, ate' busédinè' légaquiè' xtídzè'è Dios.

¹² Cate' bidxín dza rinná bē'è Galión luyú Acaya, guláquiè' tuz bönni' judío biti' ta'yéajlè', ate' gula'dá'báguè'è Pablo, en gula'ché'è lè' ga rō'è ruchì'a rusörōè' Galión na'. ¹³ Gulé' Galión na':

—Bönni' ni rigú'u yól-lè'è bönachi para ilunè' bal Dios, ca ridá'baga' xibá queétu'.

¹⁴ Cate' chizóa gu'è didza' Pablo, Galión na' gudxè' yugu' bönni' judío, rnnè':

—Libí'ili', bönni' judío, la'tu' guca tu le riguitsaj xibá queè' César, o tu le ruá' dö', guá' ilena' uzé naga' xtídza'li' ca ral-la' guna', ¹⁵ pero channö naca didza' bizxaj que dídza'sö, o que lágaca bönachi, en ca naca xibá queézili', guli'cá'ana tsahui' libí'isili', tu' cabí ré'ènda' neda' gaca' nu uchi'a usöró yugu' le caní.

¹⁶ Ní'irö Galión bulágui'è légaquiè' lu yu'u yúlahui'. ¹⁷ Ní'irö yúgu'tè bönni' uládz na' gula'guélè'è Sóstenes, bönni' lo que yu'u ga tu'dubè' bönni' judío, en tu'sèdè' queè' Dios, ate' gula'guínè' lè' lö'a yúlahui', pero biti' bē' lādxè'è Galión lè na' raca.

¹⁸ Pablo bugá'anè' lu yödzö na' zían dza, ate' gudödi busiyönnè' bóchi'ru' nacu'è ni' didza', guyijè' yödzö Cencrea, ga ni' benè' yútusö icjè', tu' dē tu le nazí' lu në'è lahuè' Dios gunè'. Ní'irö gurenè' tu lè'e barco, para tsejè' luyú Siria, dzágagaquiè' lè' Priscila, en Aquilo. ¹⁹ Cate' bila'dxinè' yödzö Éfeso, Pablo bulá'alenè' légaquiè' ni'. Guyáziè' lu yu'u ga tu'dubè' bönni' judío, en tu'sèdè' queè' Dios, ate' bé'lenè' nupa nacuá' ni' didza'. ²⁰ Yugu' bönni' ni' guláta'yuè' lahuè' Pablo ugá'analenè' légaquiè' ia'lati' xidzé, pero lè' biti' gú'unnè'. ²¹ Bé'lenè' légaquiè' didza', gunné':

—Run bayudxi soa' gapa' laní si' gaca Jerusalén, ate' leyúbölö huöda' ga ni zóali', channö gué'ènnè' Dios.

Ní'irö gurenè' Pablo tu lè'e barco, en buzé'è Éfeso na'.

Ridxinè' Pablo Antioquía, ate' risí lahuè' röjenè' libán le bunni luzuí

²² Gudödi bidxinè' Pablo yödzö Cesarea, gurenè' guyijè' Jerusalén, ga ni' yöjyúè' bönachi queè' Cristo, ate' ní'irö buzé'è ni', en guyijè' Antioquía. ²³ Gudödi zoè' ni' nababa dza, buzé'è ni', sa'yéajè' tu tu

yödzö luyú Galacia, en Frigia. Benë' tsutsu bóchi'ru' nacu'ë ni' ca naca le ta'yéajlë'ë Cristo.

Runë' libán Apolos lu yödzö Éfeso

²⁴ Tu dza ni' bidxinë' Apolos, tu bönni' judío lu yödzö Éfeso. Guljë' bönni' ni lu yödzö Alejandría, en nabé'ede'enë' ru'ë didza', en nazédadë'ë le nazúaj lu guichi lá'ayi. ²⁵ Chinazëdë' bönni' ni ca naca le réajlë'ëru' Xanru'. Idú ládxë'ë bë'ë didza', en ca nácatë busédinë' bönachi ca naca queë' Jesús, sal-la' núnbë'ë tuz le ruquíla bönachi nisa ca benë' Juan. ²⁶ Gusí lahuë' Apolos ru'ë didza' idú ládxë'ë ga naca lu yu'u ga tu'dubë' bönni' judío, en tu'sëdë' queë' Dios. Cate' Priscila, en Aquilo bila'yönnë' didza' ru'ë Apolos na', gula'ché'ë lë' quez, en bulu'zéajni'irönë' lë' xibá queë' Dios. ²⁷ Cate' gú'unnë' Apolos tödë' luyú Acaya, bulu'tipë' ládxë'ë, ate' bulu'zúajë' tu lu guichi le tsöjuá'gaquië' quégaquië' bönni' teaj ládxë'ë Cristo luyú Acaya na', para ilunë' Apolos na' bal. Cate' bidxinë' Apolos luyú na', yugu' bönni' ni' teaj ládxë'ë Cristo bulu'zídë'ë xibé didza' ru'ë Apolos na', tu' ruzá' ládxë'ë Dios quégaquië'. ²⁸ Caní guca, tu' bucul-lë' Apolos na' yugu' bönni' judío ni' lógaca yúgu'të bönachi, tu' bugunë' dxin le nazúaj lu guichi lá'ayi, en bulu'e bönni' na' Jesús naca cazë' Cristo.

Le benë' Pablo lu yödzö Éfeso

19 ¹ Tsanni ni' zoë' Apolos lu yödzö Corinto, gudödë' Pablo gapa nacuá' yödzö ia'lati' ra'lö, ate' bidxinë' Éfeso. Yöjxáquië' bal-lë' bönni' ta'yéajlë'ë Cristo ni'. ² Pablo gunábinë' légaquië', rnnë':

—¿Naru' bidisóalenë' Dios Bö' Lá'ayi libí'ili' cate' ni' guyéajlë'ëli' Cristo?

Gulë' lë':

—Biti' nayónitu' channö zoë' Dios Bö' Lá'ayi.

³ Ní'irö Pablo gunábinë' légaquië', rnnë':

—¿Nacxi guca le bidílali' nisa?

Ta'nnë':

—Ca buquílë' Juan bönachi nisa.

⁴ Pablo gunné':

—Buquílë' Juan bönachi nisa, nupa ni' bulu'bí'i ládxi'guequi, ate' Juan caz gudxë' léguequi ral-la' ila'yéajlë' Bönni' na' si' zá'tëlë' ca lë', ate' Bönni' ni naquië' Jesús, Lë' Cristo.

⁵ Cate' yugu' bönni' na' bila'yönnë' didza' ni ru'ë Pablo, bila'dilë' nisa tu' chita'yéajlë'ë Xanru' Jesús. ⁶ Cate' guxóa në'ë Pablo légaquië', en ni' rulidzë' Dios, bidisóalenë' Dios Bö' Lá'ayi légaquië', ate' gulu'ë didza' yúbölö, en gulu'ë didza' uláz queë' Dios. ⁷ Guláquië' bönni' ni idú chínnuë'.

⁸ Guzóë' Pablo idú ca tsonna beo' ni', ate' guyázië' lu yu'u ga tu'dubë' bönni' judío, en tu'sëdë' queë' Dios, ate' lu yöl-la' rugu ladxi' benë' libán lógaquië'. Bé'lenë' légaquië' didza', en gú'unnë' uluí'inë' légaquië' nácatë le riguixjö'ë ca rinná bè'ë Dios. ⁹ Ní'irö bizídi icja ládxi'do'gaquië' bal-lë', en biti' gula'yéajlë'ë Cristo, ate' gula'nnë' zi'ë que xtídzë'ë Xanru' ga nacuá' bönachi zían na'. Ní'irö Pablo bulá'alenë' légaquië', ate' bubéajë' quez nupa ta'yéajlë' Cristo. Bé'lenë' bönachi ni ta'yéajlë' Cristo didza' yugu' dza ga na' tu'dubë' lu yu'u ga rusédinë' Tiranno bönachi. ¹⁰ Caní béntica'së' Pablo idú ca chopá iz, ate' caní guca, bila'yöni yúgu'të bönachi didza' ca naca queë' Xanru' Jesús, bönachi nacu'ë yugu' yödzö luyú Asia, bönachi judío, en bönachi izá'a. ¹¹ Dios benë' yugu' yöl-la' huáca zxön lu në'ë Pablo. ¹² Caní guca, bal-lë' bönni' gula'zi'ë yugu' lári'do' béguë'ë icjë' Pablo, en yugu' lari' tsölá'a bugalë' lë'ë, ate' yöjuá'gaquië' léguequi gapa nacuá' nupa te'e, ate' bulu'huóáquië' ca naca yödzöhuë' que queégaquië', en bulu'rúaj bö' xihui' yú'ugaca bönachi na'.

¹³ Ní'irö bal-lë' bönni' judío udá dzaga tu'béajë' bö' xihui' gulé'ënnë' ulu'gunë' dxin Lë' Xanru' Jesús para ulu'béajë' yugu' bö' xihui' yú'ugaca bönachi, ta'nnë':

—Ni'a que Lë' Jesús, Nu na' runë' libán que Pablo, rinná bé'etu' libí'ili' urúajli'.

¹⁴ Caní gulunë' gadxi bönni' zxí'inë' Esceva, tu bönni' judío náquië' bönni' lo ládjagaquië' bixúz unná bë'. ¹⁵ Bubí'i didza' bö' xihui' na', gunná:

—Núnbë'a-në' Jesús, en núnbe'eda' bönni' lë' Pablo, pero libí'ili', ñnúzxitë libí'ili'?

¹⁶ Ní'irö guxíti'ë bönni' na' yu'u lë' bö' xihui', yöjenë' légaquië' zi', en bucul-lë' yúgu'të', tu' guzxéqui'rönë' ca légaquië'. Caní guca, xiguídigacasë', en hué'gacatzë' bulu'zxúnnajë' gadxë' bönni' na' lu yu'u ni'. ¹⁷ Guzë' didza' ca guca lë' ni, ate' bila'yöni yúgu'të' nupa nacuá' lu yödzö Éfeso, bönachi judío, en bönachi izá'a, ate' yúgu'të' guládxinë' Dios. Que lë' ni na' gulunë' zxön Lë' Xanru' Jesús.

¹⁸ Lësca' bila'dxinë' zían bönni' ta'yéajlë'ë Cristo, en gula'xóalëpë' dul-la' nabága'gaquië', en gula'guíxjö'ë le chigulunë'. ¹⁹ Lësca' caní gulunë' zían bönni', zí'alö gulunë' yöl-la' udzá'. Dujuá'agaquië' yugu' guichi udzá' quégaquië', ate' bulu'zégui'ë léguequi lógaca yúgu'të' bönachi. Bulu'labë' tsca nazáca'gaca guichi na', le guca idú chi un mil dumí plata. ²⁰ Caní guca, guzëda' xtídzë'ë Xanru', en bidéli'da' bönachi zían. Idú ládxi'gaquië' gula'yéajlë'ë Cristo.

²¹ Gudödi gulaca lë' ni, benë' queë' Pablo tsejë' Jerusalén, pero zí'alö ral-la' tödë' yugu' yödzö luyú Macedonia, en luyú Acaya, ate' gunné':

—Tödi tseja' Jerusalén, run bayudxi tseja' ca' Roma.

²² Ní'irö gusól-lè'ë-bi' chópabi' bi'i bönni' tácalenbi' lè', lé'gcabi' Timoteo, en Erasto, luyú Macedonia, pero bugá'anè' lè' nababa dza luyú Asia na'.

Tu'tsatsa bönachi lu yödzö Éfeso

²³ Bulu'tsatsa bönachi Éfeso dza ni', ate' gula'dá'baguè'ë xtídzè'ë Xanru'. ²⁴ Benè' Demetrio, bönni' gubèdxi guíë plata ga bulu'tsatsè'. Run cazè' yugu' lidxi budó' guiój budó' yaga néquiquequini plata que dios quégaquiè', lènu Diana. Gula'zi'è bönni' tunè' dxin ni dumí bach.

²⁵ Butubè' Demetrio na' ia'zíca'rè' bönni' tunè' la' dxin nisö, ate' gudxè' légaquiè':

—Böcha'a, nöz quézili' ca naca dxin runru', runna dumí queéru'.

²⁶ Rilé'eli', en riyónili' ca runè' Pablo na'. Calégasö Éfeso ni, pero idú luyú Asia chibidéli'nè' bönachi zían, ate' chibutsé'ë ca tunè', tu' rè' légaquiè': “Yúgu le núngaca bönachi biti' nácagaca dios.” ²⁷ Calégasö zoa bönadxi ugá'ana cá'asö dxin ni runru', pero lësca' zoa bönadxi ugá'ana cá'asö yudo' que dios zxön lènu Diana. Caní gaca, ugá'ana cá'asö yöl-la' zxön queénu, dios ni ta'yéaj ládxi'gaca-nu bönachi idútè luyú Asia, enca' idútè yödzölió.

²⁸ Cate' yugu' bönni' na' bila'yönnè' didza' ni, gula'léde'enè', ate' gulu'è zidzaj didza', ta'nné':

—Nácatèrönu zxön Diana, dios queéru' rè'u, bönachi Éfeso.

²⁹ Caní guca, bulu'tsatsa bönachi idútè lu yödzö na', ate' guláquiè' tuz, en carelö yójáquiè' lö'a yúlalui'. Gulá'ayöjè' Gayo, en Aristarco, bönni' Macedonia túngaquiè' Pablo tsözxón, ga ni'. ³⁰ Cate' gú'unnè' Pablo tsáziè' ga nacuá' bönachi zían na', biti' ca' gulu'è lè' lataj bönni' ta'yéajlè'ë Cristo. ³¹ Lësca' caní gulunè' bal-lè' bönni' yúlalui' que luyú Asia, bönni' ta'lé'enè' Pablo dxi'a. Gula'sól-lè'ë queè' nupa guláta'yu lahuè' biti' tsaziè' lö'a yúlalui' na'. ³² Ga ni' tu'tsatsè', en ta'bódxì'è, tu le ta'nné' bal-lè', en ia'tú le ta'nné' ia'zíca'rè', tu' ró'ögacasè' baröli bönni' zían na' tu'tsatsè', en lá'tu'biqui' yúgu'tègaquiè' biti' nózguequinè' bizx que na' nudúbigaquiè' ni'. ³³ Ní'irö yugu' bönni' judío gula'béajè' Alejandro ladaj bönachi zían na', ate' bulu'dxíguè'è lè' lógaca bönachi zían na'. Bulu'e Alejandro na' len në'ë para ila'bó' dxisö, tu' gú'unnè' gu'è didza' le gácalen yugu' bönni' judío na' lógaca yúgu'tèguequi. ³⁴ Cate' guléquibe'enè' náquiè' judío, yúgu'tè' gulu'è tsözxón zidzaj didza' idú ca chopa hora, ta'nné':

—iNácatèrönu zxön Diana, dios queéru' rè'u bönachi Éfeso!

³⁵ Ní'irö bönni' uzúaj que yúlalui' benè' ga gula'bó' dxisö bönachi zían na', gunné':

—Bönni' Éfeso, nózigaca yúgu'tè bönachi zoa yudo' queénu Diana, dios zxön, ni. Rè'u ni, bönachi Éfeso, run chí'iru' yudo' na', enca' budó' na' böxaj ga zóaru', le birúaj lúzxiba. ³⁶ Cuntu nu gaca tá'baga' lè ni.

Que lë ni na' run bayudxi sóali' dxisö, en biti' bi gúntëzili'.

³⁷ Naché'gacali'-në' bönni' ni, en biti' ta'banë' le dzö'ö yudo', en biti' ta'nné xihuë'ë queénu dios queéli'. ³⁸ Que lë ni na', channö zoa didza' bizxaj quégaquië' Demetrio, en yugu' bönni' gubëdxi guié plata nacua'lenë' lë', len núti'tës bönni', dë lataj ga nu uzé nagui légaquië', en zoa nu uchi'a usöró légaquië'. Ni' huáca ulu'zegui luzá'agaquië' didza' tuë' ia'túé'. ³⁹ Na'a, channö dë ia'tú le inábali', huáca ucá'anaru' tsahui' le cate' ulu'dubi bönni' yúlahui' ca na' rinná bë' yúlahui'. ⁴⁰ Zoa bönadxi nu uzegui rë'u didza' ni'a que dzatsa ni guca na'a, inná ridá'baga'ru' yúlahui'. Biti' bi gaca innaru' bizx que guca dzatsa ni.

⁴¹ Cate' budxi bë'ë didza' ni, busól-lë'ë bönachi zían na' nudúbigaca ni' tsöhuóigaca lídxiguequi.

Sa'yéajë' Pablo luyú Macedonia, en luyú Grecia

20 ¹ Cate' guró'ö dxi dzatsa na' guca lu yödzö Éfeso, bulidzë' Pablo yugu' bönni' ta'yéajlë'ë Cristo, ate' guchízië' icja nágagaquië' didza'. Gudödi ni' bunidë' légaquië', en la' bulá'alentë' légaquië'. Birúajë' ni', ate' sa'yéajë' luyú Macedonia. ² Gudödë' yugu' yödzö luyú ni', ruzéajni'ide'enë' bóchi'ru' nacué' ni', ate' gudödi ni' bidxinë' luyú Acaya. ³ Guzöë' Pablo ni' idú ca tsonna beo'. Cate' chizóa cuenë' tu lë'e barco para tsejë' luyú Siria, gúquibe'enë' ta'bó' nísie' bönni' judío lë' para ila'zönë' lë'. Que lë ni na' buguélë'ë nöza söhuóje' luyú Macedonia, ate' bidxinë' yödzö Filipos. ⁴ Sópater, zxí'inë' Pirro, bönni' Berea, en Aristarco, en Segundo, yugu' bönni' Tesalónica, en Gayo, bönni' Derbe, enca' bi'i Timoteo, en Tíquico, en Trófimo, yugu' bönni' Asia, sōjácalenë' tsözxón lë'. ⁵ Ní'irö yugu' bönni' ni yöjnórugaquië' lahuë' Pablo, yöjáquië' yödzö Troas, ga ni' gula'bözë' lë'. ⁶ Lu yödzö Filipos na', neda', Lucas, yöjtsaga'-në' Pablo. Cate' chigudödi laní cate' tahuë' bönni' judío yöta xtila biti' nazí'i cúa zi que, gurentu' tu lë'e barco, en buzá'atu' Filipos na'. Gudödi gayu' dza budzágatu' bönni' ni' yöjnórugaquië' lahuë' Pablo, yöjáquië' Troas, ate' ni' bugá'anatu' gadxi dza.

Le benë' Pablo lu yödzö Troas

⁷ Dza risí lo le gadxi dza bulu'dubë' bönni' ta'yéajlë'ë Cristo para ilahuë' yöta xtila le rusá' ládxi'ru' ca gútië' Jesucristo. Ni' rusédinë' Pablo légaquië', en tu' ral-la' uzé'ë ni' cate' za' rení' dza na', xidzé bë'ë didza', ga bidxintë gudödi guluhuëla. ⁸ Ga ni' nudúbigaquië' naca lu yu'u xitsá', ate' nacua' zían le ta'gú'u bení' ga na'. ⁹ Zóabi' bi'i Eutico ni', ró'öbi' ga ra'a lení' que yu'u na', ate' nadódirö yëla lobi' tu' ritunna libán runë' Pablo. Ga ni' ró'öbi' rásibi' bi'i na' naca ga bunni cuía lu yu'u, ate' rásisibi' ca' gubíxitëbi', bóxjabi' ga bidxintëbi' zxan yu'u.

Nátitēbi' bulu'lisē'-bi'. ¹⁰ Bōtjē' Pablo xzan yu'u na', ate' yōjxōē' lēbi', en bunidē'-bi'. Ní'irō gudxē' nupa nacuá' ni':

—Biti' gadxi idzōbili'. Nabanbi'.

¹¹ Cate' chibubenē' Pablo xitsá', gudélē'ē yōta xtila, gudahuē'. Ní'irō Pablo bē'lenē' légaquiē' didza' ga bidxintē zila balō. Gudōdi ni' burúajē' ni'. ¹² Bi'i bōnni' ra'bán na' gubíxibi', bulu'ché'ē-bi' nabanbi', en bulu'zí' zxóndē'ē.

Ca guca bidxintu' Mileto

¹³ Gunórutu' lahuē' Pablo, en yōjchentu' tu lē'e barco, ate' gudóditu' ga bidxintu' yōdzō Asón para tsōjtságatu'-nē' Pablo ni', para gaca ca na' chibén xtídza'tu', tu' gú'unnē' Pablo tsejē' ni' sé'esi ni'ē. ¹⁴ Cate' chibudzágatu'-nē' lu yōdzō Asón na', gurénlenē' netu' lē'e barco, ate' guyéajtu' yōdzō Mitilene. ¹⁵ Buzá' barco ni', ate' dza buropi bidxintu' tōdi li ga zoa luyú bidxi nazí'i le Quío, ate' ia'tú dza ca' gudóditu' tōdi li ga dē yōdzō Samos, en bidxintu' yōdzō Trogilio ga ni' guzóatu' tu chí'i. Ia'tú dza ca' bidxintu' yōdzō Mileto. ¹⁶ Caní bentu' tu' chibenē' queē' Pablo tōdisē' yōdzō Éfeso, para cabí tsenē' luyú Asia, tu' run bayudxi soē' Jerusalén cate' naca dza Pentecostés channō séqui'nē'.

Didza' bē'ē Pablo lu yōdzō Mileto

¹⁷ Cate' ni' zoē' Pablo lu yōdzō Mileto, gusól-lē'ē nu yōjlidza bōnni' gula tapa chí'ē bōnachi queē' Cristo nacu'ē Éfeso. ¹⁸ Cate' bila'dxinē' ga zoē' Pablo, lē' gudxē' légaquiē':

—Libí'ili' chinóz quézili' ca béntica'sa' ga zóali' ga gudela' bidxina' luyú Asia. ¹⁹ Yugu' dza bena' xichinē' Xanru' lu yōl-la' nōxaj ladxi', ga bidxintē gurōdxa' ni'a queé'li', ate' zían le guca quia' le guzxí' bē' neda' ni'a que le ruá' dō' gulunē' quia' bōnachi judío bití' ta'yéajlē' Cristo.

²⁰ Béntica'sa' libán ga zóali' que yúgu'tē le ruzí'ili' xibé, en busédida' libí'ili' yálajdo' ga nudúbili', en gapa naca lu yu'u lídxili'. ²¹ Bena' ba nalí lógaca bōnachi judío, en lógaca bōnachi izá'a para ulu'bí'i ládxi'gaca, en ulu'huóaca queē' Dios, en ila'yéajlē' Xanru' Jesucristo. ²² Na'a, Dios Bō' Lá'ayi chinunē' quia' tseja' Jerusalén, en bití' nōzda' bizxi gaca quia' ni'. ²³ Yúgu'tē yōdzō ga ridá', riguíxjōi'inē' Dios Bō' Lá'ayi neda', rē' neda' ila'gu'ē neda' lidxi guíē bōnni' judío bití' ta'yéajlē', en ulu'saca' zi'ē neda'. ²⁴ Bití' bi runi neda' que lē na' gaca, sal-la' gátia' o cabí gátia', pero ruí'i ládxi'sida' údxi guna' le chigudéla'a runa', para guna' dxin na' budōdē' Xanru' Jesús lu na'a, le naca guna' libán que didza' dxi'a ca naca le ruzá' ládxē'ē Dios queéru'. Caní guna' len yōl-la' rudzeja.

²⁵ Na'a, yúgu'tēli' na' chibena' libán loli' ca rinná bē'ē Dios, nōzda' bítirō ulé'eli' neda'. ²⁶ Que lē ni na', le nácate rea' libí'ili' na'a dza. Bití' nabága'a neda' queé'li' nituli' libí'ili'. ²⁷ Bití' bi bucáchi'da' libí'ili', pero

gudíxjöi'ida' libí'ili' yúgu'tè le rnnè' Dios. ²⁸ Que læ ni na', guli'gún chi'i cuinli', en guli'gún chi'i yúgu'tè bönachi queë' Cristo, tu' nuzóë' Dios Bö' Lá'ayi libí'ili' para gácalenli' légaquië', en gun chí'ili' bönachi queë' Xanru', Bönni' na' gútië' uláz quégaquië', bulaljë' xichönë' le böá'uinë' légaquië'. ²⁹ Chinözda', tödi uzá'a ga zóali', ila'yaza nupa ilé'ëni ulu'suniti bönachi queë' Cristo ga zóali', ilunë' ca tunba' bö'cu' guí'a sínia', tu'sunítiba' yugu' bö'cu' zxila'. ³⁰ Ila'rúajë' bönni' nútsa'gaquië' ládjali', ate' ilu'è didza' biti' nácatë para ulu'béajë' quégacasë' nupa ta'yéajlë' Cristo nútsa'gaca ládjali'. ³¹ Que læ ni na', guli'sóa ban ladxi', en guli'tsöjné ca bena' neda' idú ca tsonna iz, rëla, en të dza buchízia' icja nágalí' tu tuli' ga bidxintë gurödxá' queéli'.

³² 'Na'a, böchi' luzá'ado', rigu'a libí'ili' lu në'ë Dios. Rinábida' Lë' uzá' ládxë'ë queéli', en gunë' ca rnna xtídzë'ë. Dios gunë' libí'ili' tsutsu, en gunë' ga idéli'li' gunli' tsözxón yugu' bönni' rö queë'. ³³ Catu caz guzé ládxa'a le nequi quégaquië' böchi' luzá'a. Biti' guzé ládxa'a dumí, o lari' quégaquië'. ³⁴ Nöz quézili' dxi'a, len na'a caza' bena' dxin para gaca gá'ua' le biyadzaj quia', en quégaca nupa gula'cuá'len neda'. ³⁵ Ca naca yúgu'tè le bena', buluí'ida' libí'ili' caní ral-la' gunru' dxin para gaca gácalenru' nupa bi ta'yadzaj. Ral-la' tsöjneru' didza' bë'ë Xanru' Jesús, gunné': "Uzí'irö xibé nu bi runödzej ca nu bi rizí'."

³⁶ Cate' budxi bë'ë Pablo didza' ni, buzóa zxibë', ate' benë' tsözxón yúgu'tè', bulu'lidzë' Dios. ³⁷ Ní'irö gula'bödxë' yúgu'tè'. Bulu'nidë' yenë' Pablo, en bulu'tsaga lahuë' lë'. ³⁸ Caní gulunë' tu' bulu'huí'innë' ni'a que didza' na' bë'ë Pablo, gunné': "Bíti'rö ulé'eli' neda'." Yöjácalenë' tsözxón lë' ga na' gurenë' lu barco.

Sa'yéajë' Pablo Jerusalén

21 ¹ Gudödi bulá'alentu' légaquië', guyú'utë nöza barco na', ate' lírá guyéajtu' ga zoa luyú bidxi nazí'i le Cos. Dza buropi na', gudóditu' ia'tú lataj nazí'i le Rodas, ate' buzá'atu' ni', en bidxintu' yödzö Pátara. ² Yöjxáca'tu' tu barco yúbölö ni' le zeaj luyú Fenicia. Gurentu' lë'e barco na', ate' guyú'utë nöza. ³ Gudóditu' ga nalá' Chipre, le guta' tsölá'a yögöla, ate' guyéajtu' luyú Siria, ga ni' guyaza barco na' lu yödzö Tiro, tu' ral-la' tsöj cá'ana yua' ni' le dzö'ö lë'e barco na'. ⁴ Lu yödzö Tiro na' yöjxáca'tu' tu bönni' réajlë'ë Cristo, ate' bugá'analentu' lë', en yugu' bóchi'ru' ni' idú gadxi dza. Tu' chibuluí'inë' Dios Bö' Lá'ayi légaquië' le ral-la' gaca queë' Pablo, gulé' lë' biti' tsejë' Jerusalén. ⁵ Cate' chibizá'a dza na', burúajtu' ni', ate' gula'zá'lenë' netu' tsözxón yúgu'tè' len nigula que queégaquië', en yugu' bi'i quégaquië', ga bidxintëtu' ní'ilö ra' yödzö na'. Ra' nísado' ni' buzóa zxíbitu', en bulidztu'-në' Dios. ⁶ Budxi bunida' luzá'atu' tutu' ia'tutu', bubentu' lë'e barco, ate' légaquië' yöjhuójgaquië' lídxigaquië'.

⁷ Buzá'atē barco na' lu yōdzō Tiro, ate' ga yōjsé bidxín lu yōdzō Tolemaida. Burúajtu' lē'e barco na' ni'. Bugápatu' Dios bóchi'ru' nacué' ni', ate' bugá'analentu' légaquiē' tu dza. ⁸ Cate' za' rení' ia'tú dza, burúajē' Pablo ni', ate' dzágatu'-nē' netu' guyéajtu' yōdzō Cesarea. Ni' guyú'utu' lu yu'u lidxē' Felipe, ate' bugá'analentu' lē'. Runē' Felipe na' libán que didza' dxi'a. Bítsē'ē gadxē' bōnni' ni' bulu'cu'ē dza ni'te para ilácalenē' bōnachi queē' Cristo. ⁹ Nacuá'abi' tapa bi'i nigula ra'bán queē' Felipe na', tuí'ibi' didza' uláz queē' Dios. ¹⁰ Gudōdi gudzetu' chopatsonna dza ni', ní'irō bidxinē' Agabo ni', bōnni' ru'ē didza' uláz queē' Dios, narúajē' luyú Judea. ¹¹ Bōnni' ni' buduyúē' netu', ate' gudélē'ē pan le néquini guídi queē' Pablo. Béguē'ē ni'a na' cuinē', en gunné':

—Caní rnnē' Dios Bö' Lá'ayi: “Caní ilunē' bōnni' judío nacué' Jerusalén. Ilúguiē' bōnni' ni' nequi queē' pan guídi ni, ate' ulu'dōdē' lē' lu ná'agaca bōnachi izá'a.”

¹² Cate' biyónitu' didza' ni, gúta'yutu' lahuē' Pablo, netu', en nupa nacué' ni', para cabí tsejē' Jerusalén. ¹³ Bubi'ē didza' Pablo, gunné':

—¿Bizxi ni runli', ribódxili', en rusuhuí'inili' neda'? Neda' chizóa caza' sina', calégasō ilúguiē' neda', pero gátia' ca' lu yōdzō Jerusalén ni'a queē' Xanru' Jesús.

¹⁴ Tu' cabí guzxéqui'tu'-nē' didza', bíti'rō bi gúdxitu'-nē', ate' gunnatu':

—Gaca ca raza ládxē'ē Xanru'.

¹⁵ Cate' chigula'dōdi dza na', bupa'atu' queétu', ate' guyéajtu' Jerusalén. ¹⁶ Gula'zá'lenē' netu' bal-lē' bōnni' ta'yéajlē'ē Cristo, nacué' Cesarea, ate' dzáguiē' Mnasón, tu bōnni' Chipre, légaquiē'. Réajlē'ē Cristo dza ni'te, ate' ral-la' tsōjgá'anatu' lidxē' bōnni' ni.

Pablo rōjyúē' Jacobo

¹⁷ Cate' bidxintu' Jerusalén, len yōl-la' rudzeja quégaquiē' bóchi'ru' ni' ta'yéajlē'ē Cristo gulunē' netu' bal. ¹⁸ Dza buropi na' Pablo guyázalenē' netu' lu yu'u, yōjyutu'-nē' Jacobo, ate' nudúbigaquiē' ni' yúgu'tē bōnni' gula tapa chi'ē bōnachi queē' Cristo nacué' Jerusalén. ¹⁹ Cate' Pablo chibugapē' légaquiē' Dios, busiyōnnē' légaquiē' yúgu'tē le benē' Dios lu nē'ē lē' ga nacué' bōnachi izá'a. ²⁰ Cate' bila'yōnnē' lē' ni, gula'gu'ē Dios yōl-la' ba. Ní'irō gulē' Pablo:

—Nōz quézinu', bóchi'tu', cate' xō zían gáyu'ē bōnni' judío ta'yéajlē'ē Cristo, ate' yúgu'tē' túndē'ē bal xibá queē' Moisés. ²¹ Chibila'yōnnē' yugu' le tuí'i didza' bōnachi le ta'nnē' quiu', ta'nná rigú'u yōl-lu'u yúgu'tē bōnni' judío nútsa'gaquiē' ladaj bōnachi izá'a, para ulu'cá'anē' le gunná bē'ē Moisés, en rinná bé'enu' légaquiē' biti' ila'chúguiē' lu xpéla'gacabi' bi'i bōnni'do' quégaquiē', en biti' ilunē' bal yugu' le nalébiru' runru' rē'u, bōnachi judío. ²² ¿Nacxi caz gunru' na'a? Ulu'rúaj bōnachi zían cate' ila'yōni chibidxínu' ni. ²³ Na'a, ben lē' ni rētu' li'.

Nacuá'lenë' netu' ni tapë' bönni', chinazí' lu ná'agaquië' lahuë' Dios tu le ilunë'. ²⁴ Guchë'ë yugu' bönni' ni, en ben légaquië' tsözxön gun dxi'a cuinli' ca naca que yudo', en gudizxaj li' le ral-la' ila'guizxjë' para ilún yútusö ícjagaquië'. Ní'irö ila'nózinë' yúgu'të bönni' judío biti' nácatë læ na' ta'nnë' quiu', pero læsca' li' runu' le naca dxi'a, en runu' ca rinná bë' xibá queë' Moisés. ²⁵ Ca naca quégaca bönachi izá'a, nupa ni' chita'yéajlë' Cristo, chibén xtídza'tu', en buzúajtu' lu guichi ca ral-la' ilunë'. Biti' run bayudxi ilún chi'ë yugu' læ ni tunë' bönni' judío, pero tuz:

Biti' ilahuë' le ta'gú'u bönachi lógaca budó' guió'j budó' yaga.

Biti' ilahuë' rön.

Biti' ilahuë' xipéla'gacaba' böa' guixi' biti' narúaj-gácaba' rön.

Biti' ilunë' le ruá' dö'.

Ta'zönë' Pablo lö'a yudo'

²⁶ Ní'irö Pablo guchë'ë queë' tapë' bönni' na', ate' dza buropi ni' ben dxi'a cuinë' tsözxön len légaquië' ca naca que yudo'. Ní'irö guyázië' lö'a yudo', para gaca bë' bizxi dza údxi ilunë' le tu'ún dxi'a cúngaquië', dza ni' ral-la' tsöjuá'agaquië' le ila'gu'ë lahuë' Dios que queégaquië'. ²⁷ Cate' chizóa izá'a gadxi dza na', bal-lë' judío narúajgaquië' luyú Asia bila'lé'enë' Pablo, zoë' lö'a yudo'. Gulunë' ga gulún dzatsa bönachi zián, ate' gula'zönë' Pablo. ²⁸ Gulu'ë zidzaj didza', ta'nnë':

—iGuli'gácalen netu', bönni' Israel! Bönni' ni rusédinë' yúgu'të bönachi yúgu'të lataj ulu'cá'ana cá'asö yödzö queéru', en xibá queë' Moisés, en yudo' queéru' ni. Na'a, chigulu'ë yugu' bönni' izá'a lu yudo' ni. Caní runë', run dí'tjanë' lataj lá'ayi ni.

²⁹ Caní gula'nnë' tu' bila'lé'enë' Pablo zí'alö lu yödzö dzáguië' Trófimo, bönni' Éfeso, en téquinë' gulu'ë bönni' ni lu yudo'.

³⁰ Caní guca, bulu'dubi yúgu'të bönachi yödzö, ate' bila'guirë' ni'. Ní'irö gula'zönë' Pablo, en gulá'ayöjë' lë', bulu'béajë' lë' lö'a yudo', ate' la' bulu'sáyjatë' ga nu riyaza lö'a yudo' na'. ³¹ Cate' chitequi quézinë' ilútië' Pablo, bidxín didza' lahuë' bönni' lo rinná bé'enë' bönni' rójáquië' gudil-la. Biyönnë' tun dzatsa yúgu'të bönachi Jerusalén.

³² Bönni' lo ni la' butúbitë' bönni' rójáquië' gudil-la, len bönni' ta'nná bé'enë' légaquië', ate' carelö guyéajlenë' légaquië' ga na' tun dzatsa bönachi na'. Cate' bila'lé'e bönachi ni' bönni' lo na' rinná bé'enë' bönni' rójáquië' gudil-la, en bönni' na' rójáquië' gudil-la, bulu'sanë' ta'guinë' Pablo. ³³ Ní'irö gubígui'ë bönni' lo na', en guzxönë' Pablo, ate' gunná bé'enë' bönni' rójáquië' gudil-la ilúguië' lë' len chopa du guíë. Gudödi ni' gunábinë' bönachi zián ni', rnnë':

—¿Nuzxi caz bönni' ni, en bizxi benë'?

³⁴ Ta'bódxí'a bönachi zián na', que queégaca ca ta'nná. Caní guca, biti' bi guca tséajni'inë' bönni' lo na', tu' tu'tsatsa bönachi na', ate'

gunná bé'enë' bönni' rōjáquië' gudil-la ila'ché'ë Pablo lu yu'u zxön ga nagá'anagaquië' bönni' na' rōjáquië' gudil-la. ³⁵ Cate' bila'dxinë' ga naca ni'yëpi' que yu'u zxön na', bönni' na' rōjáquië' gudil-la gulu'ínë' Pablo, tu' dxíadi'igaca bönachi zían légaquië', ³⁶ en zá'gaca cúdzu'lōgaquië', ta'bōdxi'a, ta'nná:

—Guli'gútië'.

Didza' bë'ë Pablo uláz queë' lógaca bönachi

³⁷ Cate' ni' gula'sí lōgaquië' ila'gu'ë Pablo lu yu'u zxön ni', lë' gudxë' bönni' lo na' rinná bé'enë' bönni' rōjáquië' gudil-la, gunné':

—¿Naru' gunnu' neda' lataj guía' li' tu didza'?

Bönni' lo na' gudxë' Pablo:

—¿Rácatso' didza' griego? ³⁸ ¿Naru' calëga li' bönni' Egipto na' dza lahui nisö butubë' yugu' bönni' gula'dá'baguë'ë yúlahui', ate' guchë'ë idú choá' gáyu'ë bönni' huëti bönachi lu lataj cá'asö?

³⁹ Ní'irö Pablo gudxë' lë', gunné':

—Le nácatë naca' neda' bönni' judío. Gulja' Tarso, tu yödzö lo luyú Cilicia. Ráta'yua' lo' gunnu' neda' lataj gu'a didza' lógaca bönachi ni.

⁴⁰ Bönni' lo na' bë'ë lë' lataj, ate' guzuínë' Pablo ga naca ni'yëpi', en guchisa në'ë para ila'cuá' dxisö bönachi zían ni'. Cate' chigula'cu'ë dxisö, Pablo bé'lenë' légaquië' didza' lu didza' hebreo.

22 ¹ Caní gunné' Pablo:

—Libí'ili', bönni' gula, en libí'ili' bōcha'a. Buli'zé nágali' le guía' libí'ili' ca naca le runa'.

² Cate' bila'yönnë' ru'ë didza' hebreo, gula'cuá'arë' dxisö. Pablo gudxë' légaquië', rnnë':

³ —Naca caza' neda' bönni' judío. Gulja' lu yödzö Tarso luyú Cilicia, pero guzxöna' lu yödzö ni, ate' busédinë' Gamaliel neda' idú ca naca xibá quégaquië' xuz xtó'oru'. Bética'sö lādxa'a guyéaj lādxa'a Dios ca runli' libí'ili' na'a. ⁴ Zí'alö gudxía lādxi'gaca'-në' bönni' nazí' lu ná'agaquië' xtídzë'ë Cristo, en guchë'gaca'-në' ga ilátië'. Guzxóngaca'-në', en gulú'ugaca'-në' lidxi guíë, yugu' bönni', en nigula. ⁵ Lësca' huáca ilunë' ba nalí yugu' bixúz unná bë', en yugu' bönni' gula tu'zéajni'inë' que le gulunë'. Gulunë' guichi unná bë' le yöju'a ga nacu'ë bōchi'ru' judío lu yödzö Damasco. Guyija' ni' para tsöjxóngaca' nupa ni' ta'yéajlë' Cristo, para idichë'gaca'-në' nága'gaquië' Jerusalén ni, para ilácagaquië' xíguia'.

Riguíxjö'ë Pablo ca böáquië' queë' Cristo

⁶ Ní'irö gunné' Pablo:

—Cate' ni' sa'yéaja' la' nöza, en si' idxina' Damasco, cate' guca idú huagubidza, tsálido'os guyëpi yösa bení' le za' lúzxiba, le buzení' ga na' sa'yéaja'. ⁷ La' yöjóta'tea' lu yu, en biyönda' chi'i Nu gudxi neda':

“Saulo, Saulo, ¿bix que ribía ládxi'u neda'?” ⁸ Ní'irö gunábida' lë', gunnía': “¿Nuzxi li', Xan?” Lë' gudxë' neda': “Neda' ni Jesús, bönni' Nazaret. Neda' caz ribía ládxi'u.” ⁹ Nupa ni' gula'cuá'len neda' bila'lé'e caz bení' na', en guladxi, pero biti' bila'yöni chi'i Nu na' bulidza neda'. ¹⁰ Ní'irö gudxa'-në': “¿Nacxi guna', Xan?” Xanru' gudxë' neda': “Guyasa, en guyéaj Damasco. Zoë' ni' tu bönni' guíë' li' ca naca yúgu'të le ral-la' gunu'.” ¹¹ Tu' cabirö rilé'eda' tu' budí'i yösa bení' na' guyépida' lahua', que lë' ni na' yugu' bönni' dzágagaquië' neda' gula'guélë'ë na'a, ate' gula'ché'ë neda' ga bidxíntea' Damasco.

¹² Zoë' Ananías ni', tu bönni' runë' idútë ca rinná bë' xibá queë' Dios, ate' yugu' bönni' judío nacu'ë Damasco tunë' lë' bal. ¹³ Bidxinë' Ananías na' ga zoa', en gudxë' neda': “Saulo, bócha'a, huöálaj guió'j lo'.” La' ní'isö böálaj guió'j lahua', ate' bilé'eda' lë'. ¹⁴ Lë' gudxë' neda': “Dios quégaquië' xuz xtó'oru', dza ni'te guró cazë' li' para inózinu' le ré'ëni quézinë' Lë', en ilé'enu'-në' Bönni' Tsahui', Lë' cazë' Zxí'inë', en yönnu' le guíë' Lë' cazë' li'. ¹⁵ Caní gaca, tu' ral-la' gunu' ba nalí queë' Lë' lógaca yúgu'të bönachi, usiyönnu' légaquië' ca naca le chibilé'enu', en le chibiyóninu'. ¹⁶ Na'a, ¿bix que ridzenu'? ¡Guyasa, en bidila nisa! Bulidzë' Xanru' para únë' li' dxi'a, en ugúë' dul-la' nabágu'u.”

Cristo gusól-lë'ë Pablo para gunë' libán lógaca bönachi izá'a

¹⁷ Gunnë' ca' Pablo:

—Gudödi ni', cate' budxina' Jerusalén, en tsanni ni' rulidza'-në' Dios lu chila yudo', bilé'eda' tu le naca ca tu lu yëla béchigal. ¹⁸ Bilé'eda'-në' Xanru', ate' gudxë' neda': “¡Guyéaj carelö! ¡Burúajtë Jerusalén ni, tu' cabí ilunë' bal bönni' ni le gunu' ba nalí quia'!” ¹⁹ Neda' gudxa'-në': “Xan, nózgaca quézinë' ca bena' neda'. Guyázia' gapa naca lu yu'u ga tu'dubë' tu'sëdë' bönni' judío queë' Dios. Gudina' nupa ni' ta'yéajlë' Li', en gulú'ugaca'-në' lidxi guíë. ²⁰ Cate' ni' gulútië' Esteban, bönni' ni' benë' ba nalí quiu', lësca' zoa' neda' ni', en bena' tuz yugu' bönni' gulútië' lë' tu' ben chi'a lari' nácugaquië' bönni' na' bulu'ladxë' lë' guió'j.” ²¹ Ní'irö Xanru' gudxë' neda': “Guyéaj, tu' risól-la'a li' lógaca bönachi izá'a.”

Pablo ruí'ilenë' bönni' lo didza', bönni' rinná bé'enë' bönni' röjáquië' gudil-la

²² Nisö ze lo yugu' bönni' judío bulu'zé nágagaquië' didza' bë'ë Pablo, ate' ní'irö gula'bódxí'ë. Gulu'ë zidzaj didza', ta'nnë':

—¡Guli'gútië' bönni' ni! ¡Bíti'rö ral-la' soë' ibanë'!

²³ Ní'irö tu' ta'bódxí'ë, en ta'chözë' le nácugaquië' lu yöl-la' rilé quégaquië', en tu'chejë' bëchtö yu lu bö'ös, ²⁴ bönni' lo na' rinná bé'enë' bönni' röjáquië' gudil-la gunná bë'ë ulu'gu'ë Pablo lu yu'u zxön na'. Lësca' gunná bé'enë' légaquië' ila'guinë' Pablo para quíxjö'ë le nácatë,

para ila'nózinë' bizx que na' ta'bódxì'ë bönni' judío caní queë' Pablo.

²⁵ Cate' gulúgui'ë lë' du guídi para ila'guinë' lë', Pablo gudxë' tu bönni' nacu'ë lu në'ë bönni' rōjáquië' gudil-la zoë' ni', rnnë':

—¿Naru' dë lataj quínili' neda'? Nababa' Roma, ate' cuntú nu buchi'a busörō neda' channō nabága'a xíguia'.

²⁶ Cate' bönni' na' biyönnë' lë' ni, guyijë' yōjtíxjöi'inë' bönni' lo na' rinná bé'enë' bönni' rōjáquië' gudil-la. Rë' lë':

—¿Bizxi caz ni runru'? iBönni' ni nababë' Roma!

²⁷ Ní'irō bidë' bönni' lo na' ga zoë' Pablo, en gudxë' lë':

—iGudixjö'! ¿Naru' nababu' li' Roma?

Pablo gudxë' lë':

—Ön, nababa'.

²⁸ Bubi'ë didza' bönni' lo na', gunné':

—Neda' ni, dumí zían gudizxja' para ibaba' Roma.

Ní'irō Pablo gudxë' lë':

—Neda' gubaba' Roma cate' ni' gulja' tu' nabábagaquië' xuz xiná'a Roma.

²⁹ Cate' bönni' na' chizóa ila'guinë' lë' bila'yönnë' lë' ni, la' bulu'bíga'të' ga zoë' Pablo. Lësca' gúdxinë' bönni' lo na' cate' gunózinë' nababë' Pablo Roma, tu' chigunná bë'ë ilúguië' lë'.

Ridxinë' Pablo lógaquië' bönni' yudo' tu'chi'a tu'söröë'

³⁰ Dza buropi ni', gú'unnë' bönni' lo na' inózinë' gazxi ga rë' bizxi na' yugu' bönni' judío tu'zéguië' Pablo didza'. Gunná bë'ë bulu'sedxë' du guíë na' náguë'ë Pablo, ate' gunná bë'ë ulu'dubë' bixúz unná bë' judío, en yúgu'të bönni' yudo' tu'chi'a tu'söröë'. Ní'irō bubéajë' Pablo ga na' nagú'ugaquië' lë', ate' buzóë' lë' lógaquië'.

23 ¹ Ní'irō buyúdë'ë Pablo lógaquië' bönni' yudo' tu'chi'a tu'söröë' na', en gunné':

—Libí'ili', bócha'a. Ga ridxintë na'a riböza' dxí'ado'. Caní naca, bití' zoa le ruxösa ládxi'da'ahua' neda' lahuë' Dios.

² Ní'irō Ananías, bixúz lo, gunná bé'enë' nupa nacuá' cuita lë'ë Pablo ila'gápë'ë ru'ë. ³ Pablo gudxë' lë':

—Lëzca' caní Dios ubi'ë quiu', li', ruluí'isö tsahui' cuinu'. ¿Naru' rō'ö cazu' ruchi'a rusörōu' neda' ca rinná bë' xibá, pero ridödi bë'tso' ca rinná bë' xibá na', na' rinná bé'enu' ila'gápë'ë neda'?

⁴ Nupa nacuá' ni' tē Pablo:

—¿Naru' rulidza zi'tso'-në' bixúz lo queë' Dios?

⁵ Pablo gudxë' légaquië':

—Libí'ili', bócha'a. Nazúaj lu guichi, rnna: “Bití' ulidza zi'u nu rinná be'e bönachi uládz quiu’”, pero neda' bití' gúquibe'eda' náquië' bixúz lo.

⁶ Ní'irö gúquibe'enë' Pablo bal-lë' nácagaquië' bönni' yudo' saduceo, ate' ia'bal-lë' bönni' yudo' fariseo. Ní'irö bē'ē zidzaj didza' lógaquië' bönni' yudo' tu'chi'a tu'söröë' na', gunné':

—iLibí'ili', bócha'a! iNaca' bönni' fariseo, en naca' zxí'inë' tu bönni' fariseo! iNa'a ruchi'a rusöröli' neda' tu' runa' löza ulu'bán nupa chinátigaca!

⁷ Cate' bē'ē Pablo didza' ni, bila'ruájë' choplö yugu' bönni' yudo' fariseo, en yugu' bönni' yudo' saduceo, ate' gula'dil-la dídžë'ē la' légacasë'. ⁸ Caní gulunë' tu' ta'nné' bönni' saduceo na' biti' ulu'bán nupa chinátigaca, en biti' nacu'ē gubáz lá'ayi, en biti' nacuá' bö' nácagaca caz bönachi, pero ta'yéajlë'ē bönni' yudo' fariseo nácagaca yúgu'të lë ni.

⁹ Que lë ni na' gula'bódxì'ē. Ní'irö gula'yasë' bönni' nazédagaquië' xibá queë' Dios, yugu' bönni' yudo' fariseo, en gula'dil-la dídžë'ē, ta'nné':

—Rusáca'tu' queëtu' biti' bi dö' nu'ē bönni' ni. Channö tu bö' naca caz bönachi bé'len lë' didza', o channö tu gubáz lá'ayi queë' Dios bé'lenë' lë' didza', biti' ral-la' tá'bagaru'-në' Dios.

¹⁰ Cate' chita'díl-lada' dídžë'ē bönni' judío na', gúdxinë' bönni' lo na' rinná bé'enë' bönni' rójáquië' gudil-la, tu' réquinë' ulu'zxuzxaj ulu'quínnejë' Pablo. Ní'irö gunná bé'enë' bönni' rójáquië' gudil-la tsöjléajgaquië' Pablo ladaj bönni' judío na', en ulu'ché'ē lë' lu yu'u zxön ga na' nagá'anagaquië' bönni' na' rójáquië' gudil-la.

¹¹ Cate' chinaca chi'i dzó'ölö la' dza ná'asö, bulu'í' lahuë' Xanru' ga zoë' Pablo, en gudxë' lë':

—Butipa ládxu'u, Pablo. Ca na' chibenu' ba nalí quia' Jerusalén ni, lësca' run bayudxi gunu' ba nalí quia' lu yödzö Roma.

Tun xtídza'gaquië' ilútië' Pablo

¹² Cate' za' rení' ia'tú dza, gulún xtídza'gaquië' bal-lë' bönni' judío, en gulún tsutsu xtídza'gaquië', ta'nné' gunë' Dios légaquië' xíguia' channö cabí ilunë' lë na' gulún xtídza'gaquië', gula'nné' biti' ca' ilë'aj ilahuë' ga idxinrö chigulútië' Pablo. ¹³ Nayanrö ca choá'gaquië' bönni' na' gulún tsutsu xtídza'gaquië' caní. ¹⁴ Yöjáquië' bönni' ni ga nacu'ē yugu' bixúz unná bē', en bönni' gula tu'zéajni'inë' bönachi judío, ate' gula'nné':

—Chiben tsutsu xtídza'tu', gunnatu' gunë' Dios netu' xíguia' channö cabí guntu' caní. Biti' guí'aj gágutu' ga gútirötu'-në' Pablo. ¹⁵ Na'a, libí'ili', en bönni' yudo' tu'chi'a tu'söröë', guli'guíë' bönni' lo rinná bé'enë' bönni' rójáquië' gudil-la idiché'ē Pablo cuxó para idxinë' ga nudúbili', innali' ré'enili' inábili'-në' Pablo tu didza' gate ga rë'. Netu' cö'ö nistu'-në' la' nöza, ate' gútitu'-në' zí'alö ca idxinë' ni.

¹⁶ Biyónibi' bi'i bönni' queënu nigula zanë' Pablo ca na' ila'bó' nísie' Pablo, ate' guyéajbi', en guyú'ubi' yu'u zxön na', ate' yöjtíxjöi'ibi'-në' Pablo. ¹⁷ Pablo bulidzë' tuë' bönni' nacu'ē lu në'ē bönni' rójáquië' gudil-la en gudxë' lë':

—Guché'ë-bi' bi'i ni lahuë' bönni' lo, tu' nuá'abi' didza' guiébi'-në'.

¹⁸ Ní'irö bönni' na' gudélë'ë-bi', en guché'ë-bi' ga na' zoë' bönni' lo na', ate' gudxë' lë':

—Bulídzë' Pablo, bönni' na' yu'ë lidxi guíë, neda', en gúta'yuë' lahua' idigu'a-bi' bi'i ni lo', tu' ré'ënibi' güí'ilenbi' li' didza'.

¹⁹ Bönni' lo na' gudélë'ë ná'abi', en guché'ë-bi' quez, ate' gunábinë'-bi', rnnë':

—¿Bizxi na' ral-la' guío' neda'?

²⁰ Lëbi' gúdxibi'-në':

—Chinúngaquië' didza' bönni' judío iláta'yuë' lo' ichë'u-në' Pablo cuxó, para idxinë' lógaquië' bönni' yudo' tu'chi'a tu'söróë'. Ilé' li' té'ënnë' ila'nábinë' lë' tu didza' gate ga rë', ²¹ pero biti' tséajlë'u le ila'nnë' tu' nadödi choá'gaquië' ila'bó' nísie' Pablo. Chigulún tsutsu xtídzë'ë gula'nnë' gunë' Dios légaquië' xíguia' channö cabí ilútië' lë'. Biti' bi ilë'aj ilahuë' ga idxinrö ilútië' lë'. Chizóagaquië' ta'bözë' si' lu no'o gunu' le ila'nábinë' li'.

²² Ní'irö bönni' lo na' rinná bé'enë' bönni' rójáquië' gudil-la gunná bé'enë'-bi' cuntú nu guiébi' lë' na' chigúdxibi' lë', ate' ní'irö busól-lë'ë-bi' bi'i ni.

Ridxinë' Pablo lahuë' Félix, bönni' rinná bë'ë luyú na'

²³ Ní'irö bönni' lo na' bulidzë' chopë' bönni' nacué' tu gáyu'ë bönni' rójáquië' gudil-la lu ná'agaquië' tu tuë', ate' gunná bé'enë' légaquië' ulu'cözë' chopa gáyu'ë bönni' rójáquië' gudil-la ta'zë'e ní'agaquië', en tsónnalalaj yu' chië' bönni' rójáquië' gudil-la dxíagaquië' böa', en chopa gáyu'ë bönni' rójáquië' gudil-la ilu'ë yaga tuchi' para tsójáquië' yödzö Cesarea idú ridödi xtsö'. ²⁴ Lësca' gunná bé'enë' légaquië' ulu'cözë'-ba' tu böa' cuíë'-ba' Pablo, ate' ila'ché'ë lë' dxí'ado', cabí bi gaca queë', para idxinë' lahuë' Félix, bönni' lo rinná bë'ë uláz que Roma.

²⁵ Gusól-lë'ë ca' tu guichi le rnna caní:

²⁶ “Neda', Claudio Lisias, ruzúaja' quiu' lu guichi, bönni' lo unná bë', Félix. Rugapa' Dios li'.

²⁷ 'Bönni' ni risól-la'a-në' quiu', gula'zönë' bönni' judío lë', en gulé'ënnë' ilútië' lë'. Cate' gúquibe'eda' nababë' Roma, guché'gaca'-në' bönni' rójáquië' gudil-la, en busólá'-në' lu ná'agaquië' judío na'.

²⁸ Gú'unida' inözda' bizxi benë', lë' na' tu'zéguië' lë' didza' bönni' judío, ate' guchë'a-në' lógaquië' bönni' yudo' tu'chi'a tu'söróë' légaquië'.

²⁹ Cate' buédxi didza', gunözda' tu'zéguië' lë' didza' ca naca le rinná bë' xibá quégaquië', en biti' bi nabáguë'ë bönni' ni para nu guti lë', o nu cu'u lë' lidxi guíë. ³⁰ Ní'irö cate' bidxín nu gudíxjöi'i neda' ta'bó' nísie' yugu' bönni' judío lë', la' gusól-la'tea' lë' ga zu', ate' gunná bé'egacada'-në' bönni' ni tu'zéguië' lë' didza' ila'dxinë' lo' li', para ila'guíxjöi'inë' li' bi didza' nápaagaquië' lë'. ¡Dios gun tsáhuë'ë li'!”

³¹ Ní'irö bönni' na' röjáquië' gudil-la gula'guélë'ë Pablo, en gulunë' ca na' chigunná bé'enë' légaquië', ate' gula'ché'ë lë' yödzö Antípatris, ni' naca chi'i dzó'ölö. ³² Cate' za' rení' ia'tú dza bönni' röjáquië' gudil-la ta'zë'e ní'agaquië' yöjhuójgaquië' Jerusalén, ate' bönni' röjáquië' gudil-la dxíagaquië' böa' bulu'ú'ë nöza, dzágagaquië' Pablo. ³³ Cate' bönni' na' röjáquië' gudil-la naché'gaquië' Pablo bila'dxinë' Cesarea, bulu'nödzjë' guichi na' lu në'ë bönni' rinná bë'ë uláz que Roma, en bulu'sudxinë' Pablo lahuë'. ³⁴ Gudödi bulabë' bönni' unná bë' guichi na', gunábinë' Pablo gazxi bönni' lë'. Cate' gúquibe'enë' nababë' luyú Cilicia, ³⁵ gudxë' lë':

—Yónida' le innó' cate' ila'dxín ni nupa tu'zegui li' didza'.

Ní'irö gunná bé'enë' ilún chi'ë lë' lu yu'u yúlahui' ga ribö'ë Herodes, bönni' rinná bë'ë, para uchi'a usöröë' bönachi.

Pablo ru'ë didza' uláz queë' lahuë' Félix

24 ¹ Cate' chibizá'a gayu' dza, bidxinë' Ananías, bixúz lo, ni', ate' dzágagaquië' lë' bal-lë' bönni' gula tu'zéajni'inë', en Tértulo, tu bönni' nazé'ede'enë' didza'. Bila'dxinë' lahuë' bönni' unná bë', ate' gula'nné' queë' Pablo. ² Cate' chibulu'lidzë' Pablo, ate' bidxinë' ni', gusí lahuë' Tértulo ruzégui'ë lë' didza', rnnë':

—Bönni' lo unná bë', Félix. Ni'a quiu' li' ruzi'tu' xibé le run tsahui' netu', ate' lu yöl-la' réajni'i quiu' rinná bé'enu' dxi'a bönachi uládz queétu'. ³ Yúgu'të lë' ni ruzí'tica'stu' xibé gáti'tës, ate' idú ládxi'tu' rëtu' li': “Xclenu’.” ⁴ Na'a, para cabí upízxjarötu' li', ráta'yua' lo' gun zxön ládxi'u, yönnu' tu le do' guíëtu' li'. ⁵ Gúquibe'etu' bönni' ni rigú'u yól-lë'ë bönachi, en runë' ga ta'dá'baguë'ë yúlahui' yugu' bönni' judío nacu'ë idútë yödzölió, en náquië' bönni' lo quégaquië' bönni' dá'gaquië' bönni' Nazaret na'. ⁶ Lësca' gú'unnë' gun dítjanë' yudo' queétu'. Que lë' ni na' guzxöntu'-në', en gú'unitu' uchi'a usörötu' lë' ca naca xibá queétu'. ⁷ Ní'irö Lisias, bönni' lo rinná bé'enë' bönni' röjáquië' gudil-la bidxinë' ga zóatu', en lu yöl-la' sínia' zxön bugúë' bönni' ni lu na'tu'. ⁸ Ní'irö gunná bé'enë' Lisias na' ídigaca nupa tu'zegui lë' didza' lo' li'. Na'a, li' caz, cate' rinabi yúdxinu'-në' Pablo ni, huáca inózinu' gate ga rë' yúgu'të lë' ni ruzéguitu' lë' didza'.

⁹ Lësca' caní gula'nné' yugu' bönni' judío ni', gula'nné' naca caz caní. ¹⁰ Ní'irö butásö në'ë bönni' rinná bë'ë uláz que Roma na' para gu'ë didza' Pablo, ate' lë' bubi'ë didza', gunné':

—Idú ládxa'a quíxjö'a ca naca le runa', tu' chinaca zían iz ruchí'a rusöróu' le raca quégaca bönachi ladztu'. ¹¹ Le bena' huáca inabu'. Biti' réquini chinnu dza bidxina' Jerusalén para tseaj ládxa'a-në' Dios. ¹² Biti' yöjxáca'gaquië' neda' nu ridíl-lalena' didza', en biti' bena' ga ulu'tsatsa bönachi ga naca chila yudo', en cabí lu yu'u ga tu'dubë' tu'sëdë' queë' Dios, en cabí lu yödzö. ¹³ Biti' ca' gaca ulu'béaj lië' yugu' lë' ni tu'zéguië'

neda' didza'. ¹⁴ Lë ni rixóalëpa' lo'. Ca runa' xichinë' Dios quégaquië' xuz xtó'otu' nalëbi ca le tu'sëdinë' légaquië', pero bönni' judío ni tu'ë le: Le ridá'baga' Dios, tu' réajlë'a yúgu'të le rinná bë' xibá queë' Dios, enca' yúgu'të le bulu'zúajë' bönni' gulu'ë didza' uláz queë' Dios. ¹⁵ Ca na' légaquië' tunë' löza Dios, lësca' neda' runa' löza Dios, usubanë' nupa chinátigaca, bönachi tsahui', en bönachi biti' nácagaca tsahui'. ¹⁶ Que lë ni na' ruí'i ládxi'tica'sa' cabí ibága'a le gun ga uxós ládxi'da'ahua' neda' lahuë' Dios o lógaca bönachi.

¹⁷ 'Gudödi zoa' ga yúbölö idú chopa tsonna iz, budxina' ga nacuá' bönachi uládz quia' para unödzja' dumí le gácalen bönachi yechi', en unödzja' le rigu'a lahuë' Dios. ¹⁸ Tsanni ni' runa' caní, bal-lë' bönni' judío narúajgaquië' luyú Asia bidixáca'gaquië' neda'. Ni' zoa' lö'a yudo', nubéaj dxi'a cuina' ca naca que yudo', en cabí nutuba' bönachi zían, en cabí nuna' ga ulu'tsatsa bönachi. ¹⁹ Yugu' bönni' judío ni' ral-la' ila'dxinë' lo' li', en ulu'zéguië' neda' didza' channö nápaagaquië' neda' didza'. ²⁰ Ila'nnátsöquië' bönni' judío ni channö bulu'dzólnë' bi le cabí naca dxi'a bena' cate' ni' bidxina' lógaquië' bönni' yudo' tu'chi'a tu'söröë' légaquië'. ²¹ Tuz cate' ni' zoa' lógaquië', bë'a zidzaj didza', gunnía': "Ruchi'a rusöröli' neda' na'a tu' runa' löza ulu'bán nupa chinátigaca."

²² Cate' biyönnë' Félix didza' ni, en dxí'ado' chinózinë' ca naca que lë na' rusëdinë' Pablo, buzé láhui'së' ca' didza' bizxaj ni, gunné':

—Cati' idxinë' Lisias, bönni' lo rinná bé'enë' bönni' röjáquië' gudil-la, údxi yónida' ca naca didza' bizxaj queéli'.

²³ Ní'irö Félix gunná bé'enë' tu bönni' nacu'ë lu në'ë bönni' röjáquië' gudil-la zoë' ni', gun chi'ë Pablo, pero gu'ë lë' lataj të' lö'a, en biti' uzáguë'ë xinózgaquië' böchi' luzé'ë duyúgaquië' lë' bi dxin ilunë' queë'.

²⁴ Chopa tsonna dza gudzé, bidë' leyúbölö Félix na'. Drusila, nigula queë' dzáganu lë'. Nácanu nigula judío. Félix bulidzë' Pablo, ate' buzé náguië' xtídzë'ë ca naca le réajlë'ëru' Jesucristo. ²⁵ Cate' bë'ë didza' Pablo ca ral-la' gácaru' tsahui', en inná be'e cuinru', ate' idxinru' ga uchi'a usöröë' Dios rë'u dza si' za', ní'irö gudxi bidzöbinë' Félix, en gudxë' Pablo:

—Guyéaj na'a. Cate' gapa' lataj ulidza' li'.

²⁶ Lësca' gú'unnë' Félix si'ë dumí le unödzjë' Pablo lë' para usanë' lë', ate' que lë ni na', zían luzuí bulidzë' Pablo, en bé'lenë' lë' didza'. ²⁷ Cate' bizá'a chopá iz guyázië' Porcio Festo xilatjë' Félix, ate' tu' gú'unnë' Félix gunë' le tsaza ládxi'gaquië' bönni' judío, bucá'anë' Pablo nadzunë' lidxi guíë.

Ridxinë' Pablo lahuë' Festo, bönni' unná bë'

25 ¹ Bidxinë' Festo yödzö Cesarea para tsázië' xilatjë', gáquië' bönni' unná bë' ulaz que Roma. Cate' bizá'a tsonna dza buzé'ë

yödzö na', sa'yéajë' Jerusalén. ² Cate' bidxinë' Festo ni' yugu' bixúz unná bë', en yugu' bönni' lo quégaca bönachi judío bila'dxinë' lahuë' para ila'nnë' queë' Pablo, ate' guláta'yuë' lahuë' Festo ³ bi uzá' ládxë'ë quégaquië', isól-lë'ë nupa tsöjxí'gaca Pablo, para udxinë' Jerusalén. Gulë'ënnë' ila'bó' nísie' lë' la' nöza para ilútië' lë'. ⁴ Bubi'ë didza' Festo, gudxë' légaquië':

—Lu yödzö Cesarea nadzunë' Pablo, ate' ral-la' tseja' ni' cuxó huidzaj nisö. ⁵ Que lë ni na', núti'tëslöli' dë lu ná'ali', ral-la' sá'lenli' neda', en channö nabáguë'ë bönni' ni' xíguia', huáca uzéguili'-në' didza' ni'.

⁶ Gudzenë' Festo Jerusalén idú ca xunu' gubidza, ate' ní'irö bóajë' Cesarea. Cate' guzá' rení' ia'tú dza gurö'ë ga ruchia' rusöröë', en gunná bé'enë' nupa tsöjxí'gaca Pablo. ⁷ Cate' chibidxinë' Pablo ni', yugu' bönni' judío narúajgaquië' Jerusalén gula'gu'ë lë' lé'alö, en zían le gula'nnë' queë'. Bulu'zéguië' lë' le tu'subáguë'ë lë' xíguia', pero biti' guca ulu'béaj lië' yugu' lë na' gula'nnë' queë'. ⁸ Ní'irö bë'ë didza' Pablo uláz queë', gunné':

—Biti' bi le ruá' dö' bena' que xibá quégaquië' bönni' judío, en cabí que yudo' quégaquië', en cabí queë' César, bönni' Roma, rinná bé'enë' rë'u.

⁹ Gú'unnë' Festo gunë' le ila'yaza ládxí'gaquië' bönni' judío, ate' bubi'ë didza', gudxë' Pablo:

—¿Ré'ënu' so'o Jerusalén, ga na' soa nu uchi'a usöró li' ca nácagaca lë ni ta'nnë' quiu'?

¹⁰ Bubi'ë didza' Pablo, gudxë' lë':

—Zoa caza' ga rö'ö nu ruchia' rusöró uláz queë' César, ga na' ral-la' uchi'a usöró'u neda'. Biti' bi huiá' dö' nuna' quégaquië' bönni' judío, ate' chinóz quézinu' lë ni. ¹¹ La'tu' nuna' tu le ruá' dö', o bítitës le run ga ibága'a xíguia' gátia', biti' tá'baga'a gátia'. Na'a, channö cabí nuna' ca ta'nnë' quia' bönni' ni, cuntu caz nu dë lu në'e udödi neda' lu ná'agaquië'. Rinaba' tseja' lahuë' César ga udxia' uró quia'.

¹² Cate' Festo chibé'lenë' yugu' bönni' yúlahui' didza', bubi'ë didza', gudxë' Pablo:

—Chigunábu' tseju' lahuë' César. Lahuë' César uyiju'.

Ru'ë didza' Pablo lahuë' Agripa, bönni' unná bë'

¹³ Gudödi chopa tsonna dza, bidxinë' Agripa, bönni' rinná bë'ë lu yödzö Cesarea, dzáganu Berenice lë', duyúgaquië' Festo. ¹⁴ Cate' chigula'cu'ë ni' zían dza, Festo buluí'inë' Agripa, bönni' rinná bë'ë, ca naca queë' Pablo. Gudxë' lë':

—Zoë' tu bönni' ni bucá'anë' Félix lë' lidxi guié. ¹⁵ Cate' guzóa' Jerusalén, yugu' bixúz unná bë', en bönni' gula tu'zéajni'inë', bila'dxinë' lahua', ate' gula'nnë' queë' bönni' ni. Gula'nábinë' neda' ichuga' queë' gátie'. ¹⁶ Neda' bubi'a didza', gudxa' légaquië' biti' nalébiguequinë'

bönni' Roma ila'chúguië' queë' tu bönni' gátië' channö cabí ila'dxini lahuë' nupa tu'zegui lë' didza', para gaca ubi'ë didza' ca naca lë na' ta'nnë' queë'. ¹⁷ Que lë ni na', cate' bila'dxinë' légaquië' ni, biti' ca' gudzedá', pero cate' guzá' guyeaní' ia'tú dza gurö'a ga ruchí'a rusöröa', ate' gunná bé'eda' nupa yöjxí'gaca bönni' ni. ¹⁸ Cate' gula'cu'ë ni bönni' na' tu'zéguië' lë' didza', biti' bi gula'nnë' queë' ca busaca' quia' ila'nnë'. ¹⁹ Gula'nnë' queë' bal-la didza' bizxaj ca naca le ta'yéajlë'ë Dios, en ca naca queë' tu bönni' lë' Jesús, nu na' guti, pero Pablo runë' tsutsu xtídzë'ë rnnë' ni zoë' nabanë' leyúbölö. ²⁰ Tu' buchíxida' ca nácagaca lë ni, gunábida'-në' Pablo channö ré'ënë' tsejë' Jerusalén, ga ni' soa nu uchi'a usörö lë' ca nácagaca lë ni. ²¹ Ní'irö cate' gunabë' Pablo tsejë' lahuë' Augusto César para uchi'a usöröë' lë' ni', gunná bé'eda' bönni' rójáquië' gudil-la ilún chí'igarë' lë' cate' gála'rö dza isól-la'a-në' lahuë' César.

²² Ní'irö Agripa gudxë' Festo na':

—Lëzca' neda' ré'ënda' yónida' le innë' bönni' na'.

Festo gudxë' lë':

—Cuxó yönnu' le innë'.

²³ Cate' za' rení' ia'tú dza, len ba zxön bila'dxinë' Agripa, en Berenice ni'. Gula'yázië' ga ral-la' ilu'ë didza', dzágagaquië' légaquië' bönni' unná bë', ate' gula'sól-lë'ë nupa tsöjxí'gaca Pablo. ²⁴ Ní'irö Festo gudxë' Agripa, bönni' unná bë':

—Bönni' unná bë', Agripa, en yúgu'tëli' zóali' ni tsözxön len netu'. Ni zoë' rilé'eli'-në' bönni' na', ta'nnë' queë' yúgu'të bönni' judío nacu'ë Jerusalén, enca' nupa nacuá' ni, tē' neda' ral-la' gátië'. ²⁵ Runi neda' biti' bi benë' le nabáguë'ë xíguia' gátië', pero tu' gunabë' lë' cazë' tsejë' ga uchi'a usöröë' Augusto César lë', que lë ni na' chinuna' quia' isól-la'a-në' lahuë' Augusto. ²⁶ Tu' cabí nözda' bi ral-la' uzúaja' lu guichi le uzegui bönni' ni didza' para isól-la'a lu në'ë César, xana', que lë ni na' nachë'a-në' loli', en le nácáro lo, nachë'a-në' lo' li', Agripa, bönni' unná bë', para cate' údxí rinábini yudxu'-në', ní'irö inözda' bi ral-la' uzúaja' lu guichi ca naca queë' bönni' ni. ²⁷ Réquida' biti' naca dxi'a isól-la'a-në' nu bönni' náguë'ë ni' channö cabí gaca ulu'a le nabáguë'ë.

Didza' bë'ë Pablo uláz queë' lahuë' Agripa, bönni' unná bë'

26 ¹ Ní'irö Agripa gudxë' Pablo:

—Dë lataj gu'u didza' uláz quiu'.

Buchila në'ë Pablo lahuë' Agripa, ate' gusí lahuë' ru'ë didza', rnnë':

² —Bönni' unná bë', Agripa. Raza ládxa'a tu' dë lataj na'a gu'a didza' uláz quia' lo' li' ca naca yúgu'të le tu'zéguië' bönni' judío neda' didza'.

³ Raza ládxi'ra' tu' núnbë'u yúgu'të le nalébiguequinë' tunë' bönni' judío, enca' yugu' lë ni ridíl-latu' didza'.

Yugu' le benë' Pablo zí'atëlö

⁴ Gunnë' ca' Pablo:

—Nózzguequi quézinë' yúgu'të bönni' judío ca na' bena' ga gudéla'të cuídia' ga nacuá' bönachi uládz quia', enca' lu yödzö Jerusalén.

⁵ Nózzguequi quézinë' ca', en huáca ila'guíxjö'ë ca na' bena' dza ni'te. Guca' bönni' fariseo. Yugu' bönni' fariseo tuí'i ládxi'gacarë' ila'yéaj ládxi'gaquië' Dios ca tunë' ia'zíca'rë' bönni' judío. ⁶ Na'a, zoa' ni loli' para nu uchi'a usöró neda' tu' runa' löza Dios, usubanë' bönni' nati, en gunë' ca na' guxzí' lu në'ë lógaquië' xuz xtó'otu'. ⁷ Tunë' löza yugu' bönni' idxinnu cō' di'a dza queétu' ila'déli'në' lë na' guxzí' lu në'ë Dios. Que lë ni na' ta'yéaj ládxi'gaquië' Dios, en tunë' xichinë' rëla, en të dza. Tu' runa' löza lë ni, nuzéguigaquië' bönni' judío neda'. Caní naca, bönni' unná bē', Agripa. ⁸ Na'a, çnaru' réquitseli' libí'ili' biti' naca le tséajlë'ëru', usubanë' Dios bönni' nati?

Pablo gudxía ládxi'ë bönachi queë' Cristo

⁹ Gunnë' ca' Pablo:

—Lëzca' neda', zí'atëlö gúquida' le zían ral-la' guna', tá'baga'a-në' Jesús, bönni' Nazaret. ¹⁰ Caní bena' lu yödzö Jerusalén. Gulu'a zían bönachi ta'yéajlë' Jesús lidxi guíë, tu' bulu'dödë' yugu' bixúz unná bē' lu na'a yöl-la' unná bē'. Cate' gulútië' bönachi ni', bënlena' légaquië' tuz didza'. ¹¹ Zían luzuí busaca' zi'a yugu' bönni' ni' para ulu'sán ládxi'gaquië' ca ta'yéajlë'ë Cristo. Caní bena' gapa naca lu yu'u ga tu'dubë' bönni' judío, en tu'sëdë' queë' Dios. Guléde'eda' légaquië', ate' gudxía ládxa'a légaquië' ga bidxintë guyija' gapa nacuá' yödzö zi'tu' para tsöjxóngaca'-në'.

Riguíxjö'ë Pablo ca böáquië' queë' Cristo

¹² Gunnë' ca' Pablo:

—Para guna' caní guyija' yödzö Damasco, ate' bixúz unná bē' nasól-la'gaquië' neda' nudódigaquië' lu na'a yöl-la' unná bē'. ¹³ Caní guca, bönni' unná bē', Agripa. Cate' ni' sa'yija' la' nöza, ni' naca idú huagubidza, bilé'eda' tu bení' lúzxiba le buzení'rö ca gubidza. Buzení' ga na' zoa', en ga nacuá' nupa sōjácalen neda'. ¹⁴ Ní'irö yúgu'tëtu' gudzó'ötu' lu yu, ate' biyönda' chi'i nu bulidza neda'. Bë'ë didza' hebreo, gunné': "Saulo, Saulo, ¿bizx que ribía ládxi'u neda'? Run zi' cuinu', ridá'bagu'u neda'. Raca quiu' ca raca queéba' bēdxi, run zi' cuinba', richégu'ba' yaga tuchi' le túndë'ë-ba' zi'." ¹⁵ Ní'irö gudxa'-në': "¿Nuzxi li', Xan?" Xanru' gudxë' neda': "Neda' ni Jesús, Nu na' ribía ládxi'u." ¹⁶ Na'a, guyasa, en guzuí, tu' buluí'i lahua' li' na'a, para uzóa' li' gunu' xichina', en gunu' ba nalí que lë ni chibilé'enu', enca' quégaca le uluí'ida' li', uluí'i lahua' ga zu'. ¹⁷ Usólá' li' lu ná'agaquië' bönni'

uládz quiu', en lu ná'agaquië' bönni' izá'a, lógaca nupa ni' risól-la'a li' na'a. ¹⁸ Risól-la'a li' ga na' nacu'ë para gunu' ga ulu'huöálaj guiöj lógaquië', en ulu'huöáquië' queë' Dios, en ulu'cá'anë' le naca chul-la que dul-la', en ila'dxinë' lu bení'. Ulu'rúajë' lu na' Satanás tu' xihui', en ila'yázië' lu në'ë Dios. Channö ila'yéajlë'ë neda', Dios uniti lahuë' légaquië', en ugúë' dul-la' nabága'gaquië', ate' ila'déli'në' ila'bábalenë' bönachi chinubéajë' Dios quez queë'."

Benë' Pablo ca naca le bulu'ínë' Xanru' lë'

¹⁹ Gunnë' ca' Pablo:

—Qui lë ni na', bönni' unná bë', Agripa, biti' gudá'baga'a guna' le bulu'ínë' Dios, zoë' yehua' yubá, neda'. ²⁰ Buzéajni'ida' nupa nacuá' yödzö Damasco, en gudödi ni' nupa nacuá' Jerusalén, en nupa nacuá' luyú Judea, en bönachi yugu' yödzö zi'tu' para ulu'bí'i ládxi'gaca, en ulu'huöáca queë' Dios, en ilún le ilaca bë' chibulu'bí'i ládxi'gaca. ²¹ Tu' bena' caní, yugu' bönni' judío gula'zönë' neda' cate' ni' zoa' lö'a yudo', en gulë'ënnë' ilútië' neda'. ²² Ní'irö gúcalenë' Dios neda', ate' ga ridxintë na'a dza zoa' idú ládxa'a, runa' ba nalí lógaquië' bönni' cá'asö, en lógaquië' bönni' lo. Biti' ruá'a didza' yúbölö, pero ca gula'nнасë' zí'alö bönni' gulu'ë didza' uláz queë' Dios, enca' ca gunné' Moisés ca ral-la' gaca. ²³ Gula'nnë': "Qui'i sáquë'ë Cristo, en tödi gátië', gáquië' nu isí lo ubán tsaz lu yöl-la' guti, para ulu'ë lahui naca löza ila'dxín bönachi lataj bení', en gaca libán que lë ni lógaca bönachi uládz queëtu', enca' lógaca bönachi izá'a."

Pablo ruzéajni'ínë' Agripa para tséajlë'ë Cristo

²⁴ Cate' chibë'ë Pablo yugu' didza' ni, le bë'ë uláz queë', ní'irö bë'ë zidzaj didza' Festo, gunné':

—iNachixi icju', Pablo! iTu' nazédado'o, chiguchixi icju'!

²⁵ Ní'irö Pablo gudxë' lë':

—Biti' nachixi icja', rea' li', Festo, ate' didza' ni ruá'a naca idútë li, en naca lesaca'. ²⁶ Lë cazë' Agripa, bönni' ni rinná bë'ë, nózinë' yugu' lë ni, en que lë ni na', idú ládxa'a ruá'a didza' lahuë' lë'. Nózinë' yugu' lë ni, tu' cabí guca bagáchi'sö lë na' guca. ²⁷ Bönni' unná bë', Agripa. ¿Naru' réajlë'u le gula'nnë' bönni' gulu'ë didza' uláz queë' Dios? Nözda' réajlë'u lë ni.

²⁸ Ní'irö Agripa gudxë' Pablo:

—Ia'láti'sö la' réquinu' idéli'nu' neda' para gaca' queë' Cristo.

²⁹ Pablo gudxë' lë':

—Ni'a queë' Xanru' Dios ré'ënda', sal-la' ia'láti'sö o yenni', calégasö li', pero lësca' yúgu'të nupa ni ta'yöni neda', gácali' idú ca naca' neda', néquida' queë' Cristo, pero calëga gága'li' du guíë ca ni nága'a neda'.

³⁰ Cate' budxi bë'ë Pablo didza' ni, guzuínë' bönni' lo unná bë' na', ate' gulazuínë' ca' bönni' rinná bë'ë, en Berenice, en nupa ró'lengaca légaquië'. ³¹ Cate' bila'ruájë' quez, guluí'i xtídza'gaquië', ta'nnë':

— Biti' bi nunë' bönni' ni le nabáguë'ë xíguia' gátië', en calëga tsázië' lidxi guíë.

³² Agripa gudxë' Festo:

—Huáca usanu'-në' bönni' ni la'tu' cabí gunabë' tsejë' lahuë' César ga uchi'a usöröë' lë'.

Ta'sól-lë'ë Pablo yödzö Roma

27 ¹ Cate' chigulunë' quégaquië' ila'sól-lë'ë netu' lë'e barco para tséajtu' yödzö Roma, luyú Italia, gula'guélë'ë Pablo, en ia'bal-lë' nupa nadzúngaca, ate' bulu'dödë' légaquië' lu në'ë Julio, tu bönni' rinná bé'enë' tu cö' bönni' röjáquië' gudil-la nazí'i le: Bönni' Queë' Augusto Röjáquië' Gudil-la. ² Gurentu' tu lë'e barco que luyú Adramitio, le ral-la' tödi yugu' yödzö gapa ta'dxín barco ga naca luyú Asia, ate' yú'usötu' ca' lë'e barco na', buzá'atu' yödzö Cesarea. Aristarco, tu bönni' yödz Tesalónica, le nababa luyú Macedonia dzáguië' netu'. ³ Cate' za' rení' ia'tú dza, bidxintu' yödzö Sidón, ate' ni' Julio, bönni' na' rinná bé'enë' bönni' röjáquië' gudil-la, lu yöl-la' dxi'i ladxi' queë', bë'ë Pablo lataj tsejë' ga nacu'ë böchi' luzé'ë para ilácalenë' lë' bi riyadzaj queë'. ⁴ Gudödi ni', bubentu' lë'e barco, ate' buzá'atu' ni'. Gudóditu' tsölá'a ga dë luyú bidxi Chipre ga rö'ö dxi bö' na' recja, tu' za' saca' lotu' bö' recja lu nísado' na'. ⁵ Ní'irö gudóditu' lu nísado' ga nalá' luyú Cilicia, en luyú Panfilia, ate' bidxintu' Mira, tu yödzö nababa luyú Licia.

⁶ Bönni' na' rinná bé'enë' bönni' röjáquië' gudil-la, en naché'ë netu', yöjxáquië' tu barco ni' narúaj yödzö Alejandría que luyú Egipto, barco na' zeaj luyú Italia ga rö' yödzö Roma. Gulu'ë netu' lë'e barco na'.

⁷ Guzá' barco na' tsahui' ládxi'do' zían dza, ate' len yöl-la' rizáca'sö bidxintu' ga nalá' tu luyú bidxi lu nísado' na' nazí'i le Gnido, ate' tu' ruzaga' netu' bö' na' recja, gudóditu' tsölá'a luyú bidxi nazí'i le Creta ga rö'ö dxi bö' na' recja, en bidxintu' ga nalá' yödzö Salmón luyú Creta na'.

⁸ Lu yöl-la' rizáca'sö gudóditu' tsölá'a ga dë luyú bidxi Creta na', en bidxintu' tu lataj ga ta'dxín barco, nazí'i le Buenos Puertos, le dë gala' ga na' dë yödzö Lasea.

⁹ Tu' chigudzéda'atu', chigula' zoa bönadxi gaca ditaj bíti'tës barco rizá' lu nísado' na', tu' chigudödi yugu' dza tunë' gubasa cate' si' idxín beo' ziaga cate' récjada' bö'. Que lë ni na' Pablo buzéajni'inë' légaquië', ¹⁰ rnnë':

—Libi'ili', bönni', réquibe'eda' ga tseaj barco ni, huazóa bönadxi gaca ditaj barco ni, en yua' dzö'ö lë'e, en lësca' soa bönadxi queëru' gátiru'.

¹¹ Bönni' na', rinná bé'enë' bönni' röjáquië' gudil-la, guyéajlë'erë' le gula'nnë' bönni' na' dë lu në'ë barco, en bönni' xan caz, ca le gunné'

Pablo. ¹² Tu' cabí naca dxi'a lataj ni' ga ta'dxín barco, nazí'i le Buenos Puertos, para ulu'gá'anë' ni' yugu' beo' ziaga, que læ ni na' la'tu'biqui' yúgu'të bönni' nacu'ë læ'e barco na' gulún tuz xtídza'gaquië' ulu'zë'ë ni', channö huáca ila'dxinë' ga ta'dxín barco lu yödzö Fenice, læsca' dë luyú bidxi na' nazí'i le Creta, le dë tsölá'a ga ribía gubidza, ate' gulë'ënnë' ulu'gá'anë' ni' yugu' beo' ziaga.

Recja bö' budunu' lu nísado'

¹³ Tu' recja tu bö'do' le za' saca' tsölá'a ga ridödi gubidza beo' ziaga, téquinë' chiraca ilunë' ca té'ënnë', ate' bulu'lisë' guíë zi'i naga' du guíë le ruzóa dxisö barco, ate' gudödi barco na' gala' ra' luyú bidxi na' nazí'i le Creta. ¹⁴ Ia'tú chí'isö ca', guyecja tu bö' budunu' za' lotu', nazí'i le Euroclidón. ¹⁵ Tu' ruzéaj bö' na' recja barco na' tsölá'alö, ate' tu' cabí guca tseaj barco ga za' bö', ní'irö bé'ëtu' lataj bö' na' buzéaj barco na' ga ré'ëni. ¹⁶ Cate' gudödi barco na' ga bidxintu' tsölá'a tu luyú bídxido' nazí'i le Cauda, tsölá'a ni' ga biti' récjada' bö', lu yöl-la' rizáca'sö buchísatu' bárcodo' ná'ayöj barco zxön na' yú'utu'. ¹⁷ Gudödi burentu' le lahui barco zxön na', ní'irö béga'ratu' barco zxön na'. Zxante barco na' buchólitu' du, para cabí ilá'a lu le ridxía nisa na'. Tu' gúdxitu' tödi barco na', en inídxu' lu yuzxi lu nísado' na', buzótjatu' lari' que, le rutubi bö' rusá' barco na'. Canísö bé'ëtu' lataj bö' na' recja buzéaj barco. ¹⁸ Cate' za' rení' ia'tú dza, en ni' ruzéajda' bö' budunu' recja barco na', ní'irö gurú'unatu' lu nísado' lati' yua' dzö'ö læ'e barco na'. ¹⁹ Dza bunni, len na' cuintu' gurú'unatu' le tun dxin que barco na' lu nísado'. ²⁰ Cate' chiguca zían dza biti' rilé'etu' gubidza, en nitú böljaj, en tu' récjada' bö' na' ruzéaj barco na' yú'utu', bíti'rö runtu' löza ulatu'.

²¹ Tu' chiguca zían dza biti' nágutu', guzuínë' Pablo gatsaj láhui'lö légaquië', en gudxë' légaquië':

—Libí'ili', bönni', dxi'arö guca la'tu' uzë nágali' neda', en cabí uzá'aru' luyú Creta, en cabí udutságaru' læ ni riguí'i rizáca'ru', en yugu' læ ni raca ditaj que barco ni. ²² Na'a, rea' libí'ili': Tsutsu guli'gún ládxi'li', tu' cabí gátili' nituli' libí'ili' tscali' zóali' ni, sal-la' gaca ditaj barco ni. ²³ Caní gaca tu' buduluí'i lahuë' neda' gudiyëla tu gubáz lá'ayi queë' Dios. Dios ni néquida' queë', en runa' xichinë'. ²⁴ Gubáz lá'ayi na' gudxë' neda', gunné': “Pablo, biti' gádxinu'. Run bayudxi idxinu' lahuë' César. Tu' nadxí'inë' Dios li', usölé' yúgu'të bönachi nacué'len li' læ'e barco ni.” ²⁵ Que læ ni na', tsutsu guli'gún ládxi'li', tu' ruzxöni ládxa'anë' Dios, gaca ca na' chigudxë' gubáz lá'ayi queë' neda'. ²⁶ Caní gaca sal-la' run bayudxi gaca ditaj barco ni tu luyú bídxido', ga ni' tsöjca'ana rë'u.

²⁷ Cate' ni' chigudödi chidá' dza, ate' bö' na' recja ruzéaj barco na' lu nísado' nazí'i le Adriático, idú ladxi' yëla guléquinë' bönni' tunë' dxin lu barco na' chizóa idxín barco gala' tu luyú bidxi. ²⁸ Gula'ru'unë' du lu

nísado' na', ate' gula'nózinë' galaj ösa naca ga bidxintë ga rè' lu nisa. Cate' gudödi barco na' ia'láti'do', gula'rú'unë' du na' leyúbölö, en gula'nózinë' chinaca chinu ösa. ²⁹ Tu' guládxinë' tsöjdín barco na' lu guiój, que læ ni na', tsölá'a láhuilö que barco gula'rú'unë' lu nísado' tapa guié zi'i nága'gaca du guié le tu'zóa dxisö barco lu nisa. Lu yöl-la' ruúbi ruguí'isö ládxi'do'gaquië' gula'bözë' tsení'. ³⁰ Ní'irö gulé'ënnë' bönni' tunë' dxin lu barco ulu'zxúnnajë' læ'e barco na'. Bulu'zötjë' bárcodo' na' dë lahui barco zxön na' lu nísado'. Gulunë' ca té'ënnë' ilu'ë ia'lati' zi'tu' guié zi'i na' naga' du guié le ruzóa dxisö barco na', le zoa saca' tsölá'a láhuilö. ³¹ Ní'irö Pablo gudxë' bönni' na' rinná bé'enë' bönni' rójáquië' gudil-la, tsözxön len bönni' na' rójáquië' gudil-la, gunné':

—Channö cabí ulu'gá'anë' bönni' ni læ'e barco ni, biti' gaca uláli'.

³² Ní'irö bönni' na' rójáquië' gudil-la gula'chúguië' du naga' bárcodo' na', ate' gulu'ë lataj gubixi lu nísado'.

³³ Cate' chizá' rení', Pablo gúta'yuë' lógaquië' bi ilahuë' yúgu'të'. Gudxë' légaquië':

—Na'a chiguca chidá' dza rubéaj yëla loli', en runli' gubasa, biti' bi náguli'. ³⁴ Que læ ni na', ráta'yua' loli' gáguli' para huöáca ládxi'li', tu' cabí gátili' nituli' libí'ili'.

³⁵ Cate' Pablo budxi bë'ë didza' ni, gudélë'ë yöta xtila, en gudxë' Dios: “Xclenu’.” Caní benë' lógaquië' yúgu'të'. Ní'irö buzxuzxjë' yöta xtila na', en gusí lahuë' rahuë'. ³⁶ Ní'irö bila'dipa ládxi'gaquië' yúgu'të', en gulahuë'. ³⁷ Tscatu' zóatu' læ'e barco na', gúcatu' idú chopa gayuá' yu' tsónnalalaj yu' chizxópatu'. ³⁸ Gudödi gulahuë', en bulu'huóljanë', ní'irö gula'rú'unë' zxoá' xtila dë læ'e barco na' lu nisa, para ulu'lahuë' yua' dzö'ö læ'e barco na'.

Raca ditaj barco lu nísado'

³⁹ Cate' chiguca lahui' dza, yugu' bönni' tunë' dxin lu barco na' biti' bulu'únbë'ë luyú na'. Bila'lé'enë' ga röjró' nisa zxön na' gatsaj láhui'llö luyú bidxi na', en dë lataj ni' ga naca lachi' ra' nísado'. Gulé'ënnë' ilunë' ga tsaza barco na' ga ni'. ⁴⁰ Ní'irö bulu'sedxë' yugu' du guié nága'gaca yugu' guié zi'i tu'zóa dxisö barco na', en bulu'sanë' léguequi, ate' gula'bixi lu nísado'. Bulu'sedxë' ca' du naga' në'e yaga le ruzecaj rudxí'i barco. Ní'irö bulu'chisë' lari' que le rutubi bö', le zoa tsölá'a láhuilö barco na', ate' ní'irö gusí lo ridödi barco saca' ga röjró' nísado' gatsaj láhui'llö luyú bidxi na'. ⁴¹ Cate' bidxín barco na' tu lataj ga ridzaga chopá nisa, ni' binidxi' tsölá'a láhuilö barco na' lu yuzxi lu nísado' na', ate' bugá'anasö barco na' ga ni'. Bítirö guca bi utá le, ate' tsölá'a cúdzi'llö barco na', gusí lo riguitsaj nísado' na' le, len yöl-la' rizá' que. ⁴² Ní'irö bönni' rójáquië' gudil-la gulé'ënnë' ilútië' bönni' nadzúngaquië', para cabí ila'zxúnnajë', ila'zxóë' lu nisa na'. ⁴³ Bönni' na' rinná bé'enë' bönni' na' rójáquië' gudil-la gú'unnë' usölé' Pablo, ate' gunná bé'enë' bönni'

na' rōjáquiē' gudil-la cabí ilunē' ca na' té'ennē'. Ní'irō gunná bé'enē' bōnni' taca ila'zxóē' lu nisa, zí'alō légaquiē' ila'yáziē' lu nisa para ila'dxinē' luyú bidxi. ⁴⁴ Gunná bé'enē' ca' yugu' bōnni' nagá'anagaquiē' ila'zxóē' lu yaga dzō'ō láhuilō barco, en ia'bal-lē' láhuigaca yágado' que barco na'. Caní guca, bulu'lē' yúgu'tē'. Canísō bila'dxinē' luyú bidxi na'.

Le benē' Pablo luyú bidxi nazí'i le Malta

28 ¹ Cate' chibulatu' yúgu'tētu', gunōztu' luyú bidxi ga na' zóatu' nazí'i le Malta. ² Bōnni' xidza' nacu'ē luyú bidxi na' lu yöl-la' dxi'i ladxi' quégaquiē' gulunē' netu' bal. Gula'béquiē' guí', ate' bulu'lidzē' netu' yúgu'tētu' iditsē'e cuintu', tu' ralaj guió'j, en runda' ziaga. ³ Ní'irō Pablo gúchē'ē tu tsölén huága zxisi bídxido', en cate' gulu'ē le lu guí', birúajba' tuba' bëla sínia' lē'e huágado', rizxúnna'jba' bóchila que guí' na', ate' yójtí'iniba' yen në'ē Pablo. ⁴ Cate' bōnni' xidza' na' bila'lē'enē' bëla na', nála'ba' yen në'ē Pablo, gulé' tuē' ia'túē':

—Le nácatē bōnni' ni náquiē' nu ruti bōnachi. Sal-la' bulé' lu nísado', dios queēru' lē' Tsahui' biti' ru'ē lē' lataj soē' ibanē'.

⁵ Gudxibi në'ē Pablo, en busládzu'ē-ba' bëla sínia' na'. Yöjxóatēba' lu guí', ate' lē' biti' bi guca queē'. ⁶ Bōnni' xidza' nacu'ē ni' tu'yúē' Pablo, bátacalō cō'ē gui, o tsó'ötē' gátie'. Ní'irō cate' chigudzé ta'bözē', en bila'lē'enē' biti' bi raca queē', ia'tú le guléquinē', ate' gula'nnē' naca cazē' tu dios.

⁷ Lataj ní'isō dē xiyúē' Publio, bōnni' lo que luyú bidxi na', ate' bōnni' ni benē' netu' bal. Lu yöl-la' dxi'i ladxi' queē' gulu'ē netu' lidxē' idú tsonna dza. ⁸ Dza na' dē' ré'enē' xuzē' Publio na', yu'ē xilá, en ré'enē' huē' rōn. Guyáziē' Pablo sōjyúē' lē', en gudōdi bulidzē' Dios, ní'irō guxóa në'ē bōnni' huē' na', en bunē' lē'. ⁹ Tu' benē' Pablo lē' ni, lē'sca' bila'dxín nupa te'e ga zoē', nacuá' luyú bidxi ni', en bulu'huóáquiē'. ¹⁰ Yugu' bōnni' ni gulunē' netu' bal, en zían le gulunē' queētu'. Cate' chizóa uzá'atu' luyú ni', bulu'nödzjē' yugu' le naquínitu' queētu'.

Ridxinē' Pablo lu yödzö Roma

¹¹ Cate' chiguca tsonna beo' zóatu' ni', ní'irō gurentu' tu lē'e barco que yödzö Alejandría, le bugá'ana luyú bidxi na' yugu' beo' ziaga. Barco ni dá'gaca tsölá'a láhuilō budó' yaga léguequi Cástor, en Pólux, dios bilidi' quégaca bōnachi Alejandría na'. ¹² Buzá'a barco na' ga ni', ate' bidxín yödzö Siracusa, ga ni' bugá'anatu' tsonna dza. ¹³ Buzá'atu' ni', ate' gudóditu' tsölá'alō luyú ni', en bidxintu' yödzö Regio. Cate' za' rení' ia'tú dza, tu' recja bö' za' saca' ga ridōdi gubidza beo' ziaga, buzá'atu' ni', ate' dza buropi na' bidxíntētu' yödzö Puteoli luyú Italia. ¹⁴ Lu yödzö na' yöjxáca'tu' yugu' bóchi'ru' ta'yéajlē'ē Cristo, ate' guláta'yuē' lotu' ugá'analentu' légaquiē' idú xunu' dza. Cate' bizá'a dza na' buzá'atu' ni' para tséajtu' yödzö Roma, rizē'e ní'atu'. ¹⁵ Chibila'yönnē' bóchi'ru'

nacu'ë Roma chizóa idxintu' ni', ate' bila'rúajë' idixí'gala'gaquië' netu'. Bila'dxinë' tu yódzödo' nazí'i le Yé'ëyi Que Apio. Ia'bal-lë' bila'dxinë' tu lataj nazí'i le Tsonna Yu'u Quégaquië' Bönni' Yú'ugaquië' Nöza. Cate' Pablo bilé'enë' légaquië', bidipa ládxë'ë, en gudxë' Dios: "Xclenu'."

¹⁶ Cate' bidxintu' Roma, bönni' na' rinná bé'enë' bönni' röjáquië' gudil-la, guché'ë bönni' na' nadzúngaquië', ate' budödë' légaquië' lu në'ë tu bönni' lo rinná bé'enë' bönni' röjáquië' gudil-la, ate' bë'ë Pablo lataj soë' queézë', zóalenë' lë' tu bönni' rejë' gudil-la ruyúë' lë'.

Runë' Pablo libán lu yödzö Roma

¹⁷ Cate' chigudödi tsonna dza, bulidzë' Pablo yugu' bönni' lo quégaquië' bönni' judío nacu'ë Roma. Cate' chibulu'dubë' ga na' zoë' Pablo, lë' gudxë' légaquië':

—Libí'ili', bócha'a, sal-la' biti' bi bena' quégaca bönachi ládzaru', en calëga que le nalébiru' runru' ca na' gulunë' xuz xtó'oru', yugu' bönni' judío nacu'ë Jerusalén bulu'dödë' neda' lu ná'agaquië' bönni' Roma nacu'ë Jerusalén, ate' bulu'sayjë' neda' lidxi guíë. ¹⁸ Ní'irö cate' chigula'nabi yúdxinë' neda' bönni' Roma, gulé'ënnë' ulu'sanë' neda', tu' guléquibe'enë' biti' nabága'a xíguia' gátia'. ¹⁹ Yugu' bönni' judío ni' gula'dá'báguë'ë nupa na' gulé'ëni ulu'sán neda', ate' ben bayudxi gunaba' tseja' lahuë' César ga uchi'a usöröë' neda', en calëga para uzéguia' bönachi uládz queéru' didza'. ²⁰ Que lë' ni na' bulidza' libí'ili' para ilé'eda' libí'ili', en güí'ilená' libí'ili' didza', tu' nága'a du guíë ni tu' runa' löza le runru' löza rë'u, bönachi Israel, gácatë lë' na' guzxí' lu në'ë Dios gata' queéru'.

²¹ Ní'irö légaquië' gulé' Pablo:

—Biti' ridxini queétu' guichi le za' luyú Judea ca naca lë' na' raca quiu', en cuntu nu ridxini nu naca bóchi'ru' judío, nu usiyöni netu' channö nu bi rnnë quiu' le ruá' dö'. ²² Na'a, ré'ënitú' yónitu' xtídzú'u, lë' na' riguinnaj icju', tu' chinózitu' ta'nnë bönachi yúgu'të lataj quégaca nupa nazí' lu né'eguequi xibá cubi ni.

²³ Caní guca, bulu'dxíë' bë' tu dza, ate' dza na' bila'dxinë' zíanë' ga na' zoë' Pablo. Gusí lahuë' Pablo zílado', ate' ni' gúl-li'ni buzéajni'inë' légaquië', en buchila lá'anë' le rinná bë'ë Dios. Gú'unnë' uluí'inë' légaquië' naca idútë li libán runë' queë' Jesús. Para gunë' caní bugunë' dxin le rinná bë' xibá queë' Moisés, enca' le gula'nnë' bönni' gulu'ë didza' uláz queë' Dios. ²⁴ Bal-lë' gula'zí' lu ná'agaquië' didza' bë'ë Pablo, pero ia'bal-lë' biti' ca' gula'yéajlë'ë. ²⁵ Tu' bila'rúajë' choplö, gula'sí lógaquië' tu'zë'ë ni', ate' Pablo gudxë' légaquië', rnnë':

—Didza' nácatë bë'ë Dios Bö' Lá'ayi, lë' na' gunné' Isaías, bönni' bë'ë didza' uláz queë' Dios, ca na' buzéajni'inë' xuz xtó'oru', gunné':

²⁶ Guyéaj lógaca bönachi ni', yöjödxi légaquië':

Yöni nágalí', pero biti' tséajni'ili'.

Uyuli' iná'ali', pero biti' ilé'eli'.

²⁷ Yugu' bönni' ni chinazidi icja ládxi'do'gaquië',
en biti' bi riyaza icja nágagaquië'.

Gulunë' ca tun nupa nachul-la guióǝj lóguequi
para cabí ila'lé'e len guióǝj lóguequi,
en cabí ila'yöni nágaguequi
para cabí ulu'zéajni'i ládxi'guequi,
en cabí ilé'ëni ulu'huöáca queë' Dios
para gaca una' léguequi.

²⁸ Na'a, ral-la' inóǝzili' lë ni. Dios risól-lë'ë netu' lógaca bönachi izá'a
para ulu'lágaca, ate' légaquië' ila'yönnë'.

²⁹ Cate' Pablo budxi bë'ë didza' ni, bila'rúajë' bönni' judío, ta'díl-lada'
dídze'ë la' légacasë'.

³⁰ Idú chopa iz bugá'anë' Pablo ni', zoë' tu lu yu'u ga na' riguiẏxjë',
ate' benë' bal yúgu'të nupa buduyúgaca Lë'. ³¹ Lu yöl-la' rugu ladxi'
benë' libán ca rinná bë'ë Dios. Busédinë' bönachi ca naca queë' Xanru'
Jesucristo, ate' cuntu nu buzaga' xinözü'. ¡Ca' naca!